



# ಭೂಮಿ ಮಾನ್ಯ ದಿನ



ಅಪ್ಪಚಿಕ್ಕೋಳೆಂದ ವನು ವಸಂತ



**TB DAY**

**I AM Stopping TB**

**International Nurses Day**

**International Nurses Day**

**International Ladies' Day**

**WORLD RED CROSS DAY**

**INTERNATIONAL DAY FOR BIOLOGICAL DIVERSITY**

**22 MAY**

**INVASIVE ALIEN SPECIES**

**REPUBLIC DAY OF INDIA**

**international MOTHER language day**

**5 JUNE**

**WORLD ENVIRONMENT DAY**

Deserts and Desertification - Don't Desert Dryland

# ವಿಶ್ವ ಮಾನ್ಯ ದಿನ



ಅಪ್ಪಚಿಟ್ಟೋಳಂಡ ವನು ವಸಂತ

ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ,  
ಮಡಿಕೇರಿ

## "VISHWA MAANYA DINA"

A book of few 'Important World's Anniverseries'  
collected and written by Mrs. Appachettolanda Vanu Vasantha,  
Ballavati, Published by the Karnataka Kodava Sahithya Academy,  
Madikeri

ಆದ್ಯ ಮುದ್ರಣ : 2010

ಪ್ರತಿ : 500

© ಎಲ್ಲಾ ಹಕ್ಕನ ಕಾತ್ ಬೆಚ್ಚಿತ್.

ಪ್ರಕಟ ಪಡ್ತನವು :

ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ, ಮಡಿಕೇರಿ

ಕ್ರಯ : 50 ಉರ್‌ಪಿಯ

Price : FIFTY Rupees

ಪುಸ್ತಕ ಕಟ್ಟುವ ಜಾಗ:

ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ,

ಮ್ಯಾನ್ಸ್ ಕಾಂಪೌಂಡ್, ಮಡಿಕೇರಿ - 571 201

ಫೋನ್ : 08272 - 229074

ಅಚ್ಚಾರ :

ಶ್ರೀ ಕೃಷ್ಣ ಕಂಪ್ಯೂಟರ್ಸ್ ಅಂಡ್ ಪ್ರಿಂಟರ್ಸ್

ಪೂಜಾ ಆರ್ಕೆಡ್,

ಜೂನಿಯರ್ ಕಾಲೇಜ್ ರೋಡ್, ಮಡಿಕೇರಿ

ಫೋನ್ : 08272 - 224919, 94481 35592

# ಅಧ್ಯಕ್ಷರೊಡ ತಕ್ಕ

ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿಲ್ ಇಕ್ಯಾಕಣೆಕ್ ತರಾವರಿ ಪುಸ್ತಕ ಎಣ್ಣಕ ನಾಟಕ, ಕತೆ, ಕವನ, ಕಾದಂಬರಿ.... ರನ್ನತ ಪುಸ್ತಕ ಬೊಳಿಕಂಡಿತ. ಆಚೇಂಗಿ ವಿಶ್ವತರ ಕೇಳಿಪಟ್ಟ ದಿನತರ ವಿಚಾರತ ಇಕ್ಯಾಕಣೆ ಪತ್ರಿಕೆ ಮಾದ್ಯಮತ್ ಬಂದಿತಿಕ್ಕು. ಆಚೇಂಗಿ ಪುಸ್ತಕ ರೂಪತ್ ಇಲ್ಲೆ. ಆನಗುಂಡ್ ಈನ ಎಲ್ಲಾ ಸಂಗ್ರಹ ಮಾಡಿತ್ ಇಕ್ಕ ಪುಸ್ತಕ ರೂಪತ್ ಅಕಾಡೆಮಿ ಪ್ರಕಟ ಪಡ್ತಿಯಂಡುಂಡ್.

ನಂಗಡ ಮಿಂಞತರ ಜನಾಂಗಕ್ ಬೊಂಡಿಯಾನಂತ ವಿವರತರ ಪುಸ್ತಕ ಪ್ರಕಟ ಆನದ್ ಪೆರ್ತ್ ಕಮ್ಮಿ. ಕೊಡಗ್, ಕೊಡವ, ಕೊಡವ ಸಂಸ್ಕೃತಿಕ್ ಸಮ್ಮಂಧಪಟ್ಟ ವಿಚಾರತ ಮಾತ್ರ ಕೃತಿ ಪ್ರಕಟ ಆಯಿತ್. ಆಚೇಂಗಿ ಪ್ರಪಂಚತರ ವಿಶೇಷ ದಿನತರ ವಿಷಯ, ವಿಶೇಷತೆನ ಕೊಡವ ತಕ್ಕಲ್ ಪುಸ್ತಕ ರೂಪತ್ ಕೊಂಡ ಬಂದಕ ನಲ್ಲದ್. ಆ ಪೋಲೆ "ವಿಶ್ವ ಮಾನ್ಯ ದಿನ" ಎಣ್ಣವ ಪುಸ್ತಕತರ ಎಳ್ತ ಅಕಾಡೆಮಿಕ್ ಬಂದಲ್ಲಿ, ಇದ್ನ ಆಡಳಿತ ಮಂಡಳಿ ಆಯ್ಕೆ ಮಾಡಿತ್ ಪ್ರಕಟ ಪಡ್ತುವ ತೀರ್ಮಾನ ಎಡ್ತಂಡಿತ್.

ವಿಶ್ವ ಮಾನ್ಯ ದಿನತರ ವಿವರತನ ಪ್ರತ್ಯೇಕವಾಯಿತ್ ಎಳ್ತದ್ನ ಎಳ್ತಕರ್ತಿ ಶ್ರೀಮತಿ ಅಪ್ಪಚೆಟ್ಟೋಳಂಡ ವನು ವಸಂತ ಅಯಿಂಗಕ್ ನಂಗಡ ಶುಭಾಶಯ. ಓದುಗಂಗ ಆಪಚ್ಚಕ್ ಪುಸ್ತಕತನ ಎಡ್ತಿತ್ ಸಾಹಿತ್ಯ ಬೊಳಚೆಕ್ ಒತ್ತಾಸೆ ತರಂಡೂಂದ್ ಕೇಟವಿ.

ಮಡಿಕೇರಿ

20-3-2010

ಐಮುಡಿಯಂಡ ರಾಣಿ ಮಾಚಯ್ಯ

ಅಧ್ಯಕ್ಷ

## ಎಳ್ಳೆಕರ್ತೀರ ತಕ್ಕ

ನಂಗಡ ಬದ್ಕಲ್ ಪ್ರತಿಯೋರ ದಿನವೂ ಮುಖ್ಯಪಟ್ಟದೇ ಆಂಡೊಂದಾಚೇಂಗಿ ಅದಂಗ್ ನಂಗ ಒರೊಂದ್ ದಿನ ಒರೊಂದ್ ನಲ್ಲ ಕಾರ್ಯ ಮಾಡಂಡು. ಅದ್ ಕಯ್ಯತ ಪೋಚೇಂಗಿ ಕನಿಷ್ಟ ಕಾಲಕೊಂದೋ, ದಂಡೋ ನಲ್ಲ ಕಾರ್ಯ ಮಾಡ್ಚೇಂಗಿ ನಂಗಡ ಜೀವನ ಸಾರ್ಥಕ ಆಕು.

ಅನ್ನನೇ ಕಾಲತುಳ್ಳ ಮುನ್ನೂಯಿಟ ಅರುವತ್ತಂಜಿ ದಿನತಾಲೂ ಅದೆಚ್ಚಕೊ ಮುಖ್ಯಪಟ್ಟ ದಿನ ಉಂಡ್. ಅನ್ನತ ಕೆಲವು ದಿನತಾನ ಇಲ್ಲಿ ನಾನ್ ಎಲ್ಲಿಯೆ. ಇದೆಲ್ಲ ನಾನ್ ಸಂಗ್ರಹ ಮಾಡ್ತಾನ ಎಳ್ಳೆ, ಜೊತೆಕ್ ನಾಡ ವಿಮರ್ಶೆ. ಇದಲ್ ಎಚ್ಚಕೋ ದಿನ, ವಿಷಯ ಎಲ್ಲ ಬುಟ್ತ್ ಪೋಯಿತಿಪ್ಪಕೂ ಮದಿ. ನಾಕ್ ಕೊಟ್ಟನಚ್ಚಕ್, ಅರಿವಿಕೆ ಉಳ್ಳಚ್ಚಕ್ ವಿಷಯತಾನ ಎಲ್ಲಿಯೆ. ಇದ್ ಓದುಗ ಮಾಜನಕ್ ಅದಾಲೂ ವಿಶೇಷವಾಯಿತ್ ವಿದ್ಯಾರ್ಥಿಯಕ್ ಉಪಯೋಗ ಆಕೊಂದ್ ನಂಬಿಯೆ. ಎಳ್ಳಲ್ ಎಲ್ಲೇಂಗಿ ತಪ್ಪು ಉಂಡೇಂಗಿ ಮಾಪ್ ಕೇಟವಿ. ಎಳ್ಳಕ್ ಒತ್ತಾಸೆ ತಂದಂಡುಳ್ಳ ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿಕೂ ವಿಷಯ ಸಂಗ್ರಹ ಮಾಡುವಕ್ ಸಹಾಯ ಮಾಡ್ತಾನ ಎಲ್ಲರಾಕೂ ನಾಡ ಎದೆದುಂಬ್ತಾನ ವಂದನೆ.

ಶ್ರೀ ಅಪ್ಪಚಿಕ್ಕೋಳಂಡ ವನು ವಸಂತ

ವಿಳಾಸ

W/o ಎ.ಪಿ. ವಸಂತ ಮುತ್ತಪ್ಪ

ಬಲ್ಲಮಾವಟಿ ಗ್ರಾಮ

ಬಲ್ಲಮಾವಟಿ ಅಂಚೆ,

ಮಡಿಕೇರಿ ತಾಲೂಕು - 571 214

ದೂ : 08272-270006

ಮೊ.: 9449542066

# ಒಳ್ಳೆ ಪಾಳೆಲ್....

ಜನವರಿ 1	ಪುದಿಯ ಕಾಲ, ವಿಶ್ವ ಕುಟುಂಬ ದಿನ ಶಾಂತಿ ಪಿಂಗಳ ಸಹಕಾರತ್ವ ದಿನ
ಜನವರಿ 26	ಗಣರಾಜ್ಯ ದಿನ
ಜನವರಿ 30	ಹುತಾತ್ಮ್ಯಂಗಡ ದಿನ
ಫೆಬ್ರವರಿ 14	ವ್ಯಾಲೆಂಟೈನ್ಸ್ ದೇ
ಫೆಬ್ರವರಿ 21	ಅಂತರ್ರಾಷ್ಟ್ರೀಯ ಅವ್ವ ಭಾಷೆರ ದಿನ
ಮಾರ್ಚ್ - 8	ವಿಶ್ವ ಪೊಮ್ಮಕ್ಕಡ ದಿನ
ಮಾರ್ಚ್ -15	ವಿಶ್ವ ಗ್ರಾಹಕಂಗಡ ದಿನ
ಮಾರ್ಚ್ - 21	ವಸುಷ್ಯಂಡ ರೆಂಗ್ ಅಧಾರತ್ ನಡಪನ್ನಕ ಅನ್ಯಾಯ ತಡಪನ್ನಕ ಅಂತರ್ರಾಷ್ಟ್ರೀಯ ದಿನ
ಮಾರ್ಚ್ - 22	ವಿಶ್ವ ನೀರ್ ದಿನ
ಮಾರ್ಚ್ - 23	ವಿಶ್ವ ಹವಾಮಾನ ದಿನ
ಮಾರ್ಚ್ - 24	ವಿಶ್ವ ಕ್ಷಯರೋಗ ನಿವಾರಣಾ ದಿನ
ಏಪ್ರಿಲ್ - 1	ಮುಟ್ಟಾಳಂಗಡ ದಿನ , ರಾಷ್ಟ್ರೀಯ ಅಂಧತ್ವ ನಿವಾರಣಾ ದಿನ
ಏಪ್ರಿಲ್ - 7	ವಿಶ್ವ ಆರೋಗ್ಯ ದಿನ
ಏಪ್ರಿಲ್ - 22	ಭೂಮಿ ದಿನ
ಏಪ್ರಿಲ್ - 23	ವಿಶ್ವ ಪ್ರಸಕ್ ದಿನ
ಏಪ್ರಿಲ್ - 26	ವಿಶ್ವತ್ ಪೆದಪೋನ ವ್ಯಕ್ತಿಯಡ ಆಪ್ತಿಯ ದಿನ
ಏಪ್ರಿಲ್ 29	ವಿಶ್ವ ನೈತ್ಯ ದಿನ
ಮೇ 1	ಕಾರ್ಮಿಕ ದಿನ ಅಥವಾ ಮೇ ದಿನ
ಮೇ 3	ಪತ್ರಿಕಾ ಸ್ವಾತಂತ್ರ್ಯ ದಿನ
ಮೇ - 4	ಅಂತರ್ರಾಷ್ಟ್ರೀಯ ಅಗ್ನಿಶಾಮಕ ದಳತ್ವ ದಿನ
ಮೇ-8	ಅಂತರ್ರಾಷ್ಟ್ರೀಯ ರೆಡ್ಕ್ರಾಸ್ ದಿನ
ಮೇ - 12	ಅಂತರ್ರಾಷ್ಟ್ರೀಯ ನರ್ಸಡ (ಆರೈಕೆಕರ್ತಿಯಡ) ದಿನ
ಮೇ -17	ಪ್ರಪಂಚ ದೂರ ಸಂಪರ್ಕ ದಿನ
ಮೇ 22	ಅಂತರ್ರಾಷ್ಟ್ರೀಯ ಕುಟುಂಬ ದಿನ
ಮೇ - 31	ಪ್ರಪಂಚ ಪೇತೊಪ್ಪ್ ವಿರೋಧಿ ದಿನ
ಮೇ ತಿಂಗತ್ವರ ದಂಡನೆ ನಾರಾಚಿ	ಅವ್ವಂಗಡ ದಿನ
ಮೇ - 21	ಉರ್ತವನಾರಿಯಡ ವಿರೋಧಿ ದಿನ
ಜೂನ್ - 8	ಪ್ರಪಂಚ ಮಹಾಸಾಗರ ದಿನ
ಜೂನ್ - 4	ಆಕ್ರಮಣಕ್ ಒಳಗಾನ ಮುಗ್ಗ ಮಕ್ಕಡ ದಿನ
ಜೂನ್ - 5	ಪ್ರಪಂಚ ಪರಿಸರ ದಿನ
ಜೂನ್ - 12	ವಿಶ್ವ ಬಾಲಕಾರ್ಮಿಕ ವಿರೋಧಿ ದಿನ
ಜೂನ್ - 14	ಪ್ರಪಂಚ ಚೋರೆ ದಾನ ದಿನ
ಜೂನ್ - 20	ವಿಶ್ವ ನಿರಾಶ್ರಿತಂಗಡ ದಿನ

ಜೂನ್ - 17	ಬರ ಪರಿಸ್ಥಿತಿರ ವಿರುದ್ಧ ಪ್ರೋರಾಟ ಮಾಡುವ ವಿಶ್ವ ದಿನ
ಜೂನ್ ತಿಂಗಳ್ತರ 3ನೇ ನಾರಾಟೆ	ಪ್ರಪಂಚ ಅಪ್ಪಂಗಡ ದಿನ
ಜುಲೈ - 11	ವಿಶ್ವ ಜನಸಂಖ್ಯಾ ದಿನ
ಆಗಸ್ಟ್ - 12	ಅಂತರ್ರಾಷ್ಟ್ರೀಯ ಬಾಲಕಾರದ ದಿನ
ಆಗಸ್ಟ್ - 15	ಭಾರತ ಸ್ವಾತಂತ್ರ್ಯ ದಿನ
ಸೆಪ್ಟೆಂಬರ್ - 8	ಅಂತರ್ರಾಷ್ಟ್ರೀಯ ಸಾಕ್ಷರ ದಿನ
ಸೆಪ್ಟೆಂಬರ್ - 16	ಅಂತರ್ರಾಷ್ಟ್ರೀಯ ಓರೈಣ್ ಪದರ ರಕ್ಷಣಾ ದಿನ
ಸೆಪ್ಟೆಂಬರ್ - 21	ಅಂತರ್ರಾಷ್ಟ್ರೀಯ ಶಾಂತಿ ದಿನ
ಸೆಪ್ಟೆಂಬರ್ - 27	ವಿಶ್ವ ಪ್ರವಾಸ ದಿನ
ಅಕ್ಟೋಬರ್ - 1	ಅಂತರ್ರಾಷ್ಟ್ರೀಯ ವಯಸ್ಸಂಗಡ ದಿನ
ಅಕ್ಟೋಬರ್ - 2	ಅಂತರ್ರಾಷ್ಟ್ರೀಯ ಅಹಿಂಸಾ ದಿನ, ಕುಷ್ಕರೋಗ ನಿವಾರಣಾ ದಿನ
ಅಕ್ಟೋಬರ್ - 4	ಪ್ರಪಂಚ ಪ್ರಾಣಿ ದಿನ
ಅಕ್ಟೋಬರ್ - 5	ವಿಶ್ವ ಉಪಾದ್ರಿಯದ ದಿನ
ಅಕ್ಟೋಬರ್ - 9	ವಿಶ್ವ ಪೋಸ್ಟ್ ದಿನ
ಅಕ್ಟೋಬರ್ - 10	ವಿಶ್ವ ಮಾನಸಿಕ ಆರೋಗ್ಯ ದಿನ
ಜೂನ್ - 26	ಅಂತರ್ರಾಷ್ಟ್ರೀಯ ಮದ್ದು ದುರುಪಯೋಗ ಖೋಳಾ ಅನ್ಯಾಯತರ ವ್ಯಾಪಾರ ವಿರೋಧಿ ದಿನ
ಅಕ್ಟೋಬರ್ - 16	ವಿಶ್ವ ಆಹಾರ ದಿನ
ಅಕ್ಟೋಬರ್ - 17	ವಿಶ್ವ ಬಡತನ ನಿರ್ಮೂಲನ ದಿನ
ಅಕ್ಟೋಬರ್ - 24	ಯುನೈಟೆಡ್ ನೇಷನ್ಸ್ ದೇ
ಅಕ್ಟೋಬರ್ - 30	ವಿಶ್ವ ಉಳಿತಾಯ ದಿನ
ಅಕ್ಟೋಬರ್ - 31	ರಾಷ್ಟ್ರೀಯ ವಿಕತಾ ದಿನ
ನವೆಂಬರ್ - 9	ವಿಶ್ವ ಸಂಶೋಧಕಂಗಡ ದಿನ
ನವೆಂಬರ್ - 16	ಅಂತರ್ರಾಷ್ಟ್ರೀಯ ತಾಳ್ಮೆ ದಿನ
ನವೆಂಬರ್ - 17	ಅಂತರ್ರಾಷ್ಟ್ರೀಯ ವಿದ್ಯಾರ್ಥಿ ದಿನ
ನವೆಂಬರ್ - 19	ವಿಶ್ವ ಕಕ್ಕುಸ್ ದಿನ
ನವೆಂಬರ್ - 20	ಪ್ರಪಂಚ ಮಕ್ಕದ ದಿನ
ನವೆಂಬರ್ - 14	ಭಾರತತ್ ಮಕ್ಕದ ದಿನ
ನವೆಂಬರ್ -21	ವಿಶ್ವ ದೂರದರ್ಶನ ದಿನ
ನವೆಂಬರ್ - 25	ಪೊಮ್ಮಕ್ಕದ ಮೇಲೆ ನಡಪನ್ನತ ಹಿಂಸೆನ ವಿರೋಧ ಮಾಡುವ ಅಂತರ್ರಾಷ್ಟ್ರೀಯ ದಿನ
ಡಿಸೆಂಬರ್ - 1	ವಿಶ್ವ ವಿದ್ಯೆ ದಿನ
ಡಿಸೆಂಬರ್ - 2	ಅಂತರ್ರಾಷ್ಟ್ರೀಯ ಗುಲಾಮಗಿರಿ ನಿರ್ಮೂಲನಾ ದಿನ
ಡಿಸೆಂಬರ್ - 3	ವಿಶ್ವ ಅಂಗ ಊನಕಾರದ ದಿನ
ಡಿಸೆಂಬರ್ - 9	ಅಂತರ್ರಾಷ್ಟ್ರೀಯ ಭ್ರಷ್ಟಾಚಾರ ವಿರೋಧಿ ದಿನ
ಡಿಸೆಂಬರ್ - 10	ಅಂತರ್ರಾಷ್ಟ್ರೀಯ ಮಾನವ ಹಕ್ಕು ದಿನ
ಡಿಸೆಂಬರ್ - 14	ರಾಷ್ಟ್ರೀಯ ಇಂಧನ ಶಕ್ತಿ ಉಳಿತಾಯ ದಿನ
ಡಿಸೆಂಬರ್ - 23	ವಿಶ್ವ ರೈತಂಗಡ ದಿನ

ಜನವರಿ 1

## ಪುದಿಯ ಕಾಲ, ವಿಶ್ವ ಕುಟುಂಬ ದಿನ ಶಾಂತಿ ಪಿಂಞ ಸಹಕಾರತ್ ರ ದಿನ

ಜನವರಿ ಒಂದ್ ಇಂಗ್ಲೀಷ್ ಕ್ಯಾಲೆಂಡರ್ ಪ್ರಕಾರ ಪುದಿಯ ಕಾಲತ್ ಆದ್ಯ ದಿನ. ಅಂದ್ ಎಲ್ಲರೂ ಅಯಿಂಗಡ ಆಸೆಪೋಲೆ ಈ ದಿನತ್ ಆಚರಣೆ ಮಾಡುವ. ಇಂಗ್ಲೀಷ್ ಕಾರ ಬಲ್ಯ ಪಾರ್ಟಿ, ಡ್ಯಾನ್ಸ್, ಕೇಕ್, ಕಡಿ-ಕುಡಿ ಎಣ್ಣೆತ್ ಪುದಿಯ ಕಾಲತ್ ಸ್ವಾಗತ ಮಾಡುವ. ಹಿಂದೂ ಕ್ಯಾಲೆಂಡರ್ ಪ್ರಕಾರ ಯುಗಾದಿ ಹಿಂದೂವಕ್ ಪುದಿಯ ಕಾಲತ್ ಆದ್ಯ ದಿನ. ಅಂದ್ ಬೇವು ಬೆಲ್ಲ ತಿಂದಿತ್ ಮನುಷ್ಯಂಡ ಬದ್ ಕಲ್ ಬಪ್ಪನ್ನತ ಕಷ್ಟ-ಸುಖ ದಂದಾನೋ ಒರೇ ತರತ್ ಎಡ್ತೋವನ್ನತ ಶಕ್ತಿ ಮನ್ ಸಕ್ ಬರಡ್ ಅಂದೆಣ್ಣುವ ಅರ್ಥ ಇದಲ್ ಕಾಂಬ. ಕೊಡವಡ ಪುದಿಯ ಕಾಲತ್ ಆದ್ಯ ದಿನ ಎಡಮ್ಯಾರ್ ಒಂದ್. ಅದ್ ಇಂಗ್ಲೀಷ್ ಕ್ಯಾಲೆಂಡರ್ ಮಾರ್ಚಿ 15 ಲಿಂಜ ಶುರು ಆಪ.

ಇನ್ನನೆ ಬೋರೆ ಬೋರೆ ಜನಾಂಗಕಾರ, ಬೋರೆ ಬೋರೆ ಜಾಗತ್ ಕಾಲತ್ ಆದ್ಯ ದಿನತ್ ಫಲತರತ್ ಆಚರಣೆ ಮಾಡುವ. ಆಚಿಂಗಿ ಇಂದತ ಶೋಕಿರ ಕಾಲತ್ ಪ್ರತಿಯೊಬ್ಬನೂ ಜನವರಿ ಒಂದನೇ ತಾರೀಖ್ ಗೌಜಿಲ್ ಆಚರಣೆ ಮಾಡುವ. ಡಿಸೆಂಬರ್ 31ಂಡ ಬೈಟ್ ಪನ್ನೆರಂಡ್ ಗಂಟೆಕೆತ್ತನೆ ಅದನ ಮೀರಿತೂ ಹೊಟೇಲ್ ಲೂ ಅಲ್ಲಿ-ಇಲ್ಲಿ ಗೌಜಿ ಮಾಡಿತ್ ಪುದಿಯ ಕಾಲತ್ ಸ್ವಾಗತ ಮಾಡುವ. ಅದಂಡ ಬದಲ್ ಪುದಿಯ ಕಾಲತ್ ಅರ್ಥ ಪೂರ್ಣವಾಯಿತ್ ನಡ್ತಂಡೂಂದ್ ಗೇನ ಮಾಡಿತ್ ಆದ್ಯ ದಿನತ್ ರಂದ್ 'ಈ ಕಾಲ ಇಡೀ ನಾನ್ ಕೆಟ್ಟ ಕೆಲಸ ಮಾಡುಲೆಂದೋ, ಪಡ್ ಚ ದುಶ್ಚಟತನ ಬುಡುವೀಂದೋ, ಇಲ್ಲೇಂಗಿ ಎಂತೆಂಗೋರ್ ನಾಲ್ ಜನಕ್ ಉಪಕಾರ ಆಪನ್ನತ ಕಾರ್ಬಾರ್ ಮಾಡುವೀಂದೋ ಪ್ರತಿಜ್ಞೆ ಮಾಡಿತ್ ಅದಂಡನ್ನೆ ನಡಪಕ್ ಪ್ರಾಮಾಣಿಕ ಪ್ರಯತ್ನ ಮಾಡ್ವದ್ ಎಚ್ಚಕ್ ನಲ್ಲದಲ್ಲ.

ಇದೇ ದಿನ ವಿಶ್ವ ಕುಟುಂಬ ದಿನ ಪಿಂಞ ಒರ್ ದಿನತ್ ಶಾಂತಿ ಪಿಂಞ ಸಹಕಾರ ದಿನಾಂದ್ ಆಚರಣೆ ಮಾಡುವ. 2000ನೇ ಇಸವಿ ಇಸ್ರೆಲ್ ಪಿಂಞ



ಪ್ಯಾಲೆಸ್ಟೀನ್ ದೇಶತ್ವರ ಕುಟುಂಬತ್ವರ ಜನ ಯುದ್ಧ ಸಮಯತ್ ನಾಬ್ಲಸ್ (Nablus) ಎಣ್ಣುವ ನಿರಾಶ್ರಿತಂಗಡ ಶಿಬಿರತ್ವಲ್ ಇಂಜ ಸಮಯತ್ ಒರ್ ವಿಶೇಷವಾನ ಸಮಾರಂಭ ಮಾಡಿತ್ ದಂಡೂ ಕಡೆರ ಕುಟುಂಬ ಕೂಡಿತ್, ಎಲ್ಲರೂ ಶಾಂತಿ ಸಮಾಧಾನತ್ ಬಾವಂಡೂಂದ್ ಸಂದೇಶ ಕೊಡ್ತತ್. ಅದೇ ಪ್ರಕಾರ ಆ ಕಾಲ ಇಡೀ ಎಣ್ಣುಕ, 2000 ತ್ವರ ಇಸವಿ ಪೂರ್ತಿ ದಂಡೂ ದೇಶತ್ ಎಕ್ಸೊಲು ಇಲ್ಲತಚ್ಚಕ್ ಶಾಂತಿ ಇಂಜತ್. ಅಲ್ಲಿಂಜಪ್ಪರ ವಿಶ್ವ ಸಂಸ್ಥೆ (UNO) ಪ್ರತಿ ಕಾಲತ್ವರ ಆದ್ಯ ದಿನವಾನ ಜನವರಿ ಒಂದಾನ ವಿಶ್ವ ಕುಟುಂಬ ದಿನ, ಶಾಂತಿ ಪಿಂಞ ಸಹಕಾರ ದಿನಾಂದ್ ಘೋಷಣೆ ಮಾಡ್ಚಿ.

ಎಲ್ಲಿ ನೋಟಾನಕಲೂ ಅಶಾಂತಿ ದುಂಬ್ನ ಈ ಸಂದರ್ಭತ್ ಇಂತ ದಿನಾಚರಣೆಕ್ ಎಚ್ಚಕ್ ಮಹತ್ವ ಕ್ಕಟ್ಟಿಯಂಡುಂಡ್ ಎಣ್ಣುವದ್ ಕಷ್ಟ. ಆಚೆಂಗಿ ಕಾನೂನೇ ಆಡ್, ಆಚರಣೆಯೇ ಆಡ್ ಮನುಷ್ಯ ಮನ್ಸ್ ಮಾಡ್ನಕ ಮಾತ್ರವೇ ಜಯ ಕ್ಕಟ್ಟುವೊ ಎಣ್ಣುವದ್ ಸತ್ಯ.

ಜನವರಿ 26

## ಗಣರಾಜ್ಯ ದಿನ

1950ನೇ ಇಸವಿ ಜನವರಿ 26ಂಗೆ ಭಾರತ ಸರಕಾರ ಭಾಷಾವಾರು ಪ್ರಾಂತ್ಯ ರಚನೆ ಮಾಡ್‌ಚಿ. ಗಣರಾಜ್ಯ ಎಣ್ಣೆಚಿಂಗಿ ದೇಶತ್‌ಲುಳ್ಳ ಪ್ರಚೆಯಳೇ (ಜನಳೇ) ದೇಶತ್‌ನ ಆಳುವೊ. ಎಣ್ಣೆಕ ಜನ ಎಲ್ಲ ಕೂಡಿತ್, ಮತ ಚಲಾವಣೆ ಮಾಡಿತ್ ನಾಯಕಂಗಳ ಆಯ್ಕೆ ಮಾಡಿತ್ ಅಯಿಂಡ ಮೂಲಕ ದೇಶ ಆಳುವೊಂದ್ ಅರ್ಥ. ಭಾಷೆರ ಆಧಾರತ್ ಒರೇ ಭಾಷೆನ ತಕ್ ಪರಿವನ್ನತ ಏರ ಜನವುಳ್ಳ ಒರೊಂದ್ ಜಾಗತ್‌ನ ಒರೊಂದ್ ರಾಜ್ಯವಾಯಿತ್ ಮಾಡ್‌ಚಿ. ಸುರೂಲ್ (19) ಪತ್ತೊಯಿಂಬದ್ ರಾಜ್ಯ ಇಂಜದ್ ಇಂದಿಕ್ಕ (29) ಇರುವತ್ತೊಯಿಂಬದ್ ರಾಜ್ಯ ಆಯಿತ್. ಇಂಇೂ ಕೆಲವು ಜಾಗತ್‌ಲ್ ಬೋರೆ ರಾಜ್ಯಕ್ ಪೋರಾಟ ನಡೊಂದಂಡೇ ಉಂಡ್. ಡಾ. ಬಿ.ಆರ್. ಅಂಬೇಡ್ಕರ್ ಮುಂದಾಳ್ತನತ್ ಸಂವಿಧಾನ ರಚನೆ ಮಾಡ್‌ಚಿ. ಜನಕ್ ಕೆಲವು ಹಕ್ಕ್‌ನ ಕೊಡ್‌ತತ್.

ಭಾರತತ್ ಈ ಗಣರಾಜ್ಯ ದಿನತ್‌ನ ಗೌಜಿಲ್ ಆಚರಣೆ ಮಾಡುವ. ಇದನ 'ರಾಷ್ಟ್ರೀಯ ನಮ್ಮೆ' ಎಣ್ಣೆತ್ ಪರಿಗಣನೆ ಮಾಡಿತ್. ಜನವರಿ 26ಂಗೆ ಪ್ರತಿಕಾಲ ಭಾರತತ್‌ರ ರಾಜಧಾನಿ ನವದೆಹಲಿಲ್ ಪಲತರ ಕಾರ್ಯಕ್ರಮ ನಡ್‌ತುವ. ಪೊರದೇಶತ್‌ಂಜ ಬೆಂದು ಚಂಜಾದಿಯ ಬಪ್ಪ. ಅಯಿಂಡ ಮಿಂಇಲ್ ಡೆಲ್ಲಿರ ರಾಜ್‌ಪಥ್‌ಲ್‌ಂಜ ನಂಗಡ ದೇಶತ್‌ರ ಆಚಾರ-ವಿಚಾರ, ಆಯಿಮೆ-ಕೊಯಿಮೆ, ಸಂಸ್ಕಾರ-ಸಂಸ್ಕೃತಿ ಎಲ್ಲ ಉಳ್ಳನ್ನತ ಕಾರ್ಯಕ್ರಮ ಪ್ರದರ್ಶನತ್‌ರ ಮೆರವಣಿಗೆ ನಡ್‌ಪ. ಮೆರವಣಿಗೆಲ್ ದೇಶತ್‌ಲ್ ಕಂಡ್‌ಪುಡ್‌ಚಿ ಪುದಿಯ ಶಸ್ತ್ರಾಸ್ತ್ರ, ವಿಜ್ಞಾನಕ್ ಸಂಬಂಧಪಟ್ಟ ಸಂಶೋಧನೆ ಇನ್ನತಾನೆಲ್ಲ ಪ್ರದರ್ಶನ ಮಾಡುವ. ರಂಗ್ ರಂಗಾನ ಕಾರ್ಯಕ್ರಮ ಇಡೀ ದೇಶತ್‌ರ ಜನಕ್ ಖುಷಿ ಕೊಡ್‌ಪ.

ರಾಜಕಾರಣಿಯ, ನಾಯಕಂಗೆ ಅಧಿಕಾರಿಯ ಸರಕಾರತ್‌ರ ಕೆಲಸ, ದೇವಡ ಕೆಲಸ ಎಣ್ಣೆತ್ ಮಾಡ್‌ಚಿಂಗಿ ಭಾರತತ್ ತುಳ್ಳಿ ಕಳಚಂಡುಳ್ಳ ಭ್ರಷ್ಟಾಚಾರತ್‌ನ ನೀಕಿತ್ ದೇಶತ್‌ನ ಇಂಇಚ್ಚಕ್ ಬೆರಿಯ ಅಭಿವೃದ್ಧಿ ಆನ ದೇಶತ್‌ರ ಪಟ್ಟಿಲ್ ಕಾಂಗಲು. ಅಂದಕವೇ ಗೌಜಿಲ್ ದೇಶತ್‌ಡೀ ನಡ್‌ತುವ ಗಣರಾಜ್ಯ ದಿನಾಚರಣೆಕ್ ಅರ್ಥ ಕೊಟ್ಟುವೊ.

## ಹುತಾತ್ಮಂಗಡ ದಿನ

1948ನೇ ಇಸವಿ ಜನವರಿ 30 ಬೊಕ್ಕಾಚಿ ಭಾರತ ದೇಶತ್ ಇತಿಹಾಸತ್ ಪುಟಲೋರ್ ಕರ್ತ ಚುಕ್ಕಿ. ಎಕ್ಕೊಲು ಏವನ್ನೆ ಪೊಲಾಕ ನೇರ್ತೆ 3.30 ಗಂಟೆಕ್ ಎದ್ಡ ಗಾಂಧೀಜಿ ಪ್ರಾರ್ಥನೆ ಮಾಡಿತ್ ದೇಶತ್ ರಾಜಕಾರಣ ಎನ್ನನೆ ಇರಂಡೂಂದ್ ಲೇಖಿನ ಎಳ್ಳಿತ್ ಬೆಚ್ಚತ್. ರಾಜಕೀಯ ಸ್ವಾತಂತ್ರ್ಯ ಕ್ವೆಟ್ವೆಚಿಂಗಿ ಪೋರ. ಆರ್ಥಿಕ, ಸಾಮಾಜಿಕ, ನೈತಿಕ ಕ್ರಾಂತಿ ಆಂಡೂಂದ್ ಅಭಿಪ್ರಾಯ ಪಟ್ಟಿತಿಂಜತ್. ಇಡೀ ದಿನ ಪುರಸೊತ್ತಿಲ್ಲತೆ ಕಾರ್ಯಕ್ರಮ ಇಪ್ಪಯಿಂಜತ್. ನಾಲ್ ಗಂಟೆಕ್ ಸರ್ದಾರ್ ವಲ್ಲಭಭಾಯಿ ಪಟೇಲ್ ಕೂಡ ತಕ್ಕ್ ಬಾಕ್ ಇಂಜತ್. ಕಾಂಗ್ರೆಸ್ ಸಂಸ್ಥೆನ ವಿಸರ್ಜನೆ ಮಾಡಂಡು. ಲೋಕಸೇವಾ ಸಂಘ ರಚನೆ ಮಾಡಂಡು. ಇಲ್ಲೇಂಗಿ ದೇಶ ಸೇವೆಕಿಂಜ ಅಧಿಕಾರತ್ ಆಸೆ ಜಾಸ್ತಿ ಆಪಾಂದ್ ಗಾಂಧೀಜಿರ ಅಭಿಪ್ರಾಯ ಆಯಿತಿಂಜತ್. ತಕ್ಕ್ಬಾಕ್ ಅಳ್ತಾಂಗ್ ಎಕ್ಕೊಲು ಅಂಜಿಗಂಟೆಕ್ ಬಿರ್ಲಾ ಭವನತ್ ನಡಪನ್ನತ ಪ್ರಾರ್ಥನಾ ಸಭೆಕ್ ಪತ್ ನಿಮಿಷ ತಡ ಆಚಿ. ಆಭಾ ಗಾಂಧಿ, ಮನು ಗಾಂಧಿ ದಂಡಾಳ್ ರ ನಿಪ್ಪಕ್ ಕೈ ಬೆಚ್ಚಂಡ್ ಗಾಂಧೀಜಿ ಪ್ರಾರ್ಥನಾ ಸಭೆಕ್ ಬಾತ್. ಜನ ದುಂಬಿತಿಂಜತ್. ಅದೇ ಸಮಯಕ್ 'ಯಮ' ನಾಥೂರಾಮ್ ಗೋಡ್ಡೆ ಎಣ್ಣುವ ಬಾಲೆಕಾರಂಡ ರೂಪತ್ ಗಾಂಧೀಜಿರ ಎದಿಕೆ ನಿಂದತ್. ಕಾಲ್ ಪುಡ್ಚಿತ್ ಕೈ ತೊತ್ತಿತ್ ಗಾಂಧೀಜಿರ ಎದೆಕ್ ಮೂಂದ್ ಬೊಡಿ ಬೆಚ್ಚತ್. 'ಹೇ ರಾಮ್' ಎಣ್ಣುವದೊಂದೇ ಕೇಟಿ, ಗಾಂಧೀಜಿರ ಪ್ರಾಣಪಕ್ಷಿ ಪಾರಿಪೋಚಿ. ಇಡೀ ದೇಶ ಇರ್ವೆಟ್ ಕೂಡ್ಚಿ. ಗಾಂಧೀಜಿ ಹುತಾತ್ಮನಾಚಿ. ಜನವರಿ 30 ಹುತಾತ್ಮ ದಿನಾಂದ್ ಆಚರಣೆ ಮಾಡುವಕಾಚಿ. ಇದಂಡ ಬಯ್ಯಲುಳ್ಳ, ತ್ಯಾಗ, ಬಲಿದಾನ ಇಂದೆತ ಬಾಲೆಕಾರಕ್ ಬಟ್ಟೆ ಬೊಳಿ ಆಂಡು.

ಫೆಬ್ರವರಿ 14

## ವ್ಯಾಲೆಂಟೈನ್ಸ್ ಡೇ

ಫೆಬ್ರವರಿ 14ಲ್ ವ್ಯಾಲೆಂಟೈನ್ಸ್ ಡೇ ಎಣ್ಣೆತ್ ಆಚರಣೆ ಮಾಡುವ. ಕಣ್ಣಂಗ ಅಲ್ಲೇಂಗಿ ಮೂಡಿಯ ತಂಗಡ ಕೊದಿನ ಒಬ್ಬಂಗೊಬ್ಬಂಗ್ ಅರಿಚಿಡುವ ದಿನ, 'ಕೊದಿಪಯಿಂಡ ದಿನ' (ಪ್ರೇಮಿಗಳ ದಿನ) ಗೌಜಿ ಮಾಡುವ ದಿನ. ಇದ್ ನಂಗಕ್ ಸಾಮಾನ್ಯವಾಯಿತ್ ಗೊತ್ತುಳ್ಳ ವ್ಯಾಲೆಂಟೈನ್ಸ್ ಡೇ.

ಆಚೆಂಗಿ ನೇವಾನ ವ್ಯಾಲೆಂಟೈನ್ಸ್ ಡೇ ಎನ್ನನೆ ಶುರುವಾಚೀಂದ್ ನಿಂಗಕ್ ಗೊತ್ತಂಡಾ? ವ್ಯಾಲೆಂಟೈನ್ಸ್ ಎಣ್ಣುವ ದಂಡ್ ಕ್ರಿಶ್ಚಿಯನ್ ಸಂತಂಗ ಹುತಾತ್ಮಂಗಲಾನನ್ನತ ಸಂದರ್ಭತ್‌ನ ಗೇನ ಮಾಡಿಯೋವಕಾಯಿತ್ ಶುರು ಮಾಡ್‌ನ ಒರ್ ಆಚರಣೆ ಇದ್. ಅಯಿಂಗ ದಂಡಾಳೂ ಮಾನವ ಜನಾಂಗತ್‌ನ ಕೊದಿಪ ವಿಷಯತ್‌ನ ಜನಡಲ್ಲಿ ಬಿತ್ತುವಕ್ ನೋಟ್‌ನಯಿಂಗ. ಇನ್ನತ ದಿನತ್‌ರ ಅರ್ಥವೇ ಬದಲಾಪನ್ನನೆ ಮಧ್ಯಕಾಲತ್ ಚೆಪ್ಪಿ ಚಾಸರ್ (Geoffrey Choucer)ರ ಕಾಲತ್ ಆಣ್ ಪೊಣ್ಣಾರ ಮಧ್ಯತ್‌ರ ಕೊದಿನ ಶುಭಾಷಯ ಬಯಂದೋವ ಮೂಲಕ ಆಚರಣೆ ಮಾಡುವದ್ ಶುರುವಾಚಿ. ಪತ್ತೊಯಿಂಬದನೆ ಶತಮಾನತ್‌ರ ಮಧ್ಯ ಭಾಗತ್‌ಲಿಂಜಿ ಈ ದಿನತ್‌ರ ಆಚರಣೆ ಅದಿ ಆಚಿ.

ವ್ಯಾಲೆಂಟೈನ್ಸ್ ಡೇಕೆ ಅಯೆಪನ್ನತ ಶುಭಾಶಯ ಪತ್ರ ಒರ್ ಕಾಲಕ್ ಒರ್ ಬಿಲಿಯನ್ ಖರ್ಚಾಪಾಂದ್ ಅಂದಾಚ್ ಮಾಡಿತ್. ಕೇವಲ ಪೊರದೇಶತ್ ಆಚರಣೆ ಮಾಡಿಯಂಡಿಂಜ ಈ ದಿನತ್‌ರ ಆಚರಣೆ ಇಕ್ಯ ನಂಗಡ ದೇಶ, ಊರ್, ನಾಡ್‌ಕೂ ಬಂದೆತ್ತಿತ್. ಬಾಲೆಕಾರ ಕಣ್ಣಮಕ್ಕ, ಮೂಡಿಮಕ್ಕಕ್ ಇಂದ್ ಇದೋರ್ ಫ್ಯಾಷನ್ ಆಯಿಪೋಯಿತ್. ಫೆಬ್ರವರಿ 14 ಬಪ್ಪಕಾಪಕ ಕೆಲವು ಜನ ಆಚರಣೆರ ಪರವಾಯಿತೂ ಕೆಲವು ಜನ ವಿರೋಧವಾಯಿತೂ ತಕ್ ಪರಿವ. ಭಾಷಣ ಮಾಡುವ, ಫೆಬ್ರವರಿ 15, 16ಂಗ್ ಇದೆಲ್ಲ ಮರ್‌ಂದ್ ಪೋಪ. ಪುನಃ ಇಂಇಶೋರ್ ಕಾಲ ಪದ್‌ನಾಲನೆ ತಾರೀಖ್ ಬಪ್ಪಕಲೇ ಇದಂಡ ವಿಷಯ ಪರಿವೊ. ಬಾಲೆಕಾರ ಮಕ್ಕಕ್ ವ್ಯಾಲೆಂಟೈನ್ಸ್ ಡೇ ಎಕ್ಯಾಂದ್ ಗೊತ್ತಿಪ್ಪ. ಆಚೇಂಗಿ ಫಾದರ್ಸ್ ಡೇ, ಮದರ್ಸ್ ಡೇ, ಯೂತ್ ಡೇ ಇದೆಲ್ಲ ಎಕ್ಯ ಆಚರಣೆ ಮಾಡುವಾಂದಾಡ್ ಎನ್ನಂಗ್ ಆಚರಣೆ ಮಾಡುವಾಂದಾಡ್ ಗೊತ್ತಿಪ್ಪಲೆ.

ಇದೇ ಆಚರಣೆನ ಮನುಷ್ಯ ಮನುಷ್ಯಂಡ ಮಧ್ಯತ್‌ರ ಪ್ರೀತಿಕಾಯಿತ್ ಆಚರಣೆ ಮಾಡಿತುಂಡೇಂಗಿ ಎಚ್ಚಕೋ ಕೊಲ್ಲ್, ಕೊಲೆ, ಅತ್ಯಾಚಾರ ಅನಾಚಾರ ಕಮ್ಮಿ ಆಪಕಿಂಜತೆನ್ನೋ.

ಫೆಬ್ರವರಿ 21

## ಅಂತರ್ರಾಷ್ಟ್ರೀಯ ಅವ್ವ ಭಾಷೆರ ದಿನ

ಯುನೆಸ್ಕೋ (Unesco) ನವೆಂಬರ್ 17, 1999ಲ್ ಫೆಬ್ರವರಿ 21ನೆ ಅಂತರ್ರಾಷ್ಟ್ರೀಯ ಅವ್ವ ಭಾಷೆರ ದಿನಾಂದ್ ಆಚರಣೆ ಮಾಡಂಡೊಂದ್ ತೀರ್ಮಾನ ಮಾಡ್‌ಚಿ. ಈ ದಿನತಾರ ಆಚರಣೆ ವಿಶ್ವಸಂಸ್ಥೆ (UNO)ಂಜ ಮಾನ್ಯತೆ ಪಡ್‌ಂದದಾಯಿತುಂಡ್. ಇದಂಡ ಮೂಲ ಉದ್ದೇಶ ಪ್ರಪಂಚತಲುಳ್ಳ ಫಲತರತಾರ ಭಾಷೆ, ಸಂಸ್ಕೃತಿನ ಬೊಳ್‌ತುವದಾಯಿತುಂಡ್. 1952ಲ್ ಬಾಂಗ್ಲಾದೇಶತಾರ ಧಾಕಾತ್ ಪಾಕಿಸ್ತಾನತಾರ ಪೋಲಿಸ್ ಪಿಂಞ ಸೈನ್ಯ ಬಂಗಾಳಿ ತಕ್ಕ್ ಪರಿವ ಸುಮಾರ್ ಜನಳ ಕರುಣೆ ಇಲ್ಲತೆ ಕೊಂದತ್. ಅಯಿಂಗಡ ಗೇನತ್ 1952 ಲಿಂಜ ನಡ್‌ತಿಯಂಡಿಂಜ ಭಾಷಾ ಚಳುವಳಿಯೇ ಈ ಆಚರಣೆರ ಮೂಲ ಆಯಿತುಂಡ್.

ಅವ್ವ ಭಾಷೆನ ಬೊಳ್‌ತುವ ಉದ್ದೇಶತ ವಿಶ್ವಸಂಸ್ಥೆಯೇ ಈ ಆಚರಣೆಕ್ ಮಾನ್ಯತೆ ಕೊಡ್‌ತಿಪ್ಪಕ, ಪ್ರತಿಯೋರ್ ಜನಾಂಗವು ಅಯಿಂಡಯಿಂಡ ಅವ್ವ ಭಾಷೆನ ಪೋತುವದ್ ಅಯಿಂಡೆಲ್ಲಡ ಆದ್ಯ ಕರ್ತವ್ಯ. ಮನುಷ್ಯ ಎಚ್ಚಕೇ ಭಾಷೆ ಪಡಿಚಿಕೊ ಅವ್ವ ಭಾಷೆನ ಮರ್‌ಪಕಾಗ. ಪೆತ್ತವ್ವನ ಮರ್‌ಪದೂ ಒಂದೇ, ಅವ್ವ ಭಾಷೆನ ಮರ್‌ಪದೂ ಒಂದೇ. ಆಚೀಂಗಿ ಇಂದ್ ಇನ್ನತ ಸಲಹೆ ಎಲ್ಲ ಸುಮಾರ್ ಬಾಲೆಕಾರ ಮಕ್ಕಕ್ ತಮಾಷಿ ಆಯಿತ್ ಕಾಂಬ. ಪೆತ್ತವ್ವನೇ ಬೋಂಡತಾನನ್ನತ ಈ ಕಲಿ ಕಾಲತ್ ಅವ್ವ ಭಾಷೆನ ಮರ್‌ಪ ವಿಷಯ ಬಲ್ಯದೊಂದೂ ಅಲ್ಲ. ಏದೇ ಸಂಸ್ಕೃತಿ, ಕಲೆ, ಭಾಷೆ ಮಿಂಞಕ್ ಬರಂಡೊಂದಾನಕ ಅದ್‌ನ ಪೆರಿಯಯಿಂಗ ಮಕ್ಕಕ್ ಎಣ್ಣಿಕೊಡ್‌ಕಂಡು. ಅಯಿಂಗ ಅಯಿಂಡ ಮಕ್ಕಕ್ ಅದ್‌ನ ಎತ್ತ್‌ಚಿಡಂಡು. ಅಕ್ಕ ಕಲೆ, ಭಾಷೆ, ಸಂಸ್ಕೃತಿ ಎಲ್ಲ ಉಳಿವ, ಬೊಳಿವ. ಒರ್ ದಿನತಾರ ಮಟ್ಟಿಕೆ, ಒರ್ ಸಮಾರಂಭತಾರ ಮಾದರಿ ಏದೇ ಒರ್ ದಿನತಾನ ಆಚರಣೆ ಮಾಡುವಾತ್ ಏದೂ ಅರ್ಥ ಇಲ್ಲೆ. ಎಲ್ಲರೂ ನಂಗಡ ಅವ್ವ ಭಾಷೆನ ಮರ್‌ಕತೆ ಪರಿಯನ, ಮಕ್ಕಕೂ ಎಣ್ಣಿಕೊಡ್‌ಕನ.

## ವಿಶ್ವ ಪೊಮ್ಮಕ್ಕಡ ದಿನ

ಪ್ರತಿ ಕಾಲ ಮಾರ್ಚ್ 8ಂಗೆ ಪ್ರಪಂಚತರ ಏರ ಭಾಗತ ಪೊಮ್ಮಕ್ಕಡ ದಿನತನ ಆಚರಣೆ ಮಾಡುವ. ಇದೊಂಡ ಮೂಲ ಉದ್ದೇಶ ಪೊಮ್ಮಕ್ಕಡ ಹಕ್ಕನ ಕಾಪಾಡ್‌ವದ್, ಅಯಿಂಗಕ್ ಸಮಾನ ಅವಕಾಶ ಕೊಡ್‌ಪದ್. ಕೆಲವು ಜಾಗತ ಈ ದಿನತನ ವ್ಯಾಲೆಂಟೈನ್ಸ್ ಡೇರ ಮಾದರಿಯೋ, ಅವ್ವ ದಿನ (Mother's day)ತರ ಮಾದರಿಯೋ ನಡ್‌ತುವದುಂಡ್. 1910ಲ್ ಕ್ಯಾರಾಚೆಚ್ಚನ್ ಎಣ್ಣುವವು ಮಾರ್ಚ್ 8ಂಗೆ ಪೊಮ್ಮಕ್ಕಕ್ ಮತದಾನ ಹಕ್ಕ ಕೇಟನ್ನತ ದಿನ.

ವಿಶ್ವ ಪೊಮ್ಮಕ್ಕಡ ದಿನತರ ಆಚರಣೆ, ವಿಶ್ವಸಂಸ್ಥೆ ಲಿಂಜ ಮಾನ್ಯತೆ ಪಡ್‌ಂದಿತ್. ಆಚರಣೆರ ಮೂಲ ಉದ್ದೇಶ ಆರ್ಥಿಕವಾಯಿತೂ ಸಾಮಾಜಿಕ ವಾಯಿತೂ, ರಾಜಕೀಯವಾಯಿತೂ ಎಲ್ಲ ಕ್ಷೇತ್ರತೂ ಪೊಮ್ಮಕ್ಕಡ ಹಕ್ಕನ ಕಾಪಾಡುವದ್, ಅಯಿಂಡ ಅಭಿವೃದ್ಧಿಕ್ ಕಷ್ಟ ಪಡುವದೂ ಆಯಿತುಂಡ್.

ಪ್ರತಿ ಕಾಲ ಮಾರ್ಚ್ 8ಂಗೆ ಈ ಪೊಮ್ಮಕ್ಕಡ ದಿನ ಆಚರಣೆ ಮಾಡುವ, ಭಾಷಣ ಮಾಡುವ, ಸಾಧನೆ ಮಾಡ್‌ನ ಪೊಮ್ಮಕ್ಕಕ್ ಪ್ರಶಸ್ತಿ ಕೊಡ್‌ಪ, ಕಳಿಕೂಟ, ಮೋಪ್ ಕೂಟ ಎಲ್ಲ ನಡ್‌ತಿತ್ ಆಚರಣೆ ಎಣ್ಣುವ ಸಮಾರಂಭತನ ತೇಪ. ಏದೇ ಒರ್ ಆಚರಣೆ ಒರೇ ದಿನತರ ಮಟ್ಟಿಕೆ ನಡ್‌ಪನ್ನತದಾ? ಅದಂಡ ಉದ್ದೇಶ, ಸಾರ್ಥಕತೆ ಇದಲ್ಲ ಗೇನ ಮಾಡುವದೇ ಬೇಂಡವಾ? ಪೊಮ್ಮಕ್ಕಕ್ ಸ್ಥಾನ ಮಾನ ಕೊಡ್‌ಕಂಡು. ಅಯಿಂಗಳ ಆಣ್‌ಕ್ ಸರಿಸಮಾನ ಆಯಿತ್ ಕಾಂಗಂಡೂಂದೆಲ್ಲ ಮಾರ್ಚ್ ಎಟ್ಟಾಂಗ್ ಭಾಷಣೋಡ್ ಭಾಷಣ ನಡ್‌ಪ. ಪಿತ್ಯಾಂದ್ ಪತ್ರಿಕೆಲ್ ಪೊಮ್ಮಕ್ಕಡ ದಿನ ನಡ್‌ತನ ಸಭೆರ ವಿವರ ಪತ್ರಿಕೆರ ಮಿಂಞಾತರ ಪಾಳೆಲ್ ಇಂಜಕ ಬಯ್ಯತ ಪಾಳೆಲ್ ಅತ್ಯಾಚಾರ, ಡೌರಿ -ಚಾವು ಇನ್ನತದೆಲ್ಲ ಇಪ್ಪ. ಪತ್ರಿಕೆಲ್ ಪ್ರಕಟ ಆಕತ ಶೋಷಣೆ ಇಂಞಿಚ್ಚಕ್ ಇಪ್ಪೊ ದಾರ್‌ಕ್ ಗೊತ್ತ್?

ಇನ್ನನಾಚೇಂಗಿ 'ಪೊಮ್ಮಕ್ಕಡ ದಿನ' ನಡ್‌ತುವಾತ್ ಎಂತ ಅರ್ಥ? ಮಿಂಞಿಲ್ಲ ಬಾಲೆಕರ್ತಿ ಮೂಡಿಯ-ಪೊಣ್ಣಾಳ್ ಇನ್ನತಯಿಂಡ ಮೀದ ಅತ್ಯಾಚಾರ ನಡ್‌ಂದ ವಿಷಯ ಇಪ್ಪಯಿಂಜತ್. ಇಂದ್ ದಂಡ್, ಮೂಂದ್ ಬಯ್ಯತರ ಪಾಕುಂಞಿಯಡ ಮೇಲೆ ಅತ್ಯಾಚಾರಾಂದ್ ಇಪ್ಪ. ಅಯಿಂಗಳ ಪ್ರಾಣಿಯಾಂದೆಣ್ಣಕ ಪ್ರಾಣಿ ಕುಲಕೇ ಅವಮಾನ. ಈ ತರತರ ಘಟನೆ ನಡ್‌ಪಾತ್ ಪೊಮ್ಮಕ್ಕಡ ಪಾಲೂ

ಚನ್ನಂಗ್ ಉಂಡ್‌ಂದಾಪ. ಇಂದ್ ಏದೇ ಒರ್ ಸಿನೆಮಾ, ಜಾಹೀರಾತ್ ನೋಟಿ ಅದ್‌ಲಿಪ್ಪ ರೂಪದರ್ಶಿಯಡ ಮೇಲ್ ದುಂಬ ಬಟ್ಟೆ ಕಾಂಬದೇ ಅಪರೂಪ. ಒರ್ ಪೊಣ್ಣ್ ಇಡೀ ಪೊಣ್ಣ್ ಕುಲತ್‌ರ ಪ್ರತೀಕ. ಒರ್ ಪೊಣ್ಣ್ ಅರೆ ಬೆತ್ತಲೆ ಕಾಂಬ್‌ಚಿಟ್ಟವದ್ ಇಡೀ ಪೊಣ್ಣ್ ಕುಲಕೇ ಅವಮಾನ. ಅವಕಾಶ ಪಡೆವಕಾಯಿತ್ ಪೊಣ್ಣ್ ಬಟ್ಟೆ ಉತ್ತಂಡುವಾ? ಅರೆಬೆತ್ತಲೆ ಬಟ್ಟೆ ಇಡುವದ್ ಸಂಸ್ಕೃತಿಯಾ? ಅದೇ ಆಣ್‌ರ ಉಡ್‌ಪ್ ನೋಟಿ ಪ್ಯಾಂಟ್, ಶರ್ಟ್, ಅದಂಡ ಮೇಲೆ ಒರ್ ಕೋಟ್, ಕೂಡ ಒರ್ ಟೈ ಎಣ್ಣೆಯಂಡ್ ಅವಶ್ಯಕತೆಕಿಂಜ ಜಾಸ್ತಿ ಬಟ್ಟೆ ಇಟ್ಟಿತಿಪ್ಪಲ್ಲ? ಮನುಷ್ಯಂಡ ವ್ಯಕ್ತಿತ್ವ ಶರೀರಕ್, ಬಟ್ಟೆಕ್ ಸಂಬಂಧಪಟ್ಟದಲ್ಲ. ಮನಸ್‌ಕ್ ಸಂಬಂಧಪಟ್ಟದ್, ತಾನ್ ಆಧುನಿಕ ಕಾಲಕ್ ಕೂಡ್‌ನವಾಂದ್ ಕಾಟುವಕ್ ಪಾದಿ ಪಾದಿ ಬಟ್ಟೆ ಇಡುವೊ ಅಲ್ಲ. ಆಧುನಿಕ ಚಿಂತನೆ ಬೋಂಡು.

ಇಂಇಂದ್, ಪೊಣ್ಣ್‌ರ ತಾಳ್ಮೆ. ಪೊಣ್ಣ್‌ನ ಭೂಮಿಕ್ ಹೋಲ್‌ಚಿಟ್ಟಂಡ್, ಅವ ತಾಳ್ಮೆಲೇ ಇಪ್ಪನ್ನಕೆ ಮಾಡುವ ಈ ಸಮಾಜ. ಅಕ್ಕು ತಾಳ್ಮೆ ಬೋಂಡು, ಆಚೀಂಗಿ ಮೇಲ್‌ಕ್ ಸೀಮೆಣ್ಣೆ ತೊರ್‌ಂಜಿತ್ ಕಡ್ಡಿ ಗೀರಣೆಕೂ ತಾಳ್ಮೆ ಎಡ್ತೊವೊ ಅಲ್ಲ. ಅದ್‌ನ ತಾಳ್ಮೆ ಎಣ್ಣಲೆ. ದೌರ್ಬಲ್ಯ ಎಣ್ಣವ. ಏದೇ ಆಚರಣೆಯೂ ಭಾಷಣಕ್ ಮಾತ್ರ ಸೀಮಿತ ಆಕತೆ ಅದಂಡ ಮೂಲ ಉದ್ದೇಶ ಗುರಿ ಸಾಧನೆ ಆಂಡು. ಪ್ರತಿ ದಿನ, ಪ್ರತಿ ಮನೆಲೂ ಆಚರಣೆಕ್ ಬರಂಡು. ಅಂದಕ ಮಾತ್ರವೇ ಏದೇ ಆಚರಣೆಕೂ ಒರ್ ಅರ್ಥ ಬಪ್ಪೊ.

## ವಿಶ್ವ ಗ್ರಾಹಕಂಗಡ ದಿನ

ವ್ಯಾಪಾರಸ್ಥ ಇಲ್ಲತೆ ಗ್ರಾಹಕಂಗ ಇಲ್ಲೆ, ಗ್ರಾಹಕನಿಲ್ಲತೆ ವ್ಯಾಪಾರಸ್ಥ ಇಲ್ಲೆ. ದಂಡಾಳೂ ಒರೆ ನಾಣ್ಯತಾರ ದಂಡ್ ಮೂಡ್ ಉಳ್ಳನ್ನಕೆ. ಆಚೇಂಗಿ ವ್ಯಾಪಾರಸ್ಥ ಎಕ್ಕ್ ಗ್ರಾಹಕಂಗ್ ವಂಚನೆ ಮಾಡುವಕ್ ನೋಟುವ ಅಲ್ಲಿಕ್ ದಂಡೂ ಕಡೆರ ಸಮ್ಮಂಧ ಪಾಳಾಪ. ಅದ್‌ಂಗಾಯಿತ್ ಪುಟ್ಟಿಯಂಡದ್ ಗ್ರಾಹಕಂಗಡ ವೇದಿಕೆ. (Consumer Forum) ಈ ವೇದಿಕೆಲುಳ್ಳ ನ್ಯಾಯವಾದಿಯ ತಪ್ಪು ಸೆರಿಸ ಅರಂಜಿತ್ ನ್ಯಾಯ ಕೊಡ್‌ಪ. ಗ್ರಾಹಕಂಗ್ ಅನಾವಶ್ಯ ಪಣ, ಸಮಯ ಪಾಳಾಪಕಾಗ ಎಣ್ಣುವ ಉದ್ದೇಶತ್ ಈ ವೇದಿಕೆ ಕೆಲಸ ಮಾಡುವ. ಇದೇ ಹಿನ್ನೆಲೆಲ್ ವಿಶ್ವ ಗ್ರಾಹಕಂಗಡ ದಿನತ್‌ನ ಆಚರಣೆ ಮಾಡುವ.

ಗ್ರಾಹಕ ತಾನ್ ಎಡ್‌ಪ ವಸ್ತುರ ಬಗ್ಗೆ ಪೂರ್ತಿ ವಿವರ ಅರಿಂಜಂಡ್ ಎಡ್‌ಕಂಡು. ಎಡ್‌ತ ವಸ್ತುಕ್ ಬಿಲ್ಲ್ ಕೇಟವಂಡು. ತಾನ್ ಎಡ್‌ತ ವಸ್ತು ನಕಲಿ ಆಚೇಂಗಿ, ಇಲ್ಲೆ ಗ್ಯಾರಂಟಿ ಕೊಡ್‌ತ ಸಮಯಕ್ ಮಿಂಗಳೇ ಪಾಳಾಚೇಂಗಿ ಬಿಲ್ ಗ್ಯಾರಂಟಿ ಕಾರ್ಡ್ ಎಡ್‌ತಂಡ್ ವ್ಯಾಪಾರಸ್ಥಂಡಲ್ಲಿಕ್ ಪೋಂಡು. ಅನ್ನನೆ ಪೋನಲ್ಲಿ ವ್ಯಾಪಾರಸ್ಥ ಸಹಕಾರ ಕೊಡ್‌ಕತ ಪೋಚೇಂಗಿ ಗ್ರಾಹಕಂಗಡ ವೇದಿಕೆಕ್ ಅರಿಚಿಡುವಲು. ಅನ್ನತ ಸಂದರ್ಭತ್ ನ್ಯಾಯ ತೀರ್ಮಾನ ಮಾಡಿತ್ ಗ್ರಾಹಕಂಗ್ ಪರಿಹಾರ ತಪ್ಪಾಚಿಡುವ. ವ್ಯಾಪಾರಸ್ಥನೂ ಗ್ರಾಹಕಂಗಳೂ ಎಚ್ಚರ ಅಂಡೊಂದೆಣ್ಣುವದೇ ಈ ದಿನಾಚರಣೆರ ಉದ್ದೇಶ. ಉದ್ದೇಶ ಫಲಕಾರಿಯಾಡ್, ವ್ಯಾಪಾರಸ್ಥಂಗಡಲ್ಲಿ ಮೋಸ ವಂಚನೆ ದೂರಾಡ್ ಅನ್ನನಾಚೇಂಗಿ ಮಾತ್ರ ಈ ದಿನಾಚರಣೆ ನಡತ್‌ತಿತ್ ಫಲ ಕೊಟ್ಟುವೊ.



## ಮನುಷ್ಯಂಡ ರಂಗ್‌ರ ಆಧಾರತ್ ನಡ್‌ಪನ್ನತ ಅನ್ಯಾಯ ತಡ್‌ಪನ್ನತ ಅಂತರ್ರಾಷ್ಟ್ರೀಯ ದಿನ ವಿಶ್ವ ಅರಣ್ಯ ದಿನ

1960 ಮಾರ್ಚ್ 21ಲ್ ದಕ್ಷಿಣ ಆಫ್ರಿಕಾತ್ ಶಾರ್ಪ್‌ವಿಲ್ಲೆ ಎಣ್ಣುವ ಚಾಗತ್ ಕಾನೂನ್ ಪ್ರತಿಭಟನೆ ಮಾಡಿಯಂಡಿಂಜ 69 ಕರ್ತಜನಳ ಬೊಡಿ ಬೆಚ್ಚಿತ್ ಕೊಂದತ್. ಈ ಅಮಾನವೀಯ ಘಟನೆನ ಖಂಡನೆ ಮಾಡ್‌ನ ವಿಶ್ವಸಂಸ್ಥೆ ಆ ದಿನತ್‌ನ, ಕರ್ತ ಜನ, ಬೊಳ್‌ತ ಜನಾಂದ್ ರಂಗ್‌ರ ಆಧಾರತ್ ನಡ್‌ಪನ್ನತ ಅನ್ಯಾಯತ್‌ನ ಪೂರ್ತಿ ನಿಷ್ಪ್ರಾಚಿಡಂಡು ಎಣ್ಣುವ ಉದ್ದೇಶತ್ ಈ ದಿನತ್‌ನ ಆಚರಣೆ ಮಾಡುವಕ್ ವಿಶ್ವಸಂಸ್ಥೆ ಮಾನ್ಯತೆ ಕೊಡ್‌ತಿತ್.

1893ಲ್ ದಕ್ಷಿಣ ಆಫ್ರಿಕಾಕ್ ಪೋನನ್ನತ ಸಂದರ್ಭತ್ ಮಹಾತ್ಮ ಗಾಂಧಿಯೂ ಈ ಅನುಭವ ಪಟ್ಟಿತ್ ಎಣ್ಣುವಾನ ನಂಗ ಭಾರತೀಯಂಗ ಮರ್‌ಪನ್ನೆಕ್‌ಲ್ಲೆ. ಗಾಂಧೀಜಿ ಡರ್ಬಾನ್‌ಂಜ ಪ್ರಿಟೋರಿಯಾಕ್ ಟ್ರೈನ್‌ಲ್ ಫೆಸ್ಟ್‌ಕ್ಲಾಸ್ ಬೋಗಿಲ್ ಪೋಯಂಡಿಂಜತ್. ಚನ್ನಂಗ್ ದೂರ ಪೋಪದೂ ಮೆರಿಟ್ಸ್‌ಬರ್ಗ್ ಎಣ್ಣುವ ಸ್ಟೇಷನ್‌ಲ್ ಟ್ರೈನ್ ನಿಂದತ್. ಅಲ್ಲಿ ಪತ್ತನ ಒಬ್ಬ ಬೊಳ್ತಂವೊ ಗಾಂಧೀಜಿನ ಕಂಡಿತ್ ಈ ಕರ್ತ ಮನುಷ್ಯ ಉಳ್ಳ ಬೋಗಿಲ್ ನಾನ್ ಅಳಾಪ್‌ಲೆಂದ್ ಹರ ಮಾಡಿತ್ ಪೊಲೀಸ್‌ನ ಕಾಕಿತ್ ಗಾಂಧೀಜಿನೋ ಸಾಮಾನಡ್‌ಕ ಪ್ಲಾಟ್ ಫಾರ್‌ಂರ ಮೇಲೆ ಬಲ್‌ಚಿ ಕನ್‌ಚತ್. ಅಂದ್ ಬೈಟ್‌ಡಿ ಕೋಟಿತ್ ಅಲ್ಲಿಯೇ ಇಕ್ಕಂಡಿಯಾಚಿ. ಆ ಘಟನೆ ಅನ್ಯಾಯತ್‌ರ ವಿರುದ್ಧ ಪೋರಾಟ ಮಾಡುವಕ್ ಗಾಂಧೀಜಿಕ್ ಮೊಳಿಯಾಚಿ. ಕರ್ತಂವೊಂಗ್ ಕ್ಷೌರ ಮಾಡುಲೆಂದೆಣ್ಣಾಂಗ್ ತಾನೇ ಕ್ಷೌರ ಮಾಡಿಯೋವಕ್ ಶುರು ಮಾಡ್‌ನ ಗಾಂಧೀಜಿ ಸ್ವಾವಲಂಬನೆರ ಪಾಠ ಪಡ್‌ಚತ್.

ಮನುಷ್ಯ ಎಣ್ಣು ಪಿಂಞ ಅಂವೊ ಕರ್ತಂವೊ ಆಯಿತಿಕ್ಕು, ಬೊಳ್ತಂವೊ ಆಯಿತಿಕ್ಕು, ಮನುಷ್ಯತ್ವ ಮರ್‌ಪಕಾಗ. ಮಾನವ ಧರ್ಮಕ್ ಮಿಗಿಲಾನ ಧರ್ಮವೇ ಇಲ್ಲೆ. ನಂಗಡ ದೇಶತ್ ಎನ್ನನೆ ಅಲ್ಲಲ್ಲಿ ಇಕ್ಕಲೂ ಅಸ್ತುತ್ಯೆ ಉಂಡೊ ಅನ್ನನೇ ಬೊಳ್‌ತ ಜನ ಏರ ಉಳ್ಳ ದೇಶತ್ ಕರ್‌ತ ಜನಳ ಕಸಕ್ ಕಡೆಯಾಯಿತ್ ಕಾಂಬನ್ನತ ಪರಿಸ್ಥಿತಿ ಇಂಬಿತ್. ಇಕ್ಕ ಅಚ್ಚಕ್ ಇಲ್ಲತಿಕ್ಕು. ಆಚೇಂಗೂ ಕ್ಷೇರಮೆ ಉಂಡ್.

ಇಕ್ಕ ಅಮೇರಿಕಾತ್ ಅಧ್ಯಕ್ಷನೇ ಕರ್ತ ಜನಾಂಗಕ್ ಕೂಡ್‌ನಂವೊ ಆನಾಂಗ್ ಇದೋರ್ ಬಲ್ಯ ಕ್ರಾಂತಿಯೇ ಆಚಿ. ರಂಗ್‌ರ ಆಧಾರತ್ ಭೇದ-ಭಾವ ನಡ್‌ಕತಿರಡ್‌ಂದ್ ಶುರು ಮಾಡ್‌ನ ಈ ದಿನಾಚರಣೆ ಫಲ ಕಾಂಗಡ್. ಮಾನವ ಧರ್ಮ ಎಲಂಗಡ್.

ಈ ದಿನತ್‌ನ ವಿಶ್ವ ಅರಣ್ಯ ದಿನಾಂದೂ ಆಚರಣೆ ಮಾಡುವ. ಕಾಡ್ ಉಂಡೇಂಗಿ ನಾಡ್. ಅದ್‌ಂಗೇ ನಂಗಡ ಪೆರಿಯವು ಕಾಡ್‌ಕ್ ಅಚ್ಚಕ್ ಬೆಲೆ ಕೊಡ್‌ಪಯಿಂಜಿಯೆ. ಅದ್‌ಂಗಾಯಿತೇ 'ದೇವಡ ಕಾಡ್' ಎಣ್ಣಿವ ಪೆದತ್ ಕಾಡ್‌ನ ಉಳಿತಿಯೋವಕ್ ಪೇಚಾಡಿಯೆ. ಉಪನಿಷತ್‌ಲ್ ಒರ್ ತಕ್ಕ್ ಉಂಡ್. 'ಪತ್ತ್ ಕಣತರೆ ಒರ್ ಕೆರೆಕ್ ಸಮ. ಪತ್ತ್ ಕೆರೆ ಒರ್ ಸರೋವರಕ್ ಸಮ. ಪತ್ತ್ ಸರೋವರ ಒರ್ ಮೋಂವೊಂಗ್ ಸಮ, ಪತ್ತ್ ಮಕ್ಕ ಒರ್ ಮರಕ್ ಸಮ' ಇದ್‌ಲ್ ಒರ್ ಮರಕ್ ಎಚ್ಚಕ್ ಬೆಲೆ ಉಂಡ್‌ಂದ್ ಅರಿವಾಪ. ಒರ್ ಕಾಡ್‌ಲ್ ಇನ್ನತ ಮರ ಎಚ್ಚಕ್ ಇಪ್ಪ? ಕಾಡೂ ದೇಶಕ್ ಒರ್ ಆಸ್ತಿ. ಅದ್‌ಲ್ ಅಡಂಗಿತಿಪ್ಪ ಮರಕ್ ಬೆಲೆ ಕಟ್ಟುವಕೇ ಕಯ್ಯಲೆ. ಒರ್ ಮರ ಕೆತ್‌ಚೇಂಗಿ ಪತ್ತ್ ಮರ ನೆಡೊಂಡು. ಅದತ್ ಅಂಜಿ ಮರ ಆಚೇಂಗೂ ಬಲ್ಯದಾಚೇಂಗಿ ಪರಿಸರ ಸಮತೋಲನಕ್ ನಲ್ಲದ್.

## ವಿಶ್ವ ನೀರ್ ದಿನ

1992ಲ್ ವಿಶ್ವ ಸಂಸ್ಥೆರ ಆದನಲ್ ಬ್ರೆಜಿಲ್ ದೇಶತ್‌ರ ರಿಯೊ-ಡಿ-ಜನೈರೊ ಎಣ್ಣುವ ಜಾಗತ್ ಮಾರ್ಚ್ 22ಂಗ್ ವಿಶ್ವ ನೀರ್ ದಿನ ನಡತಂಡೊಂದ್ ತೀರ್ಮಾನ ಎಡತತ್. 'ಎಮ್ಮೆ ಚತ್ತಕ ಮೋರ್‌ರ ಪುಳಿ ಅರಿವೊ' ಎಣ್ಣನ್ನೆ ನೀರಿಲ್ಲತಾಪಕಲೇ ಅದೊಂಡ ಮಹತ್ವ ಗೊತ್ತಾಪೊ. ಬೆಲೆ ಇಲ್ಲತ ವಸ್ತುರ ಮಾದಾರಿ ನೀರ್‌ನ ಪೋಲ್ ಮಾಡುವಕಾಗ, ನೀರ್‌ರ ಉಪಯೋಗ ಸಮರ್ಪಕವಾಯಿತ್ ಆಂಡೊಂದೆಣ್ಣುವ ಉದ್ದೇಶತ್ ಈ ದಿನಾಚರಣೆ ಶುರು ಮಾಡ್‌ಚಿ. 2005ನೇ ಇಸವಿಲಿಂಜ 2015 ಕೆತ್ತನೆ 'ಜೀವನಕಾಯಿತ್ ನೀರ್' ಎಣ್ಣುವ ಘೋಷಣೆಲ್ ಈ ದಿನಾಚರಣೆ ಮಾಡುವ. 2006ನೇ ಇಸವಿಲ್ / ಯುನೆಸ್ಕೋ' ಸಂಸ್ಥೆ 'ನೀರ್ ಪಿಂಞ ಸಂಸ್ಕೃತಿ' ಎಣ್ಣುವ ಘೋಷಣೆರಡಿಲ್ ಆಚರಣೆ ಮಾಡಿತ್, 2007ನೇ ಇಸವಿಲ್ 'ನೀರ್‌ರ ಅಭಾವ ನೀಕುವ' ಘೋಷಣೆರಡಿಲ್ ಆಚರಣೆ ಮಾಡಿತ್. ನೀರ್ ಮನುಷ್ಯಂಗ್ ಪ್ರಕೃತಿರ ಬಲ್ಯ ಕೊಡುಗ್. ನೀರಿಲ್ಲತೆ ಏದೇ ಜೀವರಾಶಿಕೊ ಬದ್‌ಕುವಕ್ ಸಾಧ್ಯ ಇಲ್ಲೆ. ನೀರ್‌ರ ಸೆಲೆ ಉಂಡ್ ಎಣ್ಣೆಚಿಂಗಿ ಅಲ್ಲಿ ಜೀವ ಉಳ್ಳ ಸಾಧ್ಯತೆ ಉಂಡ್‌ಂದ್ ವಿಜ್ಞಾನಿಯ ತೀರ್ಮಾನ ಮಾಡುವ. ಇಕ್ಕಾಯಿತ್ ಚಂದ್ರಂಡ ಮೇಲೆ ನೀರ್ ಉಂಡ್ ಎಣ್ಣುವದ್ ಅರಂಜಿತ್ ಜನ ಎಲ್ಲ ಚಂದ್ರಂಡ ಬರಿಕ್ ಕುತೂಹಲತ್ ನೋಟಿಯಂಡುಂಡ್. ಕುಡಿಪಕ್, ಕುಳಿಪಕ್ ಅಲ್ಲತೆ ಮನೆರ ಅನೇಕ ಕಾರ್ಬಾರ್ಕ್ ನೀರ್ ಅವಶ್ಯ.

ನೀರುಳ್ಳ ಜಾಗತ್ ಜನ ನೀರ್‌ನ ಲೆಕ್ಕ ಇಲ್ಲತನ್ನೆಕೆ ಖರ್ಚಿ ಮಾಡುವ. ನೀರಿಲ್ಲತ ಮಣಪಟ್ಟಿಲ್ ಜನ ನೀರ್‌ನ ಪೊನ್ನೊಕಿಂಜ ಏರ ಮುತುವರ್ಜಿಲ್ ಖರ್ಚಿ ಮಾಡುವ. ಪಳೆಯ ಕಾಲತ್ ನೀರ್‌ಕೊ ಪಣತ್‌ರಚ್ಚೆಕೆ ಮಹತ್ವ ಕೊಡ್‌ಪಯಿಂಜತ್ ಎಣ್ಣುವದ್ ಅಯಿಂಡ ತಕ್ಕ-ಬಾಕ್‌ಲ್ ಗೊತ್ತಾಪಯಿಂಜತ್. ಜಾಸ್ತಿ ನೀರ್ ಖರ್ಚಿ ಮಾಡ್‌ಚೇಂಗಿ ಮನೆಲುಳ್ಳ ಪಣವೊ ಜಾಸ್ತಿ ಖರ್ಚಿಪಾಂದ್ ಎಣ್ಣುವಯಿಂಜತ್. ನೀರ್ ಖರ್ಚಿ ಮಾಡ್‌ನಚ್ಚೆಕೊ ಮನೆಕ್ ದರಿದ್ರ ಬಪ್ಪಾಂದೆಣ್ಣುವಯಿಂಜತ್. ಇದೆಲ್ಲ ನೀರ್‌ರ ಖರ್ಚಿನ ಕಮ್ಮಿ ಮಾಡುವಕಾಯಿತ್ತಲ್ಲತೆ, ನೀರ್‌ರ ಮಹತ್ವ ಅರಿವಕಾಯಿತ್ತಲ್ಲತೆ ಬೋರ ಒಂದೊ ಅಲ್ಲ. ನೀರ್‌ನ ಕಮ್ಮಿ ಖರ್ಚಿ ಮಾಡಿಯಂಡ್ ಮಳೆ ನೀರ್‌ನ ಪಾಳಾಕತೆ ಅದ್‌ನೋ ಸಹ ಬಳಸಿಯಂಡ್ ಅಂತರ್ಜಲ ಮಟ್ಟಿತ್‌ನ ಜಾಸ್ತಿ ಆಪನ್ನೆಕೆ ಮಾಡಿಯಂಡತೇಂಗಿ ಮಕ್ಕಡ ಕಾಲಕ್ ಕುಡಿಪಕೇಂಗಿ ನೀರ್ ಕೊಟ್ಟುವ. ಇಲ್ಲೇಂಗಿ ಅದೊ ಇಲ್ಲೆ. ನೀರ್ ಮನುಷ್ಯಂಗ್ ಪ್ರಕೃತಿರ ಒರ್ ಅಮೂಲ್ಯ ಮೊದ. ಅದ್‌ನ ಕಾಪಾಡಿಯೋವದ್ ಪ್ರತಿಯೊಬ್ಬ ಮನುಷ್ಯಂಡ ಕರ್ತವ್ಯ.

## ವಿಶ್ವ ಹವಾಮಾನ ದಿನ

ನಂಗಡ ಭೂಮಿರ ವಾತಾವರಣತ್ ಎಂತೆಲ್ಲ ಬದಲಾಪ ಎಣ್ಣುವಾನ ಮಿಂಗಳೆ ಅರಿವಕ್ ಹವಾಮಾನ ಇಲಾಖೆ ಸುಮಾರ್ ಕಾರ್ಯಕ್ರಮ ಇಟ್ಟಿಂಡಿತ್. ಈ ಇಲಾಖೆಕ್ ಸಹಾಯ ಮಾಡ್ವಕ್ ದೇಶತ್ಂಜ ಸುಮಾರ್ ಉಪಗ್ರಹತ್ನ ಆಕಾಶಕ್ ಅಯೆಚಿತ್, ಈ ಉಪಗ್ರಹ ಭೂಮಿಲುಳ್ಳ ಸ್ಪೇಷನ್ಕ್ ವಿವರೊಡೆ ಪೋಟೋ ಅಯೆಪ. ಹವಾಮಾನ ಇಲಾಖೆಕ್ ಸಮ್ತಂಧಪಟ್ಟಿ, ವಿಜ್ಞಾನಿಯ, ತಂತ್ರಜ್ಞಂಗ, ಭೂಮಿಕ್ ಬಪ್ಪನ್ನತ ಕೇಡ್ನೆಲ್ಲ ಅಂದಾಜ್ ಮಾಡಿತ್ ಜನಕ್ ಎಣ್ಣುವ. ಭೂಕಂಪ, ತ್ಸುನಾಮಿ, ಮಳೆ, ಗಾಳಿ, ಕೋಟಿ ಇನ್ನತ ವಿವರ ಎಲ್ಲ ಕ್ಟ್ಟುವ. ಅದನಗುಂಡ್ ರೈತಂಗಕ್, ಮೀನ್ ಪುಡಿಪಯಿಂಗಕ್, ಪೈಲಟ್ವಕ್ ಇಂಗಳೂ ಸುಮಾರ್ ಜನಕ್ಕೆಲ್ಲ ಸಹಾಯ ಆಪ. ಆಪನ್ನತ ಕಷ್ಟ-ನಷ್ಟತ್ನ ಚೆನ್ನಂಗಾಚೆಂಗೂ ತಪ್ಪೆಚಿಡಲು.

ಜನಕ್ ಈ ಹವಾಮಾನ ವಿವರ ಎಚ್ಚಕ್ ಮುಖ್ಯ ಎಣ್ಣುವಾನ ಅರಿವಿಕೆ ಕೊಡ್ಪಕಾಯಿತ್ ವಿಶ್ವ ಸಂಸ್ಥೆ ಈ ವಿಶ್ವ ಹವಾಮಾನ ದಿನತ್ನ ಆಚರಣೆ ಮಾಡುವ ನಿರ್ಧಾರ ಮಾಡಿತ್.

## ವಿಶ್ವ ಕ್ಷಯರೋಗ ನಿವಾರಣಾ ದಿನ

ವಿಶ್ವ ಕ್ಷಯರೋಗ ನಿವಾರಣಾ ದಿನ ಆಚರಣೆ ಮಾಡುವ ಉದ್ದೇಶ ಜನದಲ್ಲಿ ಅರಿವಿಕೆ ಬೆಳೆಸುವುದು. ಕ್ಷಯ ಅಥವಾ ಟಿ.ಬಿ. ಎಣ್ಣುವ ಖಾಯಿಲ ಎನ್ನಿಂಗ್ ಬಪ್ಪೊ, ಅದಿಂಗ್ ಎಂತ ಮದ್ದ್ ಇದೆಲ್ಲ ವಿವರ ಪ್ರತಿ ಜನಕೂ ಅರಿವಿಕೆ ಕೊಡ್ಪದ್ ಈ ದಿನಾಚರಣೆರ ಉದ್ದೇಶ. ಈ ಕ್ಷಯ ರೋಗಕ್ ಮದ್ದ್ ಕಂಡ್ಪುಡಿಪಾಂಗ್ ಮಿಂಞ ಒರ್ ಕಾಲಕ್ 1.6 ಮಿಲಿಯನ್ ಜನ ಈ ರೋಗತಿಂಜ ಚಾವಯಿಂಜತ್. ಇದ್ ಒಬ್ಬಂಡಲ್ಲಿಂಜ ಇಂಞೊಬ್ಬಂಗ್ ಗಾಳಿರ ಮೂಲಕ ಪಬ್ಬುವ. ಕ್ಷಯ ರೋಗಿಯ ಬಾಯಿ ಮುಚ್ಚತೆ ಕೆಮ್ಮ್ಚೀಂಗಿ ಕ್ರಿಮಿ ಗಾಳಿಕ್ ಬಂದಿತ್ ಬೋರೆಯಿಂಗಕ್ ಬಪ್ಪ. ಅದಲ್ಲತೆ ಕೆಮ್ಮಿತ್ ಅಲ್ಲಿ ಇಲ್ಲಿ ತುಪ್ಪ್ಚೀಂಗಿ ಅದಾನ್ ಚೊಟ್ನಯಿಂಗಕ್ ಕೂಡ ಖಾಯಿಲ ಬಪ್ಪ ಸಾಧ್ಯತೆ ಇಪ್ಪ.

1882ನೇ ಇಸವಿಲ್ ಡಾ. ರಾಬರ್ಟ್ ಕೋಚ್ ಎಣ್ಣುವ ವಿಜ್ಞಾನಿ ಕ್ಷಯ ರೋಗಕ್ ಕಾರಣ ಆಪನ್ನತೆ ಟಿ.ಬಿ. ಬ್ಯಾಸಿಲಸ್ (T.B. Bacillus) ಎಣ್ಣುವ ಕ್ರಿಮಿನ ಕಂಡ್ಪುಡ್ಚತ್. ಆ ಸಮಯತ್ ಯುರೋಪ್ ಪಿಂಞ ಅಮೇರಿಕಾತ್ ಕ್ಷಯಕ್ ಏಳ್ ಜನಕ್ಕೊಬ್ಬ ಬಲಿಯಾಯಂಡಿಂಜತ್. ಡಾ. ಕೋಚ್ ಸಂಶೋಧನೆ ಟಿ.ಬಿ.ಕ್ ಮದ್ದ್ ಕಂಡ್ಪುಡಿಪಕ್ ಸಹಾಯ ಆಚಿ. 1982ಲ್ ಡಾ. ಕೋಚ್ ರ ಪ್ರಕಟಣೆರ ನೂರಾಂಡ್ ಸಂದರ್ಭತ್ (IUATLD) International Union against TB and Lungs Disease ಎಣ್ಣುವ ಸಂಸ್ಥೆ 24ನೇ ಮಾರ್ಚ್ ನ ವಿಶ್ವ ಕ್ಷಯ ರೋಗ ದಿನಾಂದ್ ಆಚರಣೆ ಮಾಡಂಡೂಂದ್ ತೀರ್ಮಾನ ಮಾಡ್ಚಿ. ಬಯ್ಯಂಜಿ 1996ರ (WHO) ವಿಶ್ವ ಆರೋಗ್ಯ ಸಂಸ್ಥೆ (world health Organisation) ಕೂಡ ಈ ಕಾರ್ಬಾರ್ಕ್ ಬೆಂಬಲ ಕಾಟ್ಚಿ. ಇಂದ್ ಕ್ಷಯ ರೋಗಕ್ ಸುಮಾರ್ ಮದ್ದ್ ಉಂಡ್. ಸ್ವಯಂ ಸೇವಾ ಸಂಸ್ಥೆ, ಆರೋಗ್ಯ ಇಲಾಖೆ ಇಂಞಾಚ್ಚಕ್ ಮಾಹಿತಿ ಕೊಡ್ತಿತ್ ಈ ಖಾಯಿಲತನ್ ಬೇರ್ ಸಮೇತ ಬಲ್ಚಿ ಕನಿಪಕ್ ಪೇಚಾಡಂಡು. ಅದಿಂಗಿಂಜ ದಂಡ್ ವಾರಕೂ ಅದಿಯಾಯಿತ್ ಕೆಮ್ಮ್ಚಿ ಉಂಡೇಂಗಿ ಡಾಕ್ಟರ್ ಪಕ್ಕ ಪೋಯಿತ್ ಕಫ ಪರಿಕ್ಮೆ ಮಾಡಂಡೂಂದ್ ಪೇಪರ್ಲೂ, ರೇಡಿಯೋತೂ, ಟಿವಿಲೂ ಎಣ್ಣ್ಚೀಂಗಿ ಕೂಡ ಅರ್ಥ ಆಗತ ಜನ ಉಂಡ್. ಟಿ.ಬಿ. ಪೂರ್ಣವಾಯಿತ್ ಗುಣ ಆಪಕ್ ಎನ್ನತೆಲ್ಲ ಎಚ್ಚರ ಎಡ್ತವಂಡು ಎಣ್ಣಿತ್ ಕೊಡ್ತಕ ಟಿ.ಬಿ.ನ ಬುಡಸಮೇತ ಬಲ್ಚಿತ್ ಕನಿಪಕ್ ಸಹಾಯ ಆಪ.

## ಮುಟ್ಕಾಳಂಗಡ ದಿನ

### ರಾಷ್ಟ್ರೀಯ ಅಂಧತ್ವ ನಿವಾರಣಾ ದಿನ

ಪ್ರಪಂಚತರ ಸುಮಾರ್ ದೇಶತ್ ಇದ್ 'ಏಪ್ರಿಲ್ ಪೂಲ್ ಡೇ' ಎಣ್ಣೆತ್ ಆಚರಣೆ ಮಾಡುವ. ಒಬ್ಬ ಇಂಞ್ಶೊಬ್ಬನ ಎಂತೇಂಗೊರ್ ತಮಾಷಿಲ್ ಕೆಣ್ಚೆತ್ ಮಿಷಿ ಪಡುವದ್ ಈ ದಿನತರ ವೈಶಿಷ್ಟ್ಯ. ಈ ಆಚರಣೆಲ್ ಬಲ್ಯ ಒರೂ ಅರ್ಥ ಇಲ್ಲತ ಪೋಚೆಂಗೊ ಎಕ್ಕೊಲು ತಾಂಡದೇ ಸಮಸ್ಯೆರ ಸುಳಿಲ್ ಚಿಕ್ಕನ ಮನುಷ್ಯ ತಮಾಷಿ ಮಾಡಿತ್ ತೆಳಿಪದೇ ಇದಂಡ ಗುಟ್ಟಾಯಿತಿಕ್ಕು. ನಂಗ ಮಕ್ಕ ಆಯಿತಿಪ್ಪಕ ಏಪ್ರಿಲ್ ಒಂದಾಂಗ್ ಅಂಜಿ ಉರ್ಪಿಯತರ ನೋಟಾನ ಕಾಂಗತ ನೂಲ್ ಕೊಯಿತಿತ್ ರೋಡ್ಲಲ್ ಬೆಚ್ಚಿತ್ ನೂಲ್ ಪುಡ್ಚಂಡ್ ಮನೇರೊಳ್ ಅಳ್ತೋವಯಿಂಜತ್. ರೋಡ್ಲಲ್ ಪೋಪ ಕೆಲವು ಜನಕ್ ಈ ಕೆಣಿ ಗೊತ್ತಿಪ್ಪಯಿಂಜತ್. ಕೆಲವು ಜನ ಅಂಜಿ ಉರ್ಪಿಯತನ ಆಂಜವಕ್ ಬಗ್ಗುವದೂ ಇಂಜತ್. ಅನ್ನನೆ ಬಗ್ಗುವಕ್ ಒಳ್ಲ್ ನೂಲ್ ಪುಡ್ಚಂಡಿಪ್ಪ ಮಕ್ಕ ಮೆಲ್ಲೆ ನೂಲ್ ಬಲಿಪಯಿಂಜತ್. ನೋಟ್ ಮಿಂಞಕ್ ತೆರ್ಂಗ್ನದ್ ಕಾಂಬದೂ ಆಸಾಮಿಕ್ ಗೊತ್ತಾಪಯಿಂಜತ್. ಅಕ್ಕಣೆ ಒಳ್ಚಿತ್ ನೋಟುವ ಎಲ್ಲ ಮಕ್ಕಡ ಕೂತ್ ಪಡೆ ಅಳುವಯಿಂಜತ್. ಆ ಆಸಾಮಿರ ಪಾಡ್ ಎನ್ನನಾಯಿತಿಕ್ಕು ಎಣ್ಣೆ. ಕೆಲವು ಸಮಯತ್ ಈ ಏಪ್ರಿಲ್ ಪೂಲ್ ತಮಾಷಿ, ಕಾರ್ಯ ಆಪ ಸಂದರ್ಭವೂ ಇಲ್ಲತಿಲ್ಲೆ. ಅಕ್ಕ ಮಕ್ಕಡ ಬೆನ್ಚ್ ಪೆರಿಯಯಿಂಡ ಕೈಂಜ ಬೂವಯಿಂಜತ್.

ಇದೇ ಏಪ್ರಿಲ್ ಒಂದಾನ ಭಾರತ ದೇಶತ್ 'ರಾಷ್ಟ್ರೀಯ ಅಂಧತ್ವ ನಿವಾರಣಾ ದಿನಾ'ಂದ್ ಆಚರಣೆ ಮಾಡುವ. ಕಣ್ಣೆಲ್ಲತ ಕುರುಡಂಗ ಬದ್ಕಲ್ ಅದೆಚ್ಚಕ್ ಕಷ್ಟ ಪಡುವಲ್ಲ. 1976ಲ್ ಈ ಕಾರ್ಯಕ್ರಮ ಸುರು ಮಾಡ್ಚಿ. ಒರ್ ವಾರಕೆತ್ತನೆ ಈ ಕಾರ್ಯಕ್ರಮ ನಡಪ. ಕಣ್ಣ್ ದಾನ ಮಾಡುವಕ್ ಜನಳ ಪ್ರೇರೇಪಣೆ ಮಾಡುವದ್ ಈ ದಿನಾಚರಣೆರ ಉದ್ದೇಶ. ಪ್ರಪಂಚತ್ ಅಂದಾಜ್ 4000 ದಶ ಲಕ್ಷ ಜನ ಕುರು ಡಂಗ ಉಂಡ್ಲೊ. ಅದಲ್ ಭಾರತತ್ 40% ಎಣ್ಣಕ 15 ಲಕ್ಷ ಜನಕ್ ದೃಷ್ಟಿ ದೋಷ ಉಂಡ್ಲೊ. ಅದಂಗ್ ಚತ್ತಪಿಂಞ ಮಣ್ಣಾಪಕುಳ್ಳ ತಡಿರ ಕೂಡ ಕಣ್ಣೆನೋ ಮಣ್ಣ್ ಮಾಡತೆ ದಾನ ಮಾಡಂಡು. ಒಬ್ಬಂಡ ಕಣ್ಣ್ ದಂಡ್ ಕುರುಡಂಗಕ್ ಕಣ್ಣ್ ಕೊಡ್ಪ ಇದಂಗ್ಂಜ ಪ್ಯೂ ಏದುಂಡ್? ಚತ್ತ ಪಿಂಞವೂ ಸಹ ಇಂಞ್ಶೊಬ್ಬಂಡ ಮೂಲಕ ಬದ್ಕುವ ಅವಕಾಶ ನಂಗ ಕಣ್ಣ್ ದಾನ ಮಾಡುವ ಮೂಲಕ ಪಡ್ಂದೋಂಡು. ಅಕ್ಕಲೇ ಇನ್ನತ ದಿನತರ ಆಚರಣೆ ಅರ್ಥಪೂರ್ಣ ಆಪೊ.

## ವಿಶ್ವ ಆರೋಗ್ಯ ದಿನ

1948ನೇ ಇಸವಿಲ್ ವಿಶ್ವ ಆರೋಗ್ಯ ಸಂಸ್ಥೆ WHO (World Health Organisation) ಆದ್ಯ ಸಭೆ ನಡವಿತ್ ಪ್ರತೀ ಕಾಲ ಏಪ್ರಿಲ್ 7ಂಕ್ ವಿಶ್ವ ಆರೋಗ್ಯ ದಿನ ನಡವಿತ್ ತೀರ್ಮಾನ ಮಾಡ್ಚಿ. ಅದೇ ಪೋಲೆ 1950 ಲಿಂಜ ಪ್ರತೀ ಕಾಲ ಏಪ್ರಿಲ್ 7ಂಕ್ ವಿಶ್ವ ಆರೋಗ್ಯ ದಿನ ಆಚರಣೆ ಮಾಡುವಕ್ ತೀರ್ಮಾನ ಎಡವಿತ್. ಈ ದಿನಾಚರಣೆ ನಡವಿತ್ ಮೂಲ ಉದ್ದೇಶ ಆರೋಗ್ಯತರ್ ಬಗ್ಗೆ ಸಾಮಾನ್ಯ ಜನಡಲ್ಲಿ ಎಚ್ಚರ ಬಪ್ಪವಿಡುವದೇ ಆಯಿತ್ತುಂಡ್. ಒರ್ ಇಂಗ್ಲಿಷ್ ಗಾದೆ ಇನ್ನನೆ ಎಣ್ಣುವ ' If Health is lost everything is lost' ಬದ್ಕಲ್ ಪಣ ಕಳಂದಂಡಕ ಪುನಃ ಸಂಪಾದನೆ ಮಾಡಲು, ಆಚೇಂಗಿ ಆರೋಗ್ಯ ಪಾಳಾಚೇಂಗಿ ಎಲ್ಲ ಕಳಂದಂಡನ್ನೆ. ಮನುಷ್ಯಂಕ್ ಆರೋಗ್ಯ ದುಂಬ ಮುಖ್ಯ ಪಟ್ಟಿದ್. ಆರೋಗ್ಯ ಸರಿ ಇಲ್ಲತೆ ಪೋನಕ ಎಚ್ಚಕ್ ಪಣ ಉಂಡೇಂಗೂ ಅದಂಕ್ ಬೆಲೆ ಇಲ್ಲತಾಯಿರುವ.

ಪ್ರಪಂಚತರ್ ಎಲ್ಲ ಮೂಲೆಲೂ ಏದೇ ತರತರ್ ಖಾಯಿಲ ಬರತನ್ನಕೆ, ಬಂದ ಖಾಯಿಲತನ್ ದೂರ ಮಾಡುವಕ್ ಎಂತೆಲ್ಲ ಪರಿಹಾರ ಕಾರ್ಯ ಮಾಡಂಡೂಂದ್ ಸಲಹೆ ಕೊಡ್ಪೊ ಪಿಂಞ ಸಹಾಯ ಮಾಡುವದ್ ವಿಶ್ವ ಆರೋಗ್ಯ ಸಂಸ್ಥೆರ ಕಾರ್ಯ. 2007ಲ್ ನಡವಿತ್ ವಿಶ್ವ ಆರೋಗ್ಯ ದಿನತರ್ ಮುಖ್ಯ ಘೋಷಣೆ 'ಅಂತರ್ರಾಷ್ಟ್ರೀಯ ಆರೋಗ್ಯ' ಆಯಿತಿಂಜತ್. 2006ಂಡ ಘೋಷಣೆ 'ಆರೋಗ್ಯಕಾಯಿತ್ ಒಗ್ಗಟ್ಟರ್ ಕೆಲಸ'. 2005ಂಡ ಘೋಷಣೆ 'ಅವ್ವ ಪಿಂಞ ಕುಂಞಿರ್ ಆರೋಗ್ಯ ಕಾಪಾಡುವೊ'. 2004ನೇ ಇಸವಿಲ್ 'ರಸ್ತೆ ಸುರಕ್ಷತೆ'. 2003ನೇ ಇಸವಿಲ್ 'ಮಕ್ಕಡ ಭವಿಷ್ಯ'. 2002ಲ್ 'ಆರೋಗ್ಯತರ್ ನಂಗಡ ಮೊಟ್ಟ್'. 2001ಲ್ 'ಮಾನಸಿಕ ಆರೋಗ್ಯ ಕಾಪಾಡುವದ್', 2000ತ್ 'ಚೋರೆ ದಾನ ಕಲುಷಿತ ಆಗ'. 1999ಲ್ 'ಚಾಯಿಲಿಪ್ಪಕ್ ಬಯತರ್ ತೊಂದರೆ ಇಲ್ಲೆ'. 1998ಲ್ 'ಅವ್ವಂಡ ಸುರಕ್ಷತೆ'. 1997ಲ್ 'ಸಾಂಕ್ರಾಮಿಕ ರೋಗ ತಡೆ'. 1996ಲ್ 'ನಗರ ಪ್ರದೇಶತ್ ಬದ್ಕಲ್ ಪಿಂಞ ಆರೋಗ್ಯ', 1995ಲ್ ಇಡೀ ಪ್ರಪಂಚತೆ 'ಪೋಲಿಯೊ ರೋಗತರ್ ನಿರ್ಣಾಮ'. ಇಕ್ಕತ ಪರಿಸ್ಥಿತಿಲ್ ಆರೋಗ್ಯವಂತ ಮನುಷ್ಯನ ಕಾಂಬದೇ ಅಪರೂಪ. ಆಯಿಪೋಯಿತ್. ಪೂಕುಂಞಿಂಜ ತೊಟ್ಟಿತ್ ವಯಸ್ಸಂಗಡಲ್ಲಿ ಕೆತ್ತನೆಯೂ ಖಾಯಿಲ ತಪ್ಪನದಲ್ಲ. ಇದಂಕ್ ಮನುಷ್ಯಂಡ ಬದಲಾನ ಬದ್ಕಲ್, ಬದಲಾನ ಊಣ್ ತೀನಿ, ಕಲ್ಮಶ ದುಂಬನ ಪರಿಸರ ಇನ್ನತ ಬೋಂಡಿಯಚ್ಚಕ್ ಕಾರಣ ಉಂಡ್. ನಂಗಡ ಆರೋಗ್ಯ ನಂಗಡ ಕೈಲೇ ಉಂಡ್. ಪ್ರತಿಯೊಬ್ಬನೂ ತಾಂಡ ಆರೋಗ್ಯತರ್ ಬಗ್ಗೆ ಎಚ್ಚರ ಎಡವಿತ್ ವಿಶ್ವ ಆರೋಗ್ಯ ಸಂಸ್ಥೆರ ಶ್ರಮ ಸಾರ್ಥಕ ಆಪ.

ಏಪ್ರಿಲ್ - 22

## ಭೂಮಿ ದಿನ - Earth Day

ಪ್ರತೀ ಕಾಲ ಏಪ್ರಿಲ್ ಇರುವತ್ತ ದಂಡನೆ ತಾರೀಕ್‌ಲ್ ಈ ಭೂಮಿ ದಿನ ಆಚರಣೆ ಮಾಡುವ. ಈ ಆಚರಣೆರ ಉದ್ದೇಶ, ನಂಗಕ್ ಆಶ್ರಯ ತಂದಿತುಳ್ಳ ಈ ಭೂಮಿನ ರಕ್ಷಣೆ ಮಾಡುವದ್. ಈ ಭೂಮಿರ ಸುತ್ತ ಉಳ್ಳ ವಾತಾವರಣತ್‌ನ ಪಾಳಾಕತನ್ನನೆ ಕಾಪಾಡುವದ್. ಕೋಟಿ ಕೋಟಿ ಜೀವರಾಶಿಯಕ್ ಜಾಗ ತಂದನ್ನತ ಭೂತಾಯಿನ ನಂಗ ಇಂದ್ ಶೋಷಣೆ ಮಾಡಿಯಂಡುಂಡ್ 'ಪ್ಲಾಸ್ಟಿಕ್ ನಿಷೇಧ' ಎಣ್ಣೆಯಂಡ್ ಬಲ್ಯ ಬೋರ್ಡ್ ಇಂಜಕಲೂ ಅದಂಡ ಬಳಕೆನ ತಡ್‌ಪಕ್ ಕಯ್ಯತಾಯಿತ್. ಅದಂಡ್ ಬದ್‌ಲ್ ಉಪಯೋಗ್‌ಚಿಟ್ಟಿ ಪ್ಲಾಸ್ಟಿಕ್‌ನ ಪುನಾದಿ ಬಳಕೆ ಮಾಡುವನಕೆ ಮಾಡ್‌ನಕ ಪ್ರಯೋಜನ ಆಕು.

ಇಕ್ಕತ ಕಂಪ್ಯೂಟರಿಕ್ಕತ ಲೋಕತ್ ಪಳೆಯದಾನ ಸಿಡಿ, ಪಾಳಾನ ಎಲೆಕ್ಟ್ರಾನಿಕ್ ಸಾಮಾನ್‌ನ (e-Waste) ಗುಂಡ್ ಭೂಮಿ ಇಂಞಚ್ಚಕ್ ಪಾಳಾಯಂಡುಂಡ್. ಕಾಡೆಲ್ಲ ನಾಡಾಯಿತೂ, ತೋಟ ತೋಡಿಯ ಮಾಡಿತೂ ನಾಶ ಆಯಿ ಪೋಯಿತ್, ನಂಗ ಬಳಕೆ ಮಾಡುವ ಏರ್‌ಕಂಡೀಶನ್, ಫಿಡ್ಲ್, ಸೆಟ್ ಇದೆಲ್ಲತ್‌ಂಜ ಪೊರಮೆ ಬಪ್ಪನ್ನತ ಕ್ಲೋರೊ ಫ್ಲೋರೋ ಕಾರ್ಬನ್, ಪಿಂಞ ವಾತಾವರಣತ್ ಅದಿ ಆಯಂಡುಳ್ಳ ಇಂಗಾಲ (ಕಾರ್ಬನ್) ಇದೆಲ್ಲತಿಂಜ ಭೂಮಿ ಬಿಸಿ ಆಯಂಡುಂಡ್. ಭೂಮಿರ ಮೇಲೆ ಉಳ್ಳ ಸೀತಗಡ್ಡೆ ಕರೀತ್ ಸಮುದ್ರ ಮಟ್ಟಿ ಏರಿಯಂಡುಂಡ್. ಪರಿಣಾಮ ಅಕಾಲಿಕ ಮಳೆ, ಬರಗಾಲ, ಜನಳ ದುಃಖಿಕ್ ದೂಡಿಯಂಡ್ ಉಂಡ್.

ಕೈಗಾರಿಕಾ ಕ್ರಾಂತಿ ಆನಲ್ಲಿಂಜ ಫ್ಯಾಕ್ಟರಿಂಜ ಬಪ್ಪನ್ನತ ಪೊಗೆ, ಅದಿಯಾನ ವಾಹನ ಸಂಚಾರತಿಂಜ ಪೊಗೆ ಗಾಳಿನ ಪಾಳಾಕಿಯಂಡುಂಡ್. ಇದ್‌ಲ್‌ಂಜ ಎಚ್ಚಕೋ ಖಾಯಿಲ ಬಂದಂಡುಂಡ್. ಅದಿಯಾನ ಜನಸಂಖ್ಯೆ, ಫ್ಯಾಕ್ಟರಿಂಜ ಪೊರಮೆ ಬಪ್ಪನ್ನತ ವಿಷವುಳ್ಳ ನೀರ್ ಚರಂಡಿಲ್ ಒಕ್ಕಿತ್ ಪೊಳೆರ ಮೂಲಕ ಸಮುದ್ರತ್‌ನ ಕೂಡಿತ್ ಅದ್‌ಲುಳ್ಳ ಜೀವಿಯಳೊ ಕೊಂದಂಡುಂಡ್. ಒಂದಲ್ಲ ದಂಡಲ್ಲ, ಆಯಿರಗಟ್ಟಲೆ ಕಾರಣತ್ ಭೂಮಿರ ಮಣ್ಣ್, ನೀರ್, ಗಾಳಿ ಎಲ್ಲ ಪಾಳಾಯಂಡುಂಡ್. ಮನುಷ್ಯ ಅಶಿ ಆಸೆಲ್ ಬೊಳೆ ಬೊಳಿವಕ್ ರಾಸಾಯನಿಕ ಗೊಬ್ಬರ ಇಟ್ಟಿತ್ ಭೂಮಿರ ಸತ್ತ ಕಮ್ಮಿಯಾಯಿತ್.

ಇನ್ನತ ಪರಿಸ್ಥಿತಿಲ್ ಭೂಮಿ ದಿನ ಆಚರಣೆ ವೇದಿಕೆಲ್ ಮಾತ್ರ ಆಚೀಂಗಿ ಪೋರ. ಪ್ರತೀ ಮನುಷ್ಯಂಗೂ ತಾನ್ ಪುಟ್ಟ್‌ನ ಭೂಮಿನ ಶುದ್ಧತ್ ಬೆಚ್ಚಿತ್ ಮಿಂಞಕ್ ಬಪ್ಪಕುಳ್ಳ ಮಕ್ಕಕ್ ಚಾಯಿಲ್ ಬದ್‌ಕುವಕ್ ಅವಕಾಶ ಮಾಡಿಕೊಡ್‌ಕಂಡು ಎಣ್ಣುವ ಸಾಮಾಜಿಕ ಪ್ರಜ್ಞೆ ಬೋಂಡು. ವಿಜ್ಞಾನಿಯ, ಸಂಶೋಧಕಂಗ ಈ ಪಾಳೆಂಬರಿ ಪಳೆಯ ಸಾಮಾನ್ ಪ್ಲಾಸ್ಟಿಕ್ ಇನ್ನತಾನೆಲ್ಲ ಪರಿಸರ ನಾಶ ಆಕತನ್ನನೆ ಪುನರ್ ಬಳಕೆ ಮಾಡುವ ಬಗ್ಗೆ ಚಿಂತನೆ ಮಾಡಂಡು. ಅಂದಕ ಮಾತ್ರ ಭೂಮಿ ದಿನ ಆಚರಣೆ ಸಾರ್ಥಕ ಆಪ.



## ವಿಶ್ವ ಪುಸ್ತಕ ದಿನ World Book day

ಪ್ರತೀ ಕಾಲ ಏಪ್ರಿಲ್ ಇರುವತ್ತ ಮೂಂದಾಂಗ್ ವಿಶ್ವ ಪುಸ್ತಕ ದಿನ ಆಚರಣೆ ಮಾಡುವ. 1995ನೇ ಇಸವಿಲ್ ಅಧ್ಯವಾಯಿತ್ ಯುನೆಸ್ಕೋ (UNESCO) ಈ ಪುಸ್ತಕ ದಿನಾಚರಣೆನ ಶುರು ಮಾಡ್ಚಿ. ಪುಸ್ತಕ ಓದುವದ್ ಎಚ್ಚಕ್ ನಲ್ಲದ್, ಪುಸ್ತಕ ಎಚ್ಚಕ್ ಅಮೂಲ್ಯ ಎಣ್ಣುವ ಅರಿವಿಕೆನ ಜನಕ್ ಕೊಡ್ಪಕ್ ಈ ಆಚರಣೆ ಮಾಡುವ.

ಅರ್ಂಜಯಿಂಗ್ ಎಣ್ಣುವನ್ನೆಕೆ 'ನಲ್ಲ ಪುಸ್ತಕಕಿಂಜ ನಲ್ಲ ಸಿನೇತಕಾರ ದಾರೂ ಇಲ್ಲೆ', 'ದಾರೂ ಇಲ್ಲತ ಜಾಗತ್ ಒಂಟಿಯಾಯಿತ್ ಜೀವನ ಮಾಡಂಡೂಂದಾಚೇಂಗಿ ಪುಸ್ತಕ ಇಂಜತೇಂಗಿ ಬದುಕ್ವದ್ ಕಷ್ಟ ಇಲ್ಲೆ'ಂದ್ ಮಹಾತ್ಮ ಗಾಂಧೀಜಿ ಎಣ್ಣೆತ್. ಎಳ್ತಕಾರ ತಾನ್ ಅರ್ಂಜಾನ ಅನುಭವತ್ನ ಎಳ್ವೆವ. ಅದ್ ಪುಸ್ತಕವಾಯಿತ್ ಪ್ರಕಟವಾನ ಪಿಂಞ ಎಡ್ತಿತ್ ಓದ್ಚೆಂಗಿ ಎಳ್ತಕಾರಂಗ್ ಸಾರ್ಥಕತೆ. ಓದ್ನವೊಂಗ್ ಜ್ಞಾನತರ್ ಅನುಭವ ಕ್ಕಟ್ಟುವ.

ಜನಡಲ್ಲಿ ಓದುವ ಅಭ್ಯಾಸ ಜಾಸ್ತಿ ಮಾಡುವಕಾಯಿತ್ ಅಲ್ಲಲ್ಲಿ ಗ್ರಂಥಾಲಯ ಸ್ಥಾಪನೆ ಆಯಿತ್. ಇದೇ ಉದ್ದೇಶತ್ ಅಮೇರಿಕ ಲೈಬ್ರರಿ ಆಫ್ ಕಾಂಗ್ರೆಸ್ ಸಂಸ್ಥೆ ಸ್ಥಾಪನೆ ಆಯಿತ್. ಭಾರತತ್ ದಿ ನ್ಯಾಷನಲ್ ಬುಕ್ ಟ್ರಸ್ಟ್, ಸಾಹಿತ್ಯ ಅಕಾಡೆಮಿ, ಪುಸ್ತಕ ಪ್ರಾಧಿಕಾರ ಇನ್ನತ ಸುಮಾರ್ ಸಂಘ-ಸಂಸ್ಥೆ ಕಾರ್ಬಾರ್ ಮಾಡಿಯಂಡುಂಡ್. ಕಾಲ ಕಾಲಕ್ ಪುಸ್ತಕ ಮೇಳವೂ ನಡಪ. ಪುಸ್ತಕ ಎಡ್ತಿತ್ ಓದಿತ್ ಸಂಗ್ರಹ ಮಾಡ್ಚೇಂಗಿ ಅದ್ ಮಕ್ಕಡ ಕಾಲಕೂ ಕೂಡ ಒರ್ ಅಮೂಲ್ಯ ಆಸ್ತಿ ಆಪ.

ಏಪ್ರಿಲ್ - 26

## ವಿಶ್ವತ್ ಪೆದಪೋನ ವ್ಯಕ್ತಿಯಡ ಆಸ್ತಿಯ ದಿನ

### World Intellectual Property Day

ಏಪ್ರಿಲ್ 26ಂಕ್ ವಿಶ್ವತ್ ಪೆದ ಪೋನ ವ್ಯಕ್ತಿಯಡ ಆಸ್ತಿ; ಎಣ್ಣಕ ಒರ್ ಪೆದಪೋನ ಕಲಾಕಾರ ಬುಡ್ತನ ಚಿತ್ರವೊ, ಎಳ್ತನ ಪುಸ್ತಕವೊ, ವಿಚ್ಛಾನಿರ ಸಂಶೋಧನೆಯೊ, ಇತಿಹಾಸಕಾರಂಡ ಸಂಶೋಧನೆಯೊ ಇದೆಲ್ಲ ಲೋಕಕ್ ಒರ್ ಅಮೂಲ್ಯ ಆಸ್ತಿ. ಇನ್ನತ ಆಸ್ತಿನ ಕಾಪಾಡಂಡು ಎಣ್ಣವ ಉದ್ದೇಶತ್ ಒರ್ ಸಂಸ್ಥೆ ಶುರುವಾಚಿ. ಅದ್ (WIPO) World Intellectual Property Organisation ಏಪ್ರಿಲ್ 26, 1970ನೇ ಇಸವಿಲ್ ಸ್ಥಾಪನೆ ಆಚಿ. ಅದೇ ಗೇನಕಾಯಿತ್ 2010ನೇ ಇಸವಿಂಜ ಇಪ್ಪರ ಏಪ್ರಿಲ್, 26ಂಕ್ ವಿಶ್ವ ಪೆದಪೋನ ವ್ಯಕ್ತಿಯಡ ಆಸ್ತಿ ದಿನತ್‌ನ ವಿಶ್ವಸಂಸ್ಥೆರ ಮಾನ್ಯತೆ ಪಡ್‌ಂದಿತ್ ಆಚರಣೆ ಮಾಡುವ.

ಎಚ್ಚಕೋ ಕಲಾಕಾರಂಗ, ಎಳ್ತಕಾರಂಗ, ವಿಚ್ಛಾನಿಯ, ಇತಿಹಾಸಕಾರಂಗ, ಸಂಶೋಧಕಂಗ ತಂಗಡ ದೇಶತ್‌ರ ಅಭಿವೃದ್ಧಿಕ್ ಕಷ್ಟಪಟ್ಟಿತ್ ಸಾಧನೆ ಮಾಡಿತಿಪ್ಪ. ಆ ಸಾಧನೆನ ಈ ಪ್ರಪಂಚ ಎಕ್ಕೊಲು ಮರ್‌ಪಕಾಗ ಎಣ್ಣವ ಉದ್ದೇಶ ಈ ದಿನತ್‌ರ ಆಚರಣೆ. ಅನ್ನತಯಿಂಗಡ ಸೇವೆನ ನೆನತಿಯೋವದ್ ಪ್ರತಿಯೋರ್ ಪ್ರಚೆರ ಆದ್ಯ ಕರ್ತವ್ಯ.

## ವಿಶ್ವ ನೃತ್ಯ ದಿನ

### World Dance Day

ಯುನೆಸ್ಕೋತರ ಅಂತರಾಷ್ಟ್ರೀಯ ನೃತ್ಯ ಸಭೆ 1982ನೇ ಇಸವಿ ಏಪ್ರಿಲ್ 29ಂಗೆ ಸಭೆ ಕೂಡಿತು ಏಪ್ರಿಲ್ ಇರುವತ್ತ ಒಯಿಂಬದನೆ ತಾರೀಖಾನ ನೃತ್ಯ ದಿನಾಂದ್ ಆಚರಣೆ ಮಾಡಂಡು ಎಣ್ಣೆಯಂಡ್ ತೀರ್ಮಾನ ಮಾಡ್‌ಚಿ.

ಈ ದಿನ ಆಚರಣೆ ಮಾಡುವ ಮೂಲ ಉದ್ದೇಶ ಸಾರ್ವಜನಿಕ ವಲಯತ್ ನೃತ್ಯ ಎಣ್ಣಕ ಕಮ್ಮಿತರ ಕಾಂಬ. ಇಂದೇತ ಕಾಲತ್ ಡ್ಯಾನ್ಸ್ ಥೆರಪಿ (Dance Therapy) ನೃತ್ಯತರ ಮೂಲಕ ಕಾಯಿಲಕ್ ಪರಿಹಾರ ಕಂಡ್‌ಪುಡಿಪ ವಿಧಾನ ಇದಾಯಿತುಂಡ್. ಏದೇ ದೇಶತೂ ನೃತ್ಯಕ್ ಪ್ರಾಧಾನ್ಯತೆ ಕೊಡ್‌ಪುಲೆ. ಇದೇ ಕಾರಣಕ್ ಯುನೆಸ್ಕೋತರ ಅಂತರಾಷ್ಟ್ರೀಯ ನೃತ್ಯ ಸಮಿತಿಕಾರ ಪ್ರಾಥಮಿಕ ಶಿಕ್ಷಣತ್ ನೃತ್ಯತನ ಕೂಟಂಡು. ಇದಾಲಿಂಜ ಅಯಿಂಡ ದೈಹಿಕ ಪಿಂಞ ಮಾನಸಿಕ ಶಕ್ತಿ ಚಾಸ್ತಿ ಆಪಾಂದ್ ಅಭಿಪ್ರಾಯಪಟ್ಟಿತ್.

ನೃತ್ಯತನ ಪ್ರಾಥಮಿಕ ಪಠ್ಯಕ್ರಮಕ್ ಒಳ್‌ಪಡ್‌ತುವಂಜಿ ಮಕ್ಕಕ್ ಎಲ್ಲ ಪ್ರಾಕಾರತರ ನೃತ್ಯತರ ಬಗ್ಗೆಯೂ ಅರಿವಿಕೆ ಕೊಡ್‌ಕಂಡು. ನೃತ್ಯತರ ಬಗ್ಗೆ ಪ್ರಬಂಧ ಎಳ್‌ದುವೊ, ಭಾಷಣ ಮಾಡುವೊ, ಚಿತ್ರ ಬುಡ್‌ತುವೊ ಇನ್ನತದೆಲ್ಲ ಈ ದಿನಾಚರಣೆಲ್ ನಡ್‌ಂದಿತ್ ಮಕ್ಕಳೂ, ಬಲ್ಯಯಿಂಗಳೂ ನೃತ್ಯತರ ಬಗ್ಗೆ, ಅದ್‌ಂಡ ಪ್ರಾಕಾರತರ ಬಗ್ಗೆ ಅರ್‌ಂಜೋವಡ್. ಮಿಂಞಕ್ ಇದಲ್ ಸಂಶೋಧನೆ, ಪ್ರಬಂಧ ಏಳ್‌ದುವಕ್ ಮೊಳಿ ಆಪ.

## ಕಾರ್ಮಿಕ ದಿನ ಅಥವಾ ಮೇ ದಿನ

### MAY DAY

ಮೇ ದಿನ ಎಣ್ಣುವಾಸ ಮಿಂಞ ಒರ್ ಖುಷಿರ ದಿನ ಆಯಿತ್ ಆಚರಣೆ ಮಾಡುವಯಿಂಜತ್. 'ಮೇ ಬಾಸ್ಕೆಟ್ಸ್' ಎಣ್ಣೆಯಂಡ್ ಬ್ಯಾಗ್ ದುಂಬ ಪೂ ಇಲ್ಲೇಂಗಿ ಮೊದ್‌ರ ತೀನಿ, ಇನ್ನತಾನೆಲ್ಲ ಪಕ್ಕತ ಮನೇರ ಪಡಿಲ್ ಅಯಿಂಗಳ್ ಗೊತ್ತಿಲ್ಲತನ್ನೆಕೆ ಬೆಚ್ಚಿರುವೊ ಇನ್ನತದೆಲ್ಲ ನಡ್‌ಂದಂಡಿಂಜತ್.

ಬಯ್ಯಂಜಿ 1886ಲ್ ಚಿಕಾಗೊತ್ ನಡ್‌ಂದ ದೊಂಬಿ ಗಲಾಟೆಲ್ ಚತ್‌ಪೋನಯಿಂಡ ಗೇನಕಾಯಿತ್ ಈ ದಿನತ್‌ರ ಆಚರಣೆ ನಡ್‌ಂದತ್. ಆಚೇಂಗಿ ಇದನ ಶುರು ಮಾಡ್‌ನ ಅಮೇರಿಕ ದೇಶ, ಇಂದ್ ಮೇ ಒಂದಾನ ರಾಜಭಕ್ತಿರ ದಿನಾಂದ್ ಆಚರಣೆ ಮಾಡುವ (Loyalty Day).

ಈ ದಿನತ್‌ರ ಮೂಲ ಉದ್ದೇಶ ಕಾರ್ಮಿಕ ಪಿಂಞ ಮಾಲೀಕಂಡ ಮದ್ದು ಒತ್ತೋಮ್, ಸಹಕಾರ ಇಪ್ಪನ್ನೆಕೆ ಮಾಡುವದ್. ಕಾರ್ಮಿಕಂಗಡ ಕಷ್ಟ-ಸುಖ ಅರಿವದ್, ಬಾಲ ಕಾರ್ಮಿಕ ಪದ್ಧತಿನ ಬೇರ್ ಸಮೇತ ಇಲ್ಲತಾಕುವದ್. ಮಿಂಞತ ಕಾಲತ್ ಜೀತ ಪದ್ಧತಿ ಇಂಜತ್, ಸ್ವಾತಂತ್ರ್ಯ ಇಂಜಿಲೆ. ದಿನಪೂರ್ತಿ ಕೆಲಸ ಮಾಡಂಡಿಂಜತ್. 1948ಲ್ ಸ್ವಾತಂತ್ರ್ಯ ಬಂದ ಪಿಂಞ ಕಾರ್ಮಿಕಂಗ ವಾರಕ್ 48 ಗಂಟೆ ಮಾತ್ರ ಕೆಲಸ ಮಾಡಂಡೊಂದ್ ಭಾರತ ಸರಕಾರ ಘೋಷಣೆ ಮಾಡ್‌ಚಿ. ಇಂದ್ ಕಾರ್ಮಿಕಂಗಕ್ ಸರಕಾರ ಪಲತರ ಯೋಜನೆ ರೂಪ್‌ಚಿಟ್ಟಿತ್, ಎಲ್ಲ ಸೌಕರ್ಯ ಮಾಡಿಯಂಡ್.

## ಪತ್ರಿಕಾ ಸ್ವಾತಂತ್ರ್ಯ ದಿನ

### World Press Freedom Day

ಪತ್ರಿಕಾ ಸ್ವಾತಂತ್ರ್ಯ ಎಣ್ಣುವದ್ ಪ್ರತಿಯೋರ್ ಪತ್ರಿಕೆಕೂ ದುಂಬ ಅವಶ್ಯವಾನದ್. ದಾಡದೊ ಒತ್ತಾಯಕ್ ಕೆಣ್ಂಜಿತ್ ಪೊಟ್ವ್ ಸುದ್ದಿನ ಸತ್ಯ ಸುದ್ದಿರ ಮಾದರಿ ಅಲ್ಲೇಂಗಿ, ಸತ್ಯ ಸುದ್ದಿನ ಪೊಟ್ವ್ ಮಾಡುವದ್ ಪತ್ರಿಕಾ ಸ್ವಾತಂತ್ರ್ಯ ಅಲ್ಲ. ಸಾರ್ವಜನಿಕ ಹಿತಾಸಕ್ತಿಲ್ ಸತ್ಯತಾರ ಬಟ್ಟೆಲ್ ನಡಂದ್, ಸಮಾಜಕ್ ನಲ್ಲ ಬಟ್ಟೆ ಕಾಟುವದ್ ಪತ್ರಿಕಾ ಸ್ವಾತಂತ್ರ್ಯ ಎಣ್ಣೊಲು. ಒರ್ ಪತ್ರಿಕೆಕ್ ಘಟನೆರ ಸತ್ಯಾಸತ್ಯತೆನ ಎಳ್ವಾವ ಸ್ವಾತಂತ್ರ್ಯ ಇರಂಡೊಂದ್ ಮಾನವ ಹಕ್ಕು ಕಾಯ್ದೆರ 19ನೇ ಆರ್ಟಿಕಲ್‌ಲೇ ಉಂಡ್.

ಆಫ್ರಿಕಾತರ ಪತ್ರಕರ್ತಂಗ 1991ಲ್ ಪತ್ರಿಕಾ ಸ್ವಾತಂತ್ರ್ಯತರ ವಿಷಯತ್ ಎಳ್ವನ ಲೇಖನಕ್ ಒರ್ ಕಾಲ ದುಂಬನ ಮಾರೀಪತ್ ಮೇ 3ನ ಪತ್ರಿಕಾ ಸ್ವಾತಂತ್ರ್ಯ ದಿನಾಂದ್ ಆಚರಣೆ ಮಾಡಂಡೊಂದ್ ವಿಶ್ವಸಂಸ್ಥೆರ ಸಾಮಾನ್ಯ ಸಭೆ 1993ಲ್ ತೀರ್ಮಾನ ಎಡ್ತಂಡತ್. ಅದೇ ಪೋಲೆ ಮೇ ಮೂಂದನೇ ತಾರೀಖ್‌ನ ಎಲ್ಲಲ್ಲಿಯೂ ಪತ್ರಿಕಾ ಸ್ವಾತಂತ್ರ್ಯ ದಿನಾಂದ್ ಆಚರಣೆ ಮಾಡುವ.

ಇದೇ ದಿನತರಂದ್ ಯುನೆಸ್ಕೋ 'ಆ ಕಾಲತರ' ನಲ್ಲ ಎಳ್ವಕ್, ಎಳ್ವಕಾರಂಗ್ ಅಥವಾ ಒರ್ ಸಂಸ್ಥೆಕ್ ಇನಾಂ ಕೊಡ್ಪ. ಈ ಇನಾಂ ಕೊಲಂಬಿಯಾತರ ಪತ್ರಕರ್ತ ಗುಲೆರ್‌ಮೊಕ್ಯಾನೊ ಇಸಾರ್ಪು ಎಣ್ಣೊವವೊಂಡ ಗೇನತ್ ಕಾಲ ಕಾಲವೂ ಕೊಡ್ಪದಾಯಿತುಂಡ್. ಈ ಪತ್ರಕರ್ತ ಮಾದಕ ವಸ್ತು ಬಳಂಬುವ ಒರ್ ಗುಂಪರ ಬಗ್ಗೆ ಲೇಖನ ಎಳ್ವಾನಾಂಗ್ ಅಂವೊಂಡ ಆಫೀಸರ ಎದಿಕೆ 1986ರ ಡಿಸೆಂಬರ್ 17ಂಗ್ ಅಂವೊನ ಕೊಲೆ ಮಾಡ್ತಿಂಜತ್. ಪತ್ರಿಕಾ ಸ್ವಾತಂತ್ರ್ಯತನ ಏದ್ ಪತ್ರಕರ್ತಂಗಳೂ ದುರ್ಬಳಕೆ ಮಾಡ್ತಿರಡ್.

## ಅಂತರ್ರಾಷ್ಟ್ರೀಯ ಅಗ್ನಿಶಾಮಕ ದಳತ್ಯರ ದಿನ

### International Fire Fighter's Day

ಅಗ್ನಿ ಶಾಮಕ ದಳತ್ಯರ ದಿನ 1999ನೇ ಇಸವಿ ಜನವರಿ ನಾಲನೇ ತಾರೀಖ್ಲಾ ಆಸ್ಟ್ರೇಲಿಯಾ ದೇಶತ್ ಆನ ಬಲ್ಯ ತಿತ್ಯರ ಅಪಘಾತತ್ ಅಂಜಾಳ್ ಅಗ್ನಿಶಾಮಕ ದಳಕಾರ ಮರಣಪಟ್ಟತ್. ಅಯಿಂಡ ಗೇನತ್ ಮೇ 40ಗ್ ಅಂತರ್ರಾಷ್ಟ್ರೀಯ ಅಗ್ನಿಶಾಮಕ ದಳತ್ಯರ ದಿನಾಂದ್ ಆಚರಣೆ ಮಾಡುವ.

ಯುರೋಪ್ಲಾ ಈ ದಿನತ್ನ ಅಗ್ನಿಶಾಮಕ ದಳಕಾರಕ್ ಆಶ್ರಯ ಕೊಡ್ತಿಯಿಂಜ ಸೈಂಟ್ ಪೊಲ್ಲೀರಿಯನ್ರ ಗೇನಕಾಯಿತ್ ಸಾಂಪ್ರದಾಯಿಕ ಅಗ್ನಿಶಾಮಕ ದಳತ್ಯರ ದಿನಾಂದ್ ಆಚರಣೆ ಮಾಡುವ.

ಎಲ್ಲಿ ತಿತ್ಯರ ಅಪಘಾತ ಆಚಿಂಗೂ ಅಗ್ನಿಶಾಮಕ ದಳತ್ಯರ ನಂಬರ್ಕ್ ಪೋನ್ ಮಾಡ್ಚೀಂಗಿ ನೀರ್ ಟ್ಯಾಂಕ್ರ ವ್ಯವಸ್ಥೆವುಳ್ಳ ಬಲ್ಯ ಲಾರಿಲ್ ಇಡೀ 'ಟೀಂ'ಕಾರ ಬಂದ್ತುವ. ತಿತ್ಯನ ಕೆಡ್ತಿತ್, ತಿತ್ಯಲ್ ಕೆಣ್ಂಜಯಿಂಗಳ ರಕ್ಷಣೆ ಮಾಡುವ.

## ಅಂತರ್ರಾಷ್ಟ್ರೀಯ ರೆಡ್‌ಕ್ರಾಸ್ ದಿನ International Redcross Day

ಸ್ವಿಜರ್‌ಲ್ಯಾಂಡ್ ದೇಶತರ ಒರ್ ವ್ಯಾಪಾರಿ ಇಟಲಿಕ್ ಕೆಲಸತರ ವಿಷಯಕ್ ಪೋಯಿತಿಪ್ಪಕ ಅಲ್ಲಿ ಯುದ್ಧ (ಪಡೆ) ನಡಂದಂಡಿಂಜತ್. ಗಾಯ ಆಯಿತ್ ವಯಂಗಿಂಡಿಂಜ ಜನಡ ನೆರಕಾಟ, ಕೂತ್ ನೋಟಿತ್ ಮನಸ್ ಕಲ್‌ಂಗ್‌ಚಿ ಅಪ್ಪ-ಅಪ್ಪಂಡ ಪ್ರಭಾವತ್ ಚೆರಿಯ ಬಯತ್‌ಲೇ ಸೇವಾ ಮನೋಭಾವ ಇಂಜತ್. ಅಲ್ಲಿಯೇ ಇಂಜ ಜನಳ ಕೂಟಿಯಂಡ್ ಗಾಯ ಆನಯಿಂಡ ಸೇವೆಕ್ ನಿಂದತ್. ಅಯಿಂಡ ಗಾಯತ್‌ನ ಕತ್ತುವೊ, ಅಯಿಂಗಕ್, ನೀರ್, ಪಣ್ಣ್ ಎಡ್‌ತ ಬಂದಿತ್ ಕೊಡ್‌ಪೊ. ಇನ್ನನೆ ಸುಮಾರ್ ಸೇವೆ ಮಾಡ್‌ಚಿ. ಇಂವೊನೇ ಹೆನ್ರಿ ಡಾಂಟ್ 1862ಲ್ ಈ ಯುದ್ಧತರ ಬಗ್ಗೆ ಒರ್ ಪುಸ್ತಕ ಎಲ್ಚ್‌ಚಿ. 1863ಎಲ್ ಜವನಾ ಪಬ್ಲಿಕ್ ವೆಲ್‌ಫೇರ್ ಎಣ್ಣುವ ಸಂಸ್ಥೆ ಸಭೆ ಕೂಡಿತ್ ಹೆನ್ರಿ ಡಾಂಟ್‌ರ ಬಗ್ಗೆ ಚರ್ಚೆ ಮಾಡಿತ್ ಇನ್ನತ ಪರಿಹಾರ ಕಾರ್ಯಕ್ ಒರ್ ಸಂಸ್ಥೆ ಎನ್ನಂಗ್ ಮಾಡುವಕಾಗಾಂದ್ ಚರ್ಚೆ ಮಾಡಿತ್ 1864, ಆಗಸ್ಟ್ 22ನೇ ತಾರೀಖ್ 14 ದೇಶ ಇದಂಗ್ ಒತ್ತಿತ್ ಸೈನ್ ಇಟ್ಟತ್. ಇದೇ 'ರೆಡ್ ಕ್ರಾಸ್ ಸಂಸ್ಥೆ' ಆಯಿತ್ ಬೊಳ್‌ಂದತ್. ಇಂದ್ 176 ದೇಶಕಂಜ ಜಾಸ್ತಿ ದೇಶತಲ್ ಈ ರೆಡ್‌ಕ್ರಾಸ್ ಸಂಸ್ಥೆ ಕೆಲಸ ಮಾಡಿಯಂಡ್ ಉಂಡ್. ಎಲ್ಲೆಲ್ಲ ಪಡೆ, ಭೂಮಿ ಗುಡ್‌ಗುವೊ, ಬರ, ಕ್ಷಾಮ, ಪ್ರವಾಹ ಆಯಿತ್ ಕಷ್ಟ-ನಷ್ಟ ಆಪೊ ಅಲ್ಲಿಕೆಲ್ಲ ಈ ಸಂಸ್ಥೆರ ಸ್ವಯಂ ಸೇವಕಂಗ ಸೇವೆ ಮಾಡುವಕ್ ಎತ್ತುವ.

1901ಲ್ ಹೆನ್ರಿ ಡಾಂಟ್‌ಕ್ ನೋಬೆಲ್ ಶಾಂತಿ ಪುರಸ್ಕಾರ ಕ್‌ಟ್‌ಚಿ. ಹೆನ್ರಿ ಡಾಂಟ್‌ರ ಪುಟ್ಪನ ದಿನ ಆನ ಮೇ 8ನ ಪ್ರಪಂಚ ರೆಡ್‌ಕ್ರಾಸ್ ದಿನಾಂದ್ ಆಚರಣೆ ಮಾಡುವ.

# ಅಂತರಾಷ್ಟ್ರೀಯ ನರ್ಸಡ (ಆರೈಕೆಕರ್ತಿಯಡ) ದಿನ

## International Nurses Day

ಪ್ರತೀ ಕಾಲ ಮೇ ಪನ್ನೆರಂಡಾಂಗ್ ನರ್ಸಡ ದಿನಾಂದ್ ಆಚರಣೆ ಮಾಡುವ. ಅಯಿಂಗ ಈ ಸಮಾಜಕಾಯಿತ್ ಮಾಡುವ ಸೇವೆನ ನೆನತಿಯಂಡ್ ಈ ದಿನತನ ಆಚರಣೆ ಮಾಡುವದಾಯಿತುಂಡ್. ಅಂತರಾಷ್ಟ್ರೀಯ ನರ್ಸಡ ಮಂಡಳಿ (International Council of Nurses) ಈ ಆಚರಣೆನ 1965ಲ್ ಶುರು ಮಾಡ್ಚಿ. 1953ಎಲ್ ಅಮೇರಿಕಾತ್ ಆರೋಗ್ಯ, ಶಿಕ್ಷಣ ಪಿಂಞ ಕಲ್ಯಾಣ ಇಲಾಖೆಲ್ ದೋರೋತಿ ಸದರ್ಲ್ಯಾಂಡ್ ಎಣ್ಣುವ ಅಧಿಕಾರಿ ಆದ್ಯತ್ ಈ ಆಚರಣೆಕ್ ಬಂದ್ಲೆ. ಬಯ್ಯಂಜಿ 1974 ಜನವರಿಲ್ ಆಧುನಿಕ ನರ್ಸಿಂಗ್ ಸ್ಥಾಪಕಿ ಆನಂತ ಫ್ಲಾರೆನ್ಸ್ ನೈಟಿಂಗೇಲ್ ಪುಟ್ವಿನ ದಿನ ಆನ ಮೇ 12ಂಗ್ ನಡ್ತುವೊಂದ್ ಎಲ್ಲರೂ ತೀರ್ಮಾನ ಎಡ್ತಂಡತ್. ಆಚೆಂಗೂ ಒರೊಂದ್ ಜಾಗತ್ ಮೇ 21ಂಗ್ ಮಾಡಂಡೂಂದ್ ಸಲಹೆ ಮಾಡ್ಚಿ. ಮೇ 21 ಎಲಿಝಬೆತ್ ಫ್ಲೈ ಎಣ್ಣುವಯಿಂಡ ಪುಟ್ವಿನ ದಿನ. ಇಯಂಗ ನರ್ಸ್ ತರಬೇತಿ ಸಂಸ್ಥೆ ಸ್ಥಾಪನೆ ಮಾಡ್ತನವು. ಕೂಟ್ ಚೈಲ್ಡ್ಲುಳ್ಳ ಕೈದಿಯಳ ಆರೈಕೆ ಮಾಡಿತ್ ಪೆದ ನೇಡ್ತನವು. ಅನ್ನನೇ ಮೇ 8ಂಗ್ ವಿದ್ಯಾರ್ಥಿ ಆಯಿತುಳ್ಳ ನರ್ಸಡ ದಿನಾಚರಣೆ ನಡುತ್ವ.

ಮೇ 12ಂಗ್ ಲಂಡನ್ ವೆಸ್ಟ್ ಮಿನ್ಸ್ಟರ್ ಲ್ ಈ ದಿನತನ ವಿಶೇಷ ರೀತಿಲ್ ನಡ್ತುವ. ಒರ್ ಬೊಳ್ಚತೆನ ಒರ್ ನರ್ಸ್ ಕೈಜ ಇಂಞೋರ್ ನರ್ಸ್ ಕೈಕ್ ಕೊಡ್ತಂಡ್ ಪೋಪೊ. ಆಖೀರಿಕ್ ಆ ಬೊಳ್ಚ ಅಲ್ಲಿಯತ್ ಮುಖ್ಯಸ್ಥಂಗಡ ಕೈಕ್ ಪೋಪ. ಅಲ್ಲಿಂಜ ಅದ್ನ ದೇವಡ ಸ್ಥಾನತ್ ಬೆಪ್ಪ. ಇದಂಡ ಅರ್ಥ ಜ್ಞಾನ ಎಣ್ಣುವ ಬೊಳ್ಚ ಒಬ್ಬಡ ಕೈಜ ಇಂಞೊಬ್ಬಕ್ ಪೋಂಡು. ಎಣ್ಣಕ ಒಬ್ಬಂಡ ಕೈಜ ಇಂಞೊಬ್ಬ ಪಡ್ಚೋವಂಡೂಂದ್. ಇದೇ ತರತರ ಆಚರಣೆ ಫ್ಲಾರೆನ್ಸ್ ನೈಟಿಂಗೇಲ್ ಸಮಾಧಿ ಉಳ್ಳ ಜಾಗ, ಸೈಂಟ್ ಮಾರ್ಗರೆಟ್ ಚರ್ಚ್, ಈಸ್ಟ್ ವೆಲ್ಸೊ, ಹ್ಯಾಮಶೈರ್ ಇಲ್ಲಿಯೂ ಅವಡ ಪುಟ್ವಿನ ದಿನ (ಮೇ 12) ಕಯಿಂಜಾಂಡ ಮಿಞಕ್ ಕಟ್ಟುವ ನಾರಾಚೆರಂದ್ ನಡ್ತುವ.

ಇಂದೂ ಬೋಂಡಿಯಚ್ಚಕ್ ನರ್ಸಿಂಗ್ ತರಬೇತಿ ಸಂಸ್ಥೆ ಉಂಡ್. ಅಲ್ಲಿ ಪಡ್ಚಂಡುಳ್ಳ ಲಕ್ಷಾಂತರ ವಿದ್ಯಾರ್ಥಿಯ ಉಂಡ್. ಅಯಿಂಗಡಾತ್ ಎಚ್ಚಕ್ ಜನ ಸಮಾಜ ಸೇವೆ, ರೋಗಿಯಡ ಸೇವೆರ ಉದ್ದೇಶತ್ ಪೋಪ ಎಣ್ಣುವದ್ ಅಯಿಂಡಯಿಂಡ ಅಂತರಾತ್ಮಕ್ ಬುಟ್ಟಿ ವಿಷಯ. ಆಚೆಂಗೂ ರೋಗಿಯಡ ಸೇವೆ, ದೇವಡ ಸೇವೆ ಎಣ್ಣೆತ್ ಮಾಡುವದ್ ಬಲ್ಯ ತರತರ ಸೇವೆ. ರೋಗಿಯಳ ಮಾನವೀಯ ದೃಷ್ಟಿಲ್ ಕಂಡಿತ್ ಸೇವೆ ಮಾಡ್ಚೆಂಗಿ ಈ ನರ್ಸಡ ಅಂತರಾಷ್ಟ್ರೀಯ ದಿನ ಆಚರಣೆ ಮಾಡುವದ್ ಅರ್ಥಪೂರ್ಣವಾಯಿತ್ ಇಪ್ಪ.



## ಪ್ರಪಂಚ ದೂರ ಸಂಪರ್ಕ ದಿನ World Telecommunication Day

ಪ್ರಪಂಚ ದೂರ ಸಂಪರ್ಕ ದಿನತ್ನ, ವಿಶ್ವ ಸುದ್ದಿ ಸಂಸ್ಥೆರ ದಿನಾಂದ್ ಆಚರಣೆ ಮಾಡಂಡೂಂದ್ 2005ನೇ ಇಸವಿಲ್ ಟ್ಯೂನಿಸ್‌ಲ್ ನಡ್ಂದ ವಿಶ್ವ ಸಮ್ಮೇಳನತ್ ನಿರ್ಧಾರ ಮಾಡ್ಚಿ. ಇದಂಡ ಆದ್ಯ ಆಚರಣೆ 2006ನೇ ಇಸವಿಲ್ ನಡ್ಂದತ್. ಬಯ್ಯಂಜಿ ವಿಶ್ವ ದೂರ ಸಂಪರ್ಕ ಸಂಘಕಾರ ಪ್ರಪಂಚ ದೂರ ಸಂಪರ್ಕ ದಿನಾಂದೇ ಮಾಡ್ಚಿ.

ಈ ಆಚರಣೆರ ಮೂಲ ಉದ್ದೇಶ ಜನಡಲ್ಲಿ ಅರಿವಿಕೆ ಕೊಂಡಬಪ್ಪದೇ ಆಯಿತಿಂಜತ್. 1963 ಪಿಂಞ 1964ಲ್ ಸಿಂಕಾಂ-1 ಸಿಂಕಾಂ-2, ಸಿಂಕಾಂ-3 ಉಪಗ್ರಹತ್ನ ಆದ್ಯತ್ ಆಕಾಶತ್ ಸ್ಥಾಪನೆ ಮಾಡ್ಚಿ. ಅಲ್ಲಿಂಜ 1984ಲ್ 22 ಸಂಪರ್ಕ ಉಪಗ್ರಹತ್ನ ಆಕಾಶಕ್ ಅಯೆಚತ್. ಇಂದಿಕ್ಕ ಬಾನತ್ ಅದೆಚ್ಚಕ್ ಸಂಪರ್ಕ ಉಪಗ್ರಹ ಉಂಡ್ಂದೇ ಎಣ್ಣುವಕ್ ಕಯ್ಯಲೆ. ಇಂದ್ ಭಾರತತ್ ದೂರ ಸಂಪರ್ಕ ಕ್ರಾಂತಿಯೇ ಆಯಿತ್ಂದ್ ಎಣ್ಣಲು. ಇನ್‌ಸ್ಮಾಟ್ ಸರಣಿ ಉಪಗ್ರಹ ಅಯೆಚಿ ಪಿಂಞ ದೂರ ದೇಶ ಎಲ್ಲ ಪಕ್ಕ ಆಯಿಪೋಯಿತ್. ಸುರೂಲ್ ಎಸ್‌ಟಿಡಿ (ಸಬ್ ಸ್ಟ್ರೈಬರ್ಸ್ ಟ್ರಿಂಕ್ ಡಯಲಿಂಗ್) ಐಎಸ್‌ಡಿ (ಇಂಟರ್ ನ್ಯಾಷನಲ್ ಸಬ್‌ಸ್ಟ್ರೈಬರ್ಸ್ ಡಯಲಿಂಗ್) ಇಂಜತ್. ಇಕ್ಕ ಇಂಟರ್‌ನೆಟ್ ಮೊಬೈಲ್ ಕ್ರಾಂತಿಯೇ ಆಯಿಪೋಯಿತ್. ಹಳ್ಳಿ ಹಳ್ಳಿಕೂ ಮೊಬೈಲ್ ಎತ್ತಿತ್ ಪ್ರತಿ ಮನುಷ್ಯನ ಪಕ್ಕ ಬಪ್ಪಚಿಟ್ಟಿತ್.

ದೇಶ ಎಚ್ಚಕ್ ಮಟ್ಟಿಕೆ ಅಭಿವೃದ್ಧಿ ಆಯಂಡುಂಡ್ಂದ್ ಅರಿವಕ್ ದೂರ ಸಂಪರ್ಕ ಕ್ರಾಂತಿನ ನೋಟ್‌ಚೇಂಗಿ ಗೊತ್ತಾಪ.

## ಅಂತರ್ರಾಷ್ಟ್ರೀಯ ಕುಟುಂಬ ದಿನ International Day for Biological Diversity

ಇಲ್ಲಿ ಕುಟುಂಬ ಎಣ್ಣೆಕ ಮನುಷ್ಯಂಡ ಸಂಸಾರ ಎಣ್ಣೆಕ ಅರ್ಥ ಅಲ್ಲ. ಭೂಮಿಲುಳ್ಳ ಎಲ್ಲ ಕುಟುಂಬ ಎಣ್ಣೆಕ ಜೀವ ವೈವಿಧ್ಯ (Bio-Diversity) ಮನುಷ್ಯನೂ ಕೂಡಾನನ್ನೆ 'ವಸುದೈವ ಕುಟುಂಬಕಂ' ವಿಶ್ವವೇ ಒರ್ ಕುಟುಂಬ ಎಣ್ಣೆಕ ಅರ್ಥ ಬಪ್ಪನ್ನತದ್.

ಈ ಆಚರಣೆ 1993ಲ್ ಸುರುವಾಚಿ. ಅಲ್ಲಿಂಜ 2000 ಇಸವಿಕತ್ತನೆಯೂ ಡಿಸೆಂಬರ್ 29ಂಗ್ ಆಚರಣೆ ಮಾಡುವಯಿಂಜತ್. ಬಯ್ಯಂಜಿ ಇದನ 1992ನೇ ಇಸವಿ ಮೇ 22ಲ್ ರಿಯೋ-ಡಿ-ಜನೈರೊತ್ ನಡ್ಂದ ವಿಶ್ವ ಭೂಮಿ ಸಮ್ಮೇಳನತ್‌ರ ನೆಪ್ಪಾಯಿತ್ ಪ್ರತಿ ಕಾಲ ಮೇ 22ಂಗೇ ಆಚರಣೆ ಮಾಡುವನ್ನೆ ವಿಶ್ವಸಂಸ್ಥೆರ ಸಭೆಲ್ ತೀರ್ಮಾನ ಎಡ್ತಂಡತ್.

ಈ ಆಚರಣೆರ ಮೂಲ ಉದ್ದೇಶ ನಿಂಗಲೂ ಬದ್ಕಂಡು. ಭೂಮಿಲುಳ್ಳ ಬೋರೆ ಜೀವಿಯಲೊ ಬದ್ಕುವಕ್ ಬುಡಂಡೂಂದ್. ಪರಿಸರ ನಾಶ ಆಚೆಂಗಿ ಭೂಮಿಲುಳ್ಳ ಒರೋಂದೆ ಜೀವಿಯ ನಾಶ ಆಯಿಂಡ ಬಪ್ಪ ಭೂಮಿಲುಳ್ಳ ಪ್ರತಿಯೋರ್ ಜೀವಿಯೂ ಒಬ್ಬೊ ಇಇ್ಲೊ ಬ್ಬಂಗಾಯಿತ್ ಎಣ್ಣೆಕ ವನ್ನೆ ಬದ್ಕಚೆಂಗಿ ಈ ದಿನಾಚರಣೆಕ್ ಸಾರ್ಥಕತೆ ಕೊಟ್ಟುವ.

# ಪ್ರಪಂಚ ಪೇತೊಪ್ಪ್ ವಿರೋಧಿ ದಿನ

## World No Tobacco Day

ಪ್ರತೀ ಕಾಲ ಮೇ 31ನೇ ತಾರೀಖ್ ಪ್ರಪಂಚತ್ಲೆಲ್ಲ ಪೇತೊಪ್ಪ್ ಇಲ್ಲತ ದಿನಾಂದ್ ಆಚರಣೆ ಮಾಡುವ. ಈ ದಿನತ್ಲೆನ ವಿಶ್ವ ಆರೋಗ್ಯ ಸಂಸ್ಥೆರ ಆದನೆಲ್ 1987ಲ್ ಆದ್ಯ ಆಚರಣೆ ಶುರು ಮಾಡ್ಚಿ.

ಇಡೀ ಪ್ರಪಂಚತ್ ಅದೆಚ್ಚಕೊ ಜನ ಪೇತೊಪ್ಪ್ನ ಬಳಸುವ. ಇದನುಂಡ್ ಬೋರೆ ಬೋರೆ ತರತರ ಕಾಯಿಲಕ್ ಮೊಳಿ ಆಪ. ಈ ಪೇತೊಪ್ಪ್ ಮೂಲತರ ಕಾಯಿಲತ್ಲೆ ಪ್ರಪಂಚತ್ ಒರ್ ಕಾಲಕ್ 3.5 ಮಿಲಿಯನ್ ಜನ ಚಾವ. ಅದನುಂಡ್ ಜನಕ್ ಅರಿವಿಕೆ ಕೊಡ್ಪಕ್ ಮಾಡುವ ಆಚರಣೆ ಇದ್.

ಸಿಗರೇಟ್, ಬೀಡಿ, ಗುಟ್ಯಾ, ಚುಟ್ಟಿ, ಕಡ್ಡಿಪೊಡಿ ಇಂಗಳೂ ಏದೆಲ್ಲೊ ತರತ್ ಈ ಪೇತೊಪ್ಪ್ನ ಬಳಸುವ ಜನ, ಶ್ವಾಸಕೋಶತರ ಕ್ಯಾನ್ಸರ್, ಬಾಯಿ ಕ್ಯಾನ್ಸರ್‌ರನ್ನತ ಪಲತರತರ ಕಾಯಿಲಕ್ ಗುರಿಯಾಪ. ಆಚರಣೆ ಮಾಡಿಟ ಮಾತ್ರಕ್ ಪೇತೊಪ್ಪ್ ಬಳಕೆ ಇಲ್ಲತೆ ಆಪ್ಲೆ. ಅದ್ಂಡ ದುಶ್ಚಟಕ್ ಬಲಿಯಾನಯಿಂಗ ಕೂಳಿಲ್ಲತೆ ಬೋಂಡೆಂಗೂ ಇಪ್ಪ ಆಚೆಂಗಿ ಪೇತೊಪ್ಪ್ ಇಲ್ಲತೆ ಇಪ್ಪಲೆ. ಅಂದೆತ್ಲೆ ಒರ್ ದಿವಸ ಆಚೆಂಗೂ ಇಂದ್ ಮೇ 31, ನಂಗ ಬೀಡಿ, ಸಿಗರೇಟ್, ಗುಟ್ಯಾ ಮಾರುಲೆಂದ್ ಎಣ್ಣವಾ? ಇಲ್ಲೆ. ಅನ್ನನೇ ಅದ್ನ ಬಳಕೆ ಮಾಡುವಯಿಂಗ ಆಚೆಂಗೂ ಇಂದೇ ನಂಗ ಪೇತೊಪ್ಪ್ ತಿಂಬಾನ ನಿಪ್ಪಾಚಿಡಂಡೂಂದ್ ಮನ್‌ಸ್ ಮಾಡುವಾ? ಇಲ್ಲೆ. ಅಂದಕ ಪಿಂಞ ದಿನಾಚರಣೆನುಂಡ್ ಎನ್ನ್ ಲಾಭ?

ದಿನಾ ಟಿವಿಲೂ, ಪತ್ರಿಕೆಲೂ ಆರೋಗ್ಯತರ ಬಗ್ಗೆ, ದುಶ್ಚಟಕ್ ಬಲಿಯಾನಯಿಂಗ ವಯಂಗುವ ಬಗ್ಗೆ ಎಣ್ಣವ, ಎಳ್ವವ, ಕಾಟುವ. ಆಚೆಂಗೂ ಎಚ್ಚರಾಗತ ಜನ ನಂಗ ನಿಂಗಡ ಮಧ್ಯತ್ ಇಪ್ಪಕ ಕೇವಲ ಆಚರಣೆ ಮಾಡ್ನಕ ಮದಿಯಾ? ಮನುಷ್ಯಂಡ ಮನ್‌ಸ್ ಬದಲಾಂಡು. ಸಂಕಲ್ಪ ಶಕ್ತಿ ಜಾಸ್ತಿಯಾಂಡು. ಪೇತೊಪ್ಪ್ನ ನಲ್ಲರಿಕೆಕ್ ಮಾತ್ರ ಬಳಸೊಂಡು.

ಮೇ ತಿಂಗಳ್ ದಂಡನೆ ನಾರಾಚಿ

## ಅವ್ವಂಗಡ ದಿನ

### Mother's Day

ಒರ್ ಕುಂಞಿರ ಬೊಳಚೆಲ್ ಅವ್ವಂಡ ಪಾತ್ರ ಪ್ರಧಾನವಾನದ್. ಒಯಿಂಬದ್ ತಿಂಗ ಪೊರ್ತಿತ್, ಪತ್ತಿತ್, ಚಾಕಿತ್ ತಕ್ಕ ಪಡ್ಪಾಚಿಟ್ಟಿತ್ ಅಕ್ಕರ ತಿದ್ದ್ ಚಿಟ್ಟಿತ್ ಸ್ಕೂಲ್ ಅಯೆಪ. ಅಲ್ಲಿಂಜ ಕುಂಞಿರ ಭವಿಷ್ಯತ್ ಚಿಂತೆ. ನಾಡ ಕುಂಞಿರ ನಲ್ಲಂವೊನಾಂಡು, ನಲ್ಲ ಪೆದ ಎಡ್ಕಂಡು, ಸಮಾಜತ್ ನಲ್ಲದಾಯಿತ್ ಬಾವಂಡೂಂದೆಲ್ಲ ಸೊಪನ ಕಾಂಬ. ತಾಂಡ ವಿಷಯ ಒಂದೂ ಗೇನ ಮಾಡತನ್ನನೆ ಮಕ್ಕಡ ಭವಿಷ್ಯಕಾಯಿತ್ ನಯಿಪ ಅವ್ವಂಗಕ್ ಬಯ್ಯಂಜಿ ಮಕ್ಕ ಎಂತ ಕೊಡ್ಪ?

ಶುಭಾಶಯ ಕಾರ್ಡ್ ಕೊಡ್ತಿತೊ, ಕೊದಿಮೊದ ಕೊಡ್ತಿತೊ ಅವ್ವಂಗಡ ದಿನ ಆಚರಣೆ ಮಾಡಿಟಕ ಮದಿಯ? ಪ್ರತೀ ಮಕ್ಕಳೂ ಅವ್ವ ಜೀಂವತ್ ಇಪ್ಪಲ್ಲಿಕೆತ್ತನೆಯೂ ಚಾಯಿಲ್ ನೋಟಿಯೋವೀಂದ್ ತಾಂಗ್ ತಾನೇ ಪ್ರತಿಜ್ಞೆ ಮಾಡಿಯೋಂಡು. ಸರಕಾರ ಸಂಸಾರ ಚೆರಿಯದ್ ಮದೀಂದ್ ಎಣ್ಣೆ ತಿಕ್ಕು ಅಪ್ಪವ್ವನ ನೋಟಿಯೋತೀಂದ್ ಎಣ್ಣೆತ್ಲೆಲ್ಲ? ದೇವ ಎಲ್ಲಡ ಕೂಡೊ ಇಪ್ಪಕ್ ಕಯ್ಯುಲೇಂದ್ ಅವ್ವನ ಸೃಷ್ಟಿ ಮಾಡ್ಚಿಲೊ, ಅಂತ ಅವ್ವಂಗಳ ಕಣ್ಣೀರ್ಡ್ ಚಿಟ್ಟಿಂಡುಳ್ಳ ಮಕ್ಕ ಎಚ್ಚಕೋ ಉಂಡ್. ಅವ್ವಂಗಡ ದಿನಾಚರಣೆ ಮಾಡಂಡೂಂದಾಚೇಂಗಿ ಅವ್ವಂಗಳ ಚಾಯಿಲ್ ನೋಟಿಯೋಂಡು ಜೀಂವತ್ ಇಪ್ಪಕಲೆ. ಚಿತ್ತ ಪಿಂಞ ಅವ್ವಂಗ್ ಅದ್ ಆಸೆ, ಇದ್ ಆಸೆಂದ್ ಮೀದಿ ಬೆಪ್ಪಂಗಿಂಜ ಅವ್ವ ಕಣ್ಣ್ ಮಿಂಞತ್ ಇಪ್ಪಕಲೆ ಅವಕ್ ಆಸೆ ಉಳ್ಳಾನ ಕೊಡ್ತಿತ್ ನೆಮ್ಮದಿಲ್ ಬಾವನ್ನಕೆ ಮಾಡಂಡು. ಇದ್ ನೇವಾನ ಅವ್ವ ದಿನಾಚರಣೆ.

ಮೇ - 21

## ಉರ್ತಮಾರಿಯಡ ವಿರೋಧಿ ದಿನ

### Anti - Terrorism Day

ಈ ದಿನಾಚರಣೆ ಭಾರತ ದೇಶಕ್ಕೆ ಸೀಮಿತವಾದ ಆಚರಣೆ. ನಂಗಡ ದೇಶತರ ಚೆರಿಯ ಬಯತ್ ಪ್ರಧಾನಿಯಾಯಿಶಿಂಜ ಶ್ರೀ ರಾಜೀವ್ ಗಾಂಧಿನ ತಾಂಡ ತಡಿಲ್ ಬಾಂಬ್ ಬೆಚ್ಚಂಡ್ ಬಂದ ಒರ್ ಪೊಣ್ಣಾಳ್ ಮೇ -21 ಲ್ ಚೆನ್ನೆರ ಶ್ರೀ ಪೆರಂಬದೂರ್ ಎಣ್ಣವ ಜಾಗತ್ ಏದೋ ಒರ್ ಕಾರ್ಯಕ್ರಮಕ್ ಪೋಯಿತಿಪ್ಪಕ ಪೂಮಾಲೆ ಇಟ್ಟಿತ್, ಕಾಲ್ಕ್ ಬಗ್ಗಿತ್ ತಾಂಡ ಶರೀರೋಡೆ ಸ್ಪೋಟ ಮಾಡಿಯಂಡತ್. ಇವಡ ಪೆದ ಧನು. ಇವ ಎಲ್ಟಿಟಿಇ ಸಂಘಟನೆಕ್ ಕೂಡ್ನವ ಆಯಿಶಿಂಜತ್. ಇಂದಿಕ್ ಶ್ರೀಲಂಕಾ ಸರಕಾರ ಎಲ್ಟಿಟಿಇ ರ ಕೂಡ ಯುದ್ಧ ಮಾಡಿತ್ ಅಯಿಂಗಳ ಮಟ್ಟಿ ಮಾಡ್ಚಿ. ಇನ್ನೆ ದೇಶದ್ರೋಹತರ ಕೆಲಸ ಮಾಡುವ ಉರ್ತಮಾರಿಯಳ ಮಂಡೆ ನೇತುವಕ್ ಬುಡವಕಾಗಾಂದೆಣ್ಣವದೇ ಈ ದಿನಾಚರಣೆರ ಉದ್ದೇಶ.

ದಿನ ದಿನಕೂ ಅದಿ ಆಯಂಡುಳ್ಳ ಉರ್ತಮಾರಿಯಡ ಹಾವಳಿನ್ಮಂಡ್ ಎಚ್ಚಕೋ ಜನ ಬಲಿ ಆಯಿರತ್. ಇದ್ನ ತಡ್ಕಂಡು ಎಣ್ಣಕ ನಂಗಡ ದೇಶತರ ಬಾಲೆಕಾರ ಪಣತರ ಆಸೆಕಾಯಿತ್ ಉರ್ತಮಾರಿಯಡ ಕೂಡ ಕೂಡುವದ್ ನಿಪ್ಪಚಿಡಂಡು. ದೇಶಕ್ ನಲ್ಲ ಉಪಕಾರಿಯಳಾಯಿತ್ ಬಾಲೆಕಾರ ಬದ್ಕಂಡು, ಅಕ್ಕ ನಂಗಡ ದೇಶ ಸುಭಿಕ್ಷ ಆಪ, ಅಭಿವೃದ್ಧಿಯೂ ಆಪ.

ಜೂನ್ - 8

## ಪ್ರಪಂಚ ಮಹಾಸಾಗರ ದಿನ World Ocean Day

1992ಲ್ ರಿಯೋ-ಡೀ ಜನೈರೋತ್ ನಡೊಂದ ಭೂಮಿ ಸಮ್ಮೇಳನತ್ ಪ್ರತೀ ಕಾಲ ಜೂನ್ 8ನೇ ತಾರೀಖ್‌ಲ್ ವಿಶ್ವ ಮಹಾಸಾಗರ ದಿನ ಆಚರಣೆ ಮಾಡುವನ್ನಕೆ ನಿರ್ಧಾರ ಆಚಿ. ಇದೊಂಡ ಮೂಲ ಉದ್ದೇಶ ಮಹಾ ಸಮುದ್ರತ್‌ನೆಲ್ಲ ಪಾಳ್ ಮಾಡುವಕಾಗಾಂದ್.

ಸಮುದ್ರತಿಂಜ ನಂಗಕ್ ಫಲತರತ್‌ರ ಮೀನ್ ತೀನಿ ಕೊಟ್ಟಿವ. ಅಂತರ್ರಾಷ್ಟ್ರೀಯ ವ್ಯಾಪಾರ ಮಾರ್ಗವೇ ಈ ಸಮುದ್ರ ಆಯಿತುಂಡ್. ಸಮುದ್ರತ್‌ಲುಳ್ಳ ಎಚ್ಚಕೋ ತರತ್‌ರ ಜೀವರಾಶಿನ ಸುಮಾರ್‌ಕ್ ನಂಗ ಖಾಲಿ ಮಾಡಿಯಂಡುಂಡ್. ಪವಳ, ಮುತ್ತ್ ಕೊಟ್ಟಿವ ಜಾಗತ್‌ಲಂತೂ ಜಾಲಾಡಿತ್ ಪಾಳಾಕಿಯಂಡುಂಡ್. ಸಮುದ್ರತ್ ಭೂಮಿರ ಮೇಲೆ ಉಳ್ಳಾಂಗಿಂಜ ಜಾಸ್ತಿ ಜೀವ ವೈವಿಧ್ಯ ಉಂಡ್. ಅದೊನ ಸಹ ಉಳಾತಿಯಂಡ್ ಪೋಪದ್ ನಂಗಡ ಕರ್ತವ್ಯ.

ಜೂನ್ - 4

## ಆಕ್ರಮಣಕ್ ಒಳಗಾನ ಮುಗ್ಧ ಮಕ್ಕಡ ದಿನ International day of Innocent Children Victims of Aggression

ಪ್ರಪಂಚತ್ ಎಚ್ಚಕೋ ಪಾಪತ ಮಕ್ಕ ಪರಿಸ್ಥಿತಿರ ಒತ್ತಡಕ್ ಕಣ್‌ಂಜಿತ್ ತಪ್ಪು ಮಾಡುವ. ಅಯಿಂಗಳ ಬಾಲಾಪರಾಧಿಯಾಂದ್ ಗುರುತ್ ಬೆಚ್ಚಿತ್ ರಿಮ್ಯಾಂಡ್ ಹೋಂಕ್ ಅಯಿಪ. ಕೆಲವು ಮಕ್ಕ ಅಲ್ಲಿ ತಪ್ಪುನ ತಿದ್ದಿಯಂಡ್ ಚಾಯಾಪ. ಇಂಞಿ ಚೆನ್ನ ಮಕ್ಕ ಅಲ್ಲಿಯೂ ಚಾಯಾಕತೆ ಬದ್‌ಕ್‌ನೇ ಪಾಳಾಕಿಯೋವ.

ಪೆರಿಯಯಿಂಗ ಮಕ್ಕಡ ತಪ್ಪು ಕಾಂಬಕ ತಾಳ್ ಕಳೊಂದೋವಕಾಗ. ಅಯಿಂಗಳ್ ನಲ್ಲ ಮಾರ್ಗದರ್ಶನ ಕೊಡೊಕಂಡು.

## ಪ್ರಪಂಚ ಪರಿಸರ ದಿನ World Environment Day

ಪ್ರತೀ ಕಾಲ ಜೂನ್ 5ನೇ ತಾರೀಖ್ ವಿಶ್ವ ಪರಿಸರ ದಿನ ಆಚರಣೆ ಮಾಡುವ. ವಿಶ್ವ ಸಂಸ್ಥೆ ಆದನೆಲ್ ಆದ್ಯವಾಯಿತ್ 1972ನೇ ಇಸವಿಲ್ ಆಚರಣೆ ಸುರುಮಾಡ್ಚಿ. ಇದೇ ದಿನತ್ ನಂಗಡ ದೇಶತ್ 'ವನಮಹೋತ್ಸವ' ಆಚರಣೆ ಮಾಡಿತ್ ಗಿಡ ನಡಪ.

ಈ ದಿನಾಚರಣೆರ ಮೂಲ ಉದ್ದೇಶ ಪರಿಸರತ್ ಚಾಯಿಲ್ ಬೆಚ್ಚೋವದ್. ವಿಶ್ವ ಪರಿಸರ ದಿನ ಎಣ್ಣಿಯಂಡ್ ಗಿಡ ನಟ್ಟಿತ್ ಬುಟ್ಕಾರ್ತೇಂಗಿ ಪೋರ. ಒರ್ ಗಿಡತ್ ಮರವಾಯಿತ್ ಬೊಳ್ತುವ ಜವಾಬ್ದಾರಿನ ಎಡ್ತೋವಂಡು. ಮರ ನಡಪ ಕಾರ್ಯಕ್ರಮ ಮಾತ್ರ ಪರಿಸರ ಚಾಯಿಕೂಟುವದಲ್ಲ. ಶೌಚಾಲಯ ಉಪಯೋಗ ಮಾಡುವದ್, ಪ್ಲಾಸ್ಟಿಕ್ ಬಳಕೆ ಆಪಚ್ಚಕ್ ಕಮ್ಮಿ ಮಾಡುವದ್ ನೀರ್ನ ಪೋಲ್ ಮಾಡತಿಪ್ಪದ್ ಇನ್ನನೆ ಅದೆಚ್ಚಕೊ ವಿಷಯತ್ ಪರಿಸರ ಜ್ಞಾನ ಮನುಷ್ಯಂಗ್ ಬೋಂಡು. ಪರಿಸರ ಚಾಯಿಲಿಂಜಕ ಮಾತ್ರ ಮನುಷ್ಯಂಡ ಬಾಳ್ ನಂದಾಪೊ. ಅಂದೆತ್ ದಿನ ಕಾರ್ಯಕ್ರಮ ಮಾಡಿತ್, ಭಾಷಣ ಮಾಡ್ಚೇಂಗಿ ಆಚರಣೆ ಸಾರ್ಥಕ ಆಪಾಲೆ. 'ಸಾಲು ಮರದ ತಿಮ್ಮಕ್ಕ'ಂಡನ್ನನೆ ಎಲ್ಲರೂ ಮನ್ಸ ಮಾಡಂಡು.

ಕೈಗಾರಿಕಾ ಕ್ರಾಂತಿನುಂಡ್ ಅಪಾಯಕಾರಿ. ಅನಿಲ, ನೀರ್ ಭೂಮಿರ ಪರಿಸರ ಎಲ್ಲ ನಾಶ ಆಯಂಡುಂಡ್. ಅದಂಗ್ ಪರಿಹಾರ ಎಣ್ಣಿಕ್ ಆಪಚ್ಚಕ್ ಮರ ನಡಪದ್. ಒರ್ ಮರ ಕೆತ್ತ್ಚೇಂಗಿ ಪತ್ತ ಮರ ನಡಪದ್ ಸಮಾಜಕೊ, ಪರಿಸರಕೊ ನಲ್ಲದ್.

ಜೂನ್ - 12

## ವಿಶ್ವ ಬಾಲಕಾರ್ಮಿಕ ವಿರೋಧಿ ದಿನ

### World Day Against Child Labour

ಮಕ್ಕಳು, ಬಾಲ್ಯ ಎಣ್ಣುವ ಚೋದಾರ ಬಯತ್‌ನ ಅರಿಯತೆ ಬಲ್ಯಯಿಂಗ ಅಯಿಂಗಲ ಗುಲಾಪುಂಗಲಾಯಿತ್ ಮಾಡಿಯೋವದ್ ತಪ್ಪ್, ಮಕ್ಕಕ್ ಏದೇದ್ ಬಯತ್‌ಲ್ ಎನ್ನತೆನ್ನತ ಕ್ಕಟ್ಟುಂಡು ಎಣ್ಣುವ ಮಕ್ಕಡ ಹಕ್ಕು ಉಂಡ್. ಅದೆಲ್ಲ ಅಯಿಂಗಕ್ ಕ್ಕಟ್ಟಿತೇ ಕ್ಕಟ್ಟುಂಡು. ಕ್ಕಟ್ಟುವನ್ನಕೆ ಈ ಸಮಾಜ ಮಾಡುಂಡು.

ಮಕ್ಕಕ್ ತಿಂಬಕ್ ನಲ್ಲ ತೀನಿ, ಉಡ್‌ಪಕ್ ಬಟ್ಟೆ, ಓದುವಕ್ ಸ್ಕೂಲ್ ಇನ್ನತದೆಲ್ಲ ಮಕ್ಕಡ ಹಕ್ಕು. ಅನ್ನತಲ್ಲಿ ಚೆರಿಯ ಮಕ್ಕಳ ಮನುಷ್ಯ ತಾಂಡ ಸ್ವಾರ್ಥಕಾಯಿತ್ ಕೆಲಸಕ್ ಆಕಿಯಂಡ್ ಅಯಿಂಡ ಬದ್‌ಕ್‌ನ ಪಾಳಾಕುವಕಾಗ. ಕೆಲಸಕ್ ಆಕಿಯೋದಲ್ಲತೆ ಅಯಿಂಗಲ ಪೊಜ್ಜಿತೂ, ಬಜ್ಜಿತೂ, ಲೈಂಗಿಕ ಕಿರುಕುಳ ಕೊಡ್‌ತಿತೂ ಆ ಮಕ್ಕಳ ಶಾರೀರಿಕವಾಯಿತೂ, ಮಾನಸಿಕ ಆಯಿತೂ ದುರ್ಬಲಂಗಲಾಯಿತ್ ಮಾಡುವದ್ ಮಾನವತೆ ಅಲ್ಲ.

ಸಫಿಯ ಎಣ್ಣುವ ಮೂಡಿನ ಕೆಲಸಕ್ ಆಕಿಯಂಡದೂ ಅಲ್ಲತೆ, ಅವಳ ಚೂರ್ ಚೂರಾಯಿತ್ ಕೊಂದಿತ್ ಒರೊಂದ್ ಭಾಗತ್‌ನ ಒರೊರ್ ಬರಿ ಪೂತ್‌ನವನ ಮನುಷ್ಯ ಎಣ್ಣುವಕ್ ಕೈಯುವಾ? ಪ್ರಾಣೀಂದ್ ಸಹ ಎಣ್ಣುವಕ್ ಕಯ್ಯಲೆ. ಇನ್ನತ ಅದೆಚ್ಚಕ್ ಪ್ರಕರಣ ಉಂಡೂ. ಬೊತ್ತಿಯಂಡ್ ದಾರೂ ಕಾನೂನ್‌ರ ಸಹಾಯ ಎಡ್‌ತೋವಕ್ ಬಪ್ಪಲೆ.

ಒರೊಮ್ಮ ಚೆರಿಯ ಮಕ್ಕಳ ಕೆಲಸಕ್ ಆಕಿಯೋವುಲೇಂದ್ ಯಜಮಾನಂಗ ಎಣ್ಣಿತೂ ಕೇಕತೆ ಕೂಳ್‌ಕ್ ಕಷ್ಟ, ನೀರ್‌ಕ್ ಕಷ್ಟ, ಎಣ್ಣಿತೆ ಅಪ್ಪವ್ವನೇ ಮೊರಟಿತೆ ಮಕ್ಕಳ ಕೆಲಸಕ್ ಕೂಟುವ. ಇಂಞಿ ಓರೊಬ್ಬ ಚೆರಿಯ ಬಯತ್ ಎಣ್ಣುಚೆಂಗಿ ಕೆಲಸಕ್ ಆಕಿಯೋವುಲೇಂದ್, ಬಯತ್‌ನ ಬಲ್ಯದ್ ಮಾಡಿತೆ ಎಣ್ಣುವ. ಇದಂಗ್ ಮೂಲ ಬಡತನ, ಇಕ್ಕ ಸರಕಾರ ಮಕ್ಕಕ್ ಬಣ್ಣೆ ಶಿಕ್ಷಣ, ಊಟ, ಸೈಕಲ್ ಎಲ್ಲ ಕೊಡ್‌ಪಾಂಗ್ ಸುಮಾರ್ ಮಕ್ಕ ಸ್ಕೂಲ್‌ಕ್ ಕೂಡುವ.



## ಪ್ರಪಂಚ ಚೋರೆ ದಾನ ದಿನ World Blood Donation Day

ಜನ ಚೋರೆ ದಾನ ಮಾಡುವಕ್ ಮಿಂಞಾಕ್ ಬರಡೇಂದ್ ಈ ವಿಶ್ವ ಚೋರೆ ದಾನ ದಿನಾಂದ್ ನಡತುವ. ದಿನಕ್ ಅದೆಚ್ಚೆಕೊ ಆಪರೇಷನ್ ಆಯಂಡಿಪ್ಪ, ಅಪಘಾತವೊ ಆಯಂಡಿಪ್ಪ, ಅಯಿಂಗೆಲ್ಲ ಚೋರೆ ಬೋಂಡಿಯಾಪ. ಆ ಸಮಯಕ್ ಸೆರಿಯಾಯಿತ್ ಚೋರೆ ಕಟ್ಚೆಚೇಂಗಿ ಆ ವ್ಯಕ್ತಿರ ಪ್ರಾಣ ಉಳಿವ.

ಆರೋಗ್ಯವಂತ ಮನುಷ್ಯ ದಾರ್ ಬೋಂಡಿಕೆ ಚೋರೆ ದಾನ ಮಾಡಲು. ಆಚೇಂಗಿ ಚೋರೆ ಎಡ್ತೋವಂಗ್ ಮಿಂಞಾ ದಾನಿಕ್ ಏಡ್ಸ್ ಕಾಯಿಲ ಉಂಡಾ, ಹೆಪಟೈಟಿಸ್ ಬಿ ಉಂಡಾಂದೆಲ್ಲ ಪರೀಕ್ಷೆ ಮಾಡ್ಚಿಟ್ಟಿತ್ ನೋಟುವಂಜಿ ಪಿಂಞಾ ದಾನ ಮಾಡುವಕ್ ಒತ್ತವ. ಚೋರೆ ದಾನ ಎಡ್ತಂಡ ವ್ಯಕ್ತಿರ ಪ್ರಾಣ ಉಳಿವ.

ಚೋರೆ ದಾನ ಮಾಡಾದಾನ. ಒರ್ ಮನುಷ್ಯಂಡ ಪ್ರಾಣ ಉಳಿವಂದೆಣ್ಣುವಕ್ ಚೋರೆ ದಾನ ಮಾಡುವಕ್ ಬಯ್ಯಕ್ ನಿಪ್ಪಕಾಗ. ಚೋರೆ ದಾನ ಮಾಡ್ವಾನುಂಡ್ ದಾನಿರ ಆರೋಗ್ಯಕ್ ಏದೋರ್ ತೊಂದರೆ ಕೂಡ ಆಪುಲೆ. ನಲ್ಲ ಆರೋಗ್ಯ ಉಳ್ಳ ವ್ಯಕ್ತಿ ಮೂಂದ್ ತಿಂಗೆಕ್ಕೊಮ್ಮ ಚೋರೆ ದಾನ ಮಾಡಲು.

## ವಿಶ್ವ ನಿರಾಶ್ರಿತಂಗಡ ದಿನ World Refugee Day

ಪ್ರಪಂಚದಾದ್ಯಂತ ಮೂಲೆ ಮೂಲೆಗಳಲ್ಲಿ ಇಂದೂ ಯುದ್ಧ, ಕೊಲ್ಲು ಕೊಲ್ಲೆ, ಉರ್ತಮಾರಿಯಳುಂಡು ಸರ್ವನಾಶ. ನೆಲ ಗುಡುಗುವೊ, ಪ್ರವಾಹ ಇನ್ನೆಲ್ಲ ಸಮಯದ ಮನೆ ಮಾರು ಕಳ್ಳಂದಂಡು ನಿರಾಶ್ರಿತಗಳಾಯಿತಿಪ್ಪ ಜನಕ ಸರಕಾರ ಇಲ್ಲೇನಿ ಬೋರೆ ದೇಶ, ಇಪ್ಪುಕ್ ತಾತ್ಕಾಲಿಕ ನೆಲೆ ಕೊಡುಪ. ಇನ್ನಿತ ನೆಲೆಲ ಇಪ್ಪಯಿಂಗ ಅಯಿಂಡ ಕೆಲಸ ಕಾರ್ಬಾರ್ ನಡತಿಯಂಡು ಪ್ರೋಯಂಡಿಪ್ಪ. ಅಯಿಂಡ ಸ್ವಂತ ಜಾಗಕ್ ಅಯಿಂಗ ಎಕ್ಕು ಪ್ರೋಪೊ ಎಣ್ಣುವದ ನಿಶ್ಚಿತ ಇಪ್ಪಲೆ. ಇನ್ನಿತಯಿಂಡ ನಲ್ಲರಿಮೆಕ್ ಪ್ರೋರಾಟ ಮಾಡುವ ಉದ್ದೇಶತ್ ಈ ಆಚರಣೆ ನಡುಪ.

ವಿಶ್ವ ಸಂಸ್ಥೆ ಇನ್ನಿತ ಆಚರಣೆನ ನಡುತಂಡೂಂಡು 2000ನೇ ಇಸವಿಲ್ ನಿರ್ಧಾರ ಮಾಡುಚಿ. ಅಲ್ಲಿಂಜ ಜೂನ್ 20, 2001ನೇ ಇಸವಿಲ್ ಆದ್ಯವಾಯಿತ್ ಈ ವಿಶ್ವ ನಿರಾಶ್ರಿತಂಗಡ ದಿನಾಚರಣೆ ನಡುಂದತ್. ಕಾಲ ಕಾಲ ವಿಶ್ವಸಂಸ್ಥೆರ ನಿರಾಶ್ರಿತಂಗಡ ಹೈ ಕಮಿಷನರ್, ನಿರಾಶ್ರಿತಂಗಡ ದಿನಾಚರಣೆ ಆ ಕಾಲತರ ಉದ್ದೇಶ ಪಿಂಞ ಘೋಷಣೆ ಎಂತ ಇರಂಡೂಂಡು ನಿರ್ಧಾರ ಮಾಡುವ.

ನಂಗಡ ಭಾರತ ದೇಶತೂ ಟಿಬೆಟ್‌ಂಜ ಬಂದ ನಿರಾಶ್ರಿತಂಗಕ್ ಜಾಗ ಕೊಡುತಿತ್. ಆಚಿಂಗಿ ಅಯಿಂಗಕ್ ಮತದಾನತರ ಹಕ್ಕು ಇಲ್ಲೆ. ಬಾಂಗ್ಲಾತ್‌ಂಜ ಬಂದ ನಿರಾಶ್ರಿತಂಗಕೂ ಜಾಗ ಕೊಡುತಿತ್. ದಿನ ದಿನಕೂ ಅದಿಯಾಯಂಡುಳ್ಳ ಕೊಲ್ಲು, ಕೊಲ್ಲೆ, ಪಡನುಂಡು ನಿರಾಶ್ರಿತಂಗಕೂ ಅದಿಯಾಯಂಡುಂಡು. ಇದಂಗೆಲ್ಲ ಒರ್ ಆಖೀರಿ ಎಣ್ಣುವದ ಇಲ್ಲೆಯಾ? ಇದ್ ಎಚ್ಚುಕೊ ಜನಡ ಮನಸುಲ್ ಉಪಿಪ ಪ್ರಶ್ನೆ ಆಯಿತುಂಡು.

# ಬರ ಪರಿಸ್ಥಿತಿ ವಿರುದ್ಧ ಪೋರಾಟ ಮಾಡುವ ವಿಶ್ವ ದಿನ World Day to Combat Desertification and Drought

ವಿಶ್ವಸಂಸ್ಥೆರ ಆದನೇಲ್ ನಡ್‌ಪ ಈ ಆಚರಣೆ ಭೂಮಿರ ಮೇಲೆ ಏದೇ ಜಾಗತ್ ಬರ ಪರಿಸ್ಥಿತಿ ಬಕ್ಕತನ್ನಕೆ ನೋಟಿಯೋಂಡು. ಅನ್ನನೆ ಬಾತೇಂಗಿ ಅದನ ಎದ್‌ಮುಟ್ಟುವ ಶಕ್ತಿನ ಪಡ್‌ಂದೋಂಡು ಎಣ್ಣುವದೇ ಈ ದಿನಾಚರಣೆರ ಉದ್ದೇಶ.

ಸುಮಾರ್ ಕಾಲ ಮಳೆ ಬರತೇ ಇಂಜಕ ಆ ಜಾಗ ಮಣಭೂಮಿ ಆಯಿರುವ. ಅಂತ ಪರಿಸ್ಥಿತಿ ಬಪ್ಪಕಾಗಂದೇ ಗಿಡ ಮರ ಬೊಳೊತೊಂಡು, ಉಳ್ಳ ಮರ ಕಾಡ್‌ನ ಕೆತ್ತುವಕಾಗ ಎಣ್ಣಿಯಂಡ್ ಜನಕ್ ಅರಿವಿಕೆ ಕೊಡ್‌ತಂಡೇ ಇಪ್ಪ. ಆಚೆಂಗಿ ಸ್ವಾರ್ಥಿ ಮನುಷ್ಯಂಗಕ್ ಆ ಕೂತ್ ಕೇಪದೇ ಇಲ್ಲೆ. ಇಂದೊಮ್ಮೆ ಚಾಯಿಲ್ ಕಯಿಂಜತಾ ಮದಿ, ನಾಳೆ ಎನ್ನೇಂಗಾಡ್, ನಾನ್ ಚಾವಣೆ ಚಾಯಿಲಿರೊಂಡು, ಬಯ್ಯಂಜಿ ಮಕ್ಕಡ ಕಾಲಕ್ ಎಂತಾಚೆಂಗೆನ್ನ ಕಾಂಬಕ್ ನಾನಿಪ್ಪಲೆಲ್ಲ ಎಣ್ಣುವ ಭಂಡ ಧೈರ್ಯ. ನಾಕ್ ತಿಂಬಕ್ ಕ್‌ಟ್ಟುಲೇಂದೆಣ್ಣುವ ಕಾರಣಕ್ ಪಣ್ಣ್ ಮರತ್‌ನೇ ನಡ್‌ಕತಿಪ್ಪಕ್ ಕಯ್ಯುವಾ? ನಂಗಡ ಅಜ್ಜಂಗ ಅಂದೇತ ಕಾಲತ್ ನಟ್ಟ ಮರತ್ ಇಂದ್ ನಂಗಕ್ ಪಣ್ಣ್ ಕ್‌ಟ್ಟುಲೆಯಾ?

ಮನುಷ್ಯ, ಈ ಭೂಮಿರ ಪರಿಸರತ್‌ರ ಒರ್ ಭಾಗ. ನಂಗ ಚಾಯಿಲಿರೊಂಡೊಂದಾನಕ ಭೂಮಿಯೂ ಅದಂಡ ಪರಿಸರವೂ ಚಾಯಿಲಿರಂಡು.

ಜೂನ್ ತಿಂಗಳ 3ನೇ ನಾರಾಚಿ

## ಪ್ರಪಂಚ ಅಪ್ಪಂಗಡ ದಿನ World Father's Day

ಸನೋರ ಲೂಯಿಸ್ ಡಾಡ್ ಎಣ್ಣುವ ಒರ್ ಮೂಡಿ ಕುಂಞಾರ ಅವ್ವ ಚಿತ್ತಪೋಯಿತಿಂಜತ್. ಅವ್ವ ಚಾವಕ ಅವಕ್ ಪದನಾರ್ ಬಯತ್. ಅಯಿಂಗ ಬಟ್ಟು ಆರ್ ಮಕ್ಕ. ಆ ಆರ್ ಮಕ್ಕಳ ಚಾಕುವಕ್ ಅಪ್ಪ ಪಟ್ಟಿ ಕಷ್ಟತ್ನ ಕಂಡಿತಿಂಜತ್. ಅನ್ನತ ಅಪ್ಪಂಗ್ ಕೃತಜ್ಞತೆ ಕಾಟಂಡೂಂದ್ ಅವಡ ಮನ್ಸಾಲಿಂಜತ್. ಪ್ರಪಂಚತೆಲ್ಲ ಅಪ್ಪಂಗಡ ದಿನ ನಡತಿಯಂಡಿಪ್ಪಕ ಅವಕಾಶ ಕೂಡಿ ಬಾತ್. (YMCA) (Young men's Christian Association) ಈ ಸಂಸ್ಥೆರ ಕೂಟಾದನೆಲ್ ಜೂನ್ ತಿಂಗಳ ಮೂಂದನೆ ನಾರಾಚಿ 1909ನೇ ಇಸವಿಲ್ ಆದ್ಯವಾಯಿತ್ ಅಪ್ಪಂಗಡ ದಿನ ನಡತ್ಚಿ. ಬಯ್ಯಂಜಿ ಅಮೇರಿಕಾ ಅಧ್ಯಕ್ಷನಾಯಿತಿಂಜ ಉಡ್‌ರೋ ವಿಲ್ಸನ್ 1916ಲ್ ಅಪ್ಪಂಗಡ ದಿನಾಚರಣೆ ಮಾಡುವಕ್ ಮಾನ್ಯತೆ ಕೊಡತ್. ಅಲ್ಲಿಂಜ ರಿಚರ್ಡ್ ನಿಕ್ಸನ್ ಅಧ್ಯಕ್ಷನಾಯಿತಿಂಜ ಸಮಯತ್ ಸುಮಾರ್ ಅಂಜಿ ದಶಕ ಕಯಿಂಜ ಪಿಂಞ ಅಪ್ಪಂಗಡ ದಿನತನ ತಪ್ಪತೆ ನಡತುವ ಏರ್ಪಾಡ್ ಮಾಡ್ಚಿ.

## ವಿಶ್ವ ಜನಸಂಖ್ಯಾ ದಿನ World Population Day

ಪ್ರತೀ ಕಾಲ ಜುಲೈ ಪನ್ನೊಂದಾಂಗ್ ವಿಶ್ವ ಜನಸಂಖ್ಯೆ ದಿನ ಆಚರಣೆ ಮಾಡುವ. ಅಂದ್ ವಿಶ್ವತುಳ್ಳ ಜನಸಂಖ್ಯೆರ ಅಂಕಿ-ಅಂಶತ್‌ನ ಅರಿಚಿಡುವ. ಅಂದಾಚ್ 650 ಕೋಟಿ ದಾಟ್‌ನ ವಿಶ್ವ ಜನಸಂಖ್ಯೆ, 100 ಕೋಟಿ ದಾಟ್‌ನ ಭಾರತತ್‌ರ ಜನಸಂಖ್ಯೆ ನೋಟುವಕ ಇಂಞೋರ್ ನೂರ್ ಕಾಲತ್ ಜನಕ್ ನಿಪ್ಪಕೇ ಜಾಗ ಇಲ್ಲತಾಕುಂದ್ ಅನುಮಾನ ಬಪ್ಪ. ಕುಟುಂಬ ಯೋಜನೆನ ತಪ್ಪತೆ ಪಾಲನೆ ಮಾಡಂಡು. ಕುಟುಂಬ ಚೆರಿಯದಾಯಿತ್ ಇರಂಡು ಎಣ್ಣುವ ಅರಿವಿಕೆ ಕೊಡ್‌ತಕಲೂ ಮೂಡಿ ಕುಂಞಿ ಉಳ್ಳಯಿಂಗ್ ಇಂಞೋರ್ ಕ್ಕಣ್ಣ ಕುಂಞಿ ಬೋಂಡೂಂದೂ, ಕ್ಕಣ್ಣ ಕುಂಞಿ ಉಳ್ಳಯಿಂಗ್ ಇಂಞೋರ್ ಮೂಡಿ ಕುಂಞಿ ಬೋಂಡೂಂದೂ, ಅನಕ್ಕರಸ್ಥಂಗ ಮಕ್ಕ ಫಲ ದೇವಡ ಆಶೀರ್ವಾದಂದೂ, ಕೆಲವು ಜನ ಕುಟುಂಬ ಯೋಜನೆ ಮಾಡುವದ್ ಧರ್ಮಕ್ ವಿರುದ್ಧ ಎಣ್ಣಿಯಂಡೂ, ಬೋರೆ ಬೋರೆ ಕಾರಣಕ್ ಲೆಕ್ಕ ಇಲ್ಲತಚ್ಚಕ್ ಮಕ್ಕಕ್ ಜನ್ಮ ಕೊಡ್‌ತತೇಂಗಿ ಭೂಮಿರ ಪರಿಸ್ಥಿತಿ ಎಲ್ಲಿಕ್ ಎತ್ತು? ಏದೇ ಕುಂಞಿ ಆಚೆಂಗೂ ಒಂದೋ ದಂಡೋ ಮಕ್ಕಳ ನಲ್ಲ ವಿದ್ಯೆ, ಸಂಸ್ಕಾರ, ಸಂಸ್ಕೃತಿ ಕೊಡ್‌ತಿತ್ ಬೋಳ್‌ತಚೇಂಗಿ ಅಯಿಂಗ ಸಮಾಜಕೂ ದೇಶಕೂ ಒರ್ ಆಸ್ತಿ ಆಯಿತ್ ಎಲಂಗುವ.

ವಿಶ್ವತ್ ಚೀನಾ ಏರ ಜನಸಂಖ್ಯೆವುಳ್ಳ ದೇಶ, ಅಲ್ಲಿಂಜ ದಂಡನೆ ಸ್ಥಾನ ಭಾರತಕ್. ಏರ ಜನಸಂಖ್ಯೆವುಳ್ಳ ದೇಶ, ಏರ ಮಾನವ ಸಂಪನ್ಮೂಲ ದೇಶಾಂದ್ ಎಣ್ಣುವ. ದೇಶತುಳ್ಳ ಪ್ರತಿ ವ್ಯಕ್ತಿಯೂ ಸೋಮಾರಿ ಆಕತೆ ಚೆರಿಯದೊ, ಬಲ್ಲದೊ ಎಂತೆಂಗೋರ್ ಕಾರ್ಬಾರ್ ಮಾಡಿಯಂಡ್ ದೇಶತ್‌ರ ಆರ್ಥಿಕ ಪ್ರಗತಿಕ್ ಕೈ ಕೂಟ್‌ನಕ ಜನಸಂಖ್ಯೆನ ಸಂಪನ್ಮೂಲ ಎಣ್ಣೊಲು.

ದೇಶತ್‌ರ ಪ್ರತೀ ಪ್ರಜೆಯೂ ಕುಟುಂಬ ಯೋಜನೆನ ಪಾಲನೆ ಮಾಡ್‌ಚೇಂಗಿ ದೇಶ ನಂದಾಪ, ಅಭಿವೃದ್ಧಿ ಆಪ.

ಆಗಸ್ಟ್ - 12

## ಅಂತರ್ರಾಷ್ಟ್ರೀಯ ಬಾಲಕಾರಡ ದಿನ

(ಜನವರಿ - 12 ರಾಷ್ಟ್ರೀಯ ಯುವ ದಿನ  
International Youth Day

1999ನೇ ಇಸವಿಲ್ ವಿಶ್ವಸಂಸ್ಥೆ ಅಂತರ್ರಾಷ್ಟ್ರೀಯ ಬಾಲಕಾರಡ ದಿನ ಆಚರಣೆ ಮಾಡಂಡೂಂದ್ ತೀರ್ಮಾನ ಮಾಡ್‌ಚಿ. ವಿಶ್ವತ್‌ರ ಎಲ್ಲ ಬಾಲಕಾರಳೂ ಅದರ್ ದೇಶಕ್ ಒರ್ ಅಮೂಲ್ಯ ಸೊತ್ತ್. ಅದನ ಅಯಿಂಗಳೇ ಅರ್‌ಂಜಂಡ್ ದೇಶತ್‌ರ ಸೇವೆಕ್ ಮೊಟ್ತ್ ಇಡಂಡು.

ಜನವರಿ 12 ಭಾರತತ್ ಯುವದಿನ ಆಚರಣೆ ಮಾಡುವ. ಅಂದ್ ಸ್ವಾಮಿ ವಿವೇಕಾನಂದಂಡ ಪುಟ್ನಿನ ದಿನ. ನಂಗಡ ದೇಶತ್‌ರ ಬಾಲಕಾರಕ್ ಸ್ವಾಮಿ ವಿವೇಕಾನಂದ ಒರ್ ಮಾದರಿ ವ್ಯಕ್ತಿ. ದೇಶ ಭಕ್ತಿಲೂ, ನಡೆ-ನುಡಿಲೂ, ಧೈರ್ಯ ಸಾಸತೂ ಬಾಲಕಾರ ಎಣ್ಣಕ ಇನ್ನನೆ ಇರಂಡೂಂದ್ ಎಣ್ಣವನ್ನತ ವ್ಯಕ್ತಿ, ಅದಂಗ್ ಸ್ವಾಮಿ ವಿವೇಕಾನಂದಂಡ ಜನ್ಮದಿನತ್‌ನ ನಂಗಡ ದೇಶತ್ ಬಾಲಕಾರಡ ದಿನಾಂದ್ ಆಚರಣೆ ಮಾಡುವ.

ಯುವಶಕ್ತಿ ಎಣ್ಣಕ ಆಮಕ್ಕ ಪೊಮ್ಮಕ್ಕ ದಂಡಾಳೂ ಕೂಡ್‌ನ ಅರ್ಥ ಬಪ್ಪ. ಯಾವ್ವನ ಬಪ್ಪದೇ ಗೌಜಿ ಮಾಡುವಕ್‌ಂದ್ ಗೇನ ಮಾಡತೆ, ಅಯಿಂಗಡ ಜವಾಬ್ದಾರಿನ ಅರಿಯಂಡು. ಬೀಡಿ, ಸಿಗರೇಟ್, ಗುಟ್ಕಾ, ಗಾಂಜಾ, ಕಳ್ಳ, ಅಫೀಮ್‌ರನ್ನತ ದುಶ್ಚಟಕ್ ಬಲಿಯಾಕತೆ ಬಾಲಕಾರ ಅಯಿಂಡ ಶಕ್ತಿನ ದೇಶಕಾಯಿತ್ ಉಪಯೋಗ ಮಾಡಂಡು. ನಂಗಡ ರಾಷ್ಟ್ರಪತಿಯಾಯಿತಿಂಜ ಶ್ರೀ ಎ.ಪಿ.ಜೆ. ಅಬ್ದುಲ್ ಕಲಾಂ ಅಯಿಂಗ ಎಲ್ಲೆಲ್ಲಿ ಪೋಪ ಅಲ್ಲೆಲ್ಲ ನಂಗಡ ಯುವಜನಕೂ, ಮಕ್ಕಕೂ ಬುದ್ಧಿವಾದ ಎಣ್ಣವಯಿಂಜತ್. ಯುವಜನಕ್ ಶ್ರೀ ಕಲಾಂರ ಸಪ್ತ ಸೂತ್ರ ಇನ್ನನೆ ಉಂಡ್.

1. ಬದ್‌ಕ್‌ಲ್ ಗುರಿ ಇರಂಡು. ಗುರಿ ಮುಟ್ಟುವಕ್ ಪೋಲೂ ಬೈಟೂ ಕಷ್ಟಪಟ್ಟಿತ್ ಗುರಿ ಮುಟ್ಟಂಡು. ಕಷ್ಟ ಬಪ್ಪಕ ಧೈರ್ಯತ್ ಎದ್‌ರಾಚಿಡುವ ಶಕ್ತಿ ಬೊಳ್‌ತಿಯೋಂಡು.

2. ಬದ್‌ಕಲ್ ಜಯ ಕ್ವಿಂಟೊಂಡೊಂದಾಚೆಂಗಿ ಧೈರ್ಯತ್ ಮಿಂಞಾಕ್ ನುಗ್ಲೊಂಡು. ಜೊತೆಕ್ ಇಂಞೊಬ್ಬಂಡ ಗೆಲು ಕಂಡಿತ್ ಖುಷಿಪಡಂಡು.
3. ಸುತ್ತಮುತ್ತ ಪರಿಸರ ಚಾಯಿಲ್ ಬೆಚ್ಚೊಂಡು. ಅಕ್ಕಪಕ್ಕತ್‌ರಯಿಂಡ ಕೂಡ ಚಾಯಿಲಿರೊಂಡು.
4. ನಲ್ಲ ನಡತೆರ ಜೊತೆಲ್ ಮನಸ್ ಬಲ್ಯದಾಯಿತಿರಂಡು.
5. ಜ್ಞಾನ ಜ್ಯೋತಿನ ಕತ್‌ಚಿಡಂಡು, ದೇಶತ್‌ರ ಅಭಿವೃದ್ಧಿಕ್ ಕಷ್ಟ ಪಡಂಡು.
6. ಭ್ರಷ್ಟಾಚಾರ ಮಾಡುವಕೂ ಆಗ, ಅದನ ತೊಲಗ್‌ಚಿಡುವಕ್ ಪ್ರತಿಜ್ಞೆ ಮಾಡಂಡು.
7. 2020ನೇ ಇಸವಿಕ್ ಭಾರತ ದೇಶತ್‌ನ ಅಭಿವೃದ್ಧಿಯಾನ ದೇಶತ್‌ರ ಪಟ್ಟಿಕ್ ಕೂಟಂಡು. ಅದಂಗಾಯಿತ್ ಬಾಲೆಕಾರ ಎಲ್ಲ ತರತೂ ನಯಿಕಂಡು.

ಈ ಸಪ್ತ ಸೂತ್ರತ್‌ನ ಬದ್‌ಕಲ್ ಅಳವಡ್‌ಚಿಟ್ಟಿತ್ತೆಂಗಿ ಅಯಿಂಗಳೂ, ಉದ್ಧಾರ ಆಕಲೂ, ದೇಶತ್‌ನೊ ಉದ್ಧಾರ ಮಾಡಲು.

## ಭಾರತ ಸ್ವಾತಂತ್ರ್ಯ ದಿನ Day of Indian Independence

ಭಾರತದ ಇತಿಹಾಸದ ಪೊನ್ನೆರ ಅಕ್ಷರದ ಎಲ್ಲ ಬೆಪ್ಪನ್ನತ ದಿನ ಇದ್ದ. ಸುಮಾರ್ ನೂರ್ ಕಾಲಕೂ ಅದಿಯಾಯಿತ್ ಬ್ರಿಟೀಷ್‌ಕಾರಡ ಅಡಿಯಾಳಾಯಿತ್ ಬದ್‌ಕನ ಭಾರತೀಯಂಗ ಅಯಿಂಡ ಮುಷ್ಟಿಯಿಂಜ ಬುಡ್‌ಗಡೆ ಆನ ದಿನ. 1947ನೇ ಇಸವಿ ಆಗಸ್ಟ್ 14ನೇ ತಾರೀಖ್ ಬೈಟ್ ಪನ್ನೆರಂಡ್ ಗಂಟೆಕ್ ನಂಗಕ್ ಸ್ವಾತಂತ್ರ್ಯ ಕ್‌ಟ್ವಚಿ. ಐತಿಹಾಸಿಕ ಚೋಂದ ಕೋಟೆರ ಕೊಡಿಲ್ ನಂಗಡ ಮೂಂದ್ ರಂಗ್‌ರ ಬಾವುಟ ಪಾರ್‌ಚಿ. ಇಚ್ಚಕ್ ಆಪಕ್ ಅದೆಚ್ಚಕೋ ದೇಶ ಪ್ರೇಮಿಯಡ ಬಲಿದಾನವೂ ಆಯಿತ್.

1857ಲ್ ಸುರುವಾನ ಸಿಪಾಯಿ ದಂಗೆ ಆದ್ ಸ್ವಾತಂತ್ರ್ಯ ಪೋರಾಟ ಅಲ್ಲಿಂಜಪ್ಪರ ಗಾಂಧೀಜಿ, ನೆಹರೂ, ವಲ್ಲಭಭಾಯಿ ಪಟೇಲ್, ಲಾಲ್ ಲಜಪತ್ ರಾಯ್, ಬಾಲ ಗಂಗಾಧರ ತಿಲಕ್, ಬಿಪಿನ್ ಚಂದ್ರಪಾಲ್, ಸುಭಾಷ್‌ಚಂದ್ರ ಬೋಸ್, ಚಂದ್ರಶೇಖರ್ ಆಜಾದ್, ಭಗತ್‌ಸಿಂಗ್ ಒಂದಾ, ದಂಡಾ ಲಕ್ಷ್ಮಾಂತರ ಜನ ನಂಗಡ ಸ್ವಾತಂತ್ರ್ಯಕಾಯಿತ್ ಪ್ರಾಣ ಕೊಡ್‌ತತ್.

ಆಚೆಂಗಿ ಇಂದ್ ಸ್ವಾತಂತ್ರ್ಯ ದಿನ ನಂಗಕ್ಕೆಲ್ಲ ಒರ್ ರಜಕ್‌ಟ್ಟುವ ದಿನ. ಎಚ್ಚಕೋ ಅಪ್ಪವ್ವಂಗ ಮಕ್ಕಳ ಅಂದ್ ಸ್ಕೂಲ್‌ಕೇ ಅಯೆಪ್‌ಲೆ. ಇಇನ್ನೆ ಮಕ್ಕಕ್ ದಿನಾಚರಣೆರ ಮಹತ್ವ ಗೊತ್ತಾಪೊ. ಎಚ್ಚಕೋ ಸ್ಕೂಲ್‌ಲ್ ಆಚರಣೆ ಮಾಡತೇ ರಜೆ ಕೊಡ್‌ತೆರುವದೂ ಉಂಡ್. ಅಂದ್ ಅಯಿಂಗ ಪಟ್ಟ ಕಷ್ಟ ನಂಗಕ್ಕಿಲ್ಲೆ. ಕೇವಲ ನಂಗ ಅಯಿಂಡ ತ್ಯಾಗತನ ನೆನತಿಯಂಡ್ ಕೊಂಡಾಡ್‌ಚೆಂಗಿ ಮದಿ. ಭ್ರಷ್ಟಂಗಳಕತೆ, ದೇಶ ಪ್ರೇಮಿಯಳಾಯಿತ್ ಬದ್‌ಕೆಚೆಂಗಿ ಮದಿ. ಸ್ವಾತಂತ್ರ್ಯ ದಿನಾಚರಣೆ ಸಾರ್ಥಕ ಆಪ.



ಸೆಪ್ಟೆಂಬರ್ - 8

## ಅಂತರ್ರಾಷ್ಟ್ರೀಯ ಸಾಕ್ಷರ ದಿನ International Literacy Day

ನವೆಂಬರ್ 17, 1965ನೇ ಇಸವಿಲ್ ಯುನೆಸ್ಕೋ (Unesco) ಪ್ರತಿ ಕಾಲ ಸೆಪ್ಟೆಂಬರ್ 8ನ ಅಂತರ್ರಾಷ್ಟ್ರೀಯ ಸಾಕ್ಷರ ದಿನಾಂದ್ ಆಚರಣೆ ಮಾಡಂಡೂಂದ್ ನಿರ್ಧಾರ ಎಡ್ತಂಡತ್. ಅಲ್ಲಿ 1966ನೇ ಇಸವಿ ಸೆಪ್ಟೆಂಬರ್ ಎಟ್ಯಾಂಗ್ ಆದ್ಯವಾಯಿತ್ ಸಾಕ್ಷರತೆ ದಿನಾಚರಣೆ ನಡ್ಂದತ್.

ಒರ್ ಅಂದಾಜ್ ಪ್ರಕಾರ ಪ್ರಪಂಚತ್ 781 ಮಿಲಿಯನ್ ವಯಸ್ಸಂಗಕ್ ಓದುವಕ್ ಎಲ್ವಾವಕ್ ಗೊತ್ತಾಲೆ. 103 ಮಿಲಿಯನ್ ಮಕ್ಕಕ್ ಅಕ್ಷರ ಜ್ಞಾನ ಇಲ್ಲೆ, ಓದುವಕ್, ಎಲ್ವಾವಕ್ ಲೆಕ್ಕ ಮಾಡ್ವಕ್ ಒಂದೂ ಗೊತ್ತಾಲೆ. ಇಯಂಗ ಸ್ಕೂಲ್ಕೆ ಪ್ರೋಪಾಲೆ.

ಯುನೆಸ್ಕೋ ವರದಿರ ಪ್ರಕಾರ ದಕ್ಷಿಣ ಪಿಂಞ ಪಶ್ಚಿಮ ಏಷ್ಯಾತ್ಲಾ ವಯಸ್ಸಂಗಡಾತ್ ಕಮ್ಮಿ ಓದನಯಿಂಗ ಉಳ್ಳೊ. ಬರೀ 58.6% ಮಾತ್ರ ಪ್ರಪಂಚತ್ ಕಮ್ಮಿ ಸಾಕ್ಷರಂಗ ಉಳ್ಳ ಜಾಗ ಬರ್ಕನಾ ಫಾಸೊ (12.8%) ನೈಗರ್ (14.4%) ಮಾಲಿ (19%) ಇಲ್ಲಿಯತ್ ವರದಿ ಎಣ್ಣವ, ಈ ವಿದ್ಯೆ ಕಮ್ಮಿ ಉಳ್ಳ ಜಾಗತ್ ಬಡತನವೂ ಪ್ರೊಮ್ತುಕ್ತಡ ಶೋಷಣೆಯೂ ಅಧಿಯಾಯಿತುಂಡ್. ಇದ್ಲೇ ಗೊತ್ತಾಪಲ್ಲ ಸಾಕ್ಷರತೆ ಇಲ್ಲತೆ ಪ್ರೋಚೆಂಗಿ ಅಲ್ಲಿ ಬಡತನ ಜಾಸ್ತಿ ಇಪ್ಪಾಂದ್. 2006'ಂಡ ಸಾಕ್ಷರತಾ ದಿನಾಚರಣೆಲ್ ಯುನೆಸ್ಕೋ, 2015ರ ಒಳಿಯ 58% ಉಳ್ಳ ವಯಸ್ಸಂಗಡ ಸಾಕ್ಷರತೆನ ಇಂಞೂ ಜಾಸ್ತಿ ಮಾಡಂಡೂಂದ್ ಗುರಿ ಬೆಚ್ಚಿತ್. ಯುನೆಸ್ಕೋ 2003 ಲಿಂಜ 2012 ಕೆತ್ತನೆ ವಿಶ್ವ ಸಂಸ್ಥೆರ ಸಾಕ್ಷರ ಕಾಲ ಎಣ್ಣೆಯಂಡ್ ಮಾಡಿತ್. 2012ನೇ ಇಸವಿರ ಒಳಿಯ ಎಲ್ಲ ಸಾಕ್ಷರತೆ ಕಮ್ಮಿ ಉಳ್ಳ ದೇಶತೂ ಸಾಕ್ಷರತೆ ಜಾಸ್ತಿ ಮಾಡಂಡೂಂದೆಣ್ಣವ ಉದ್ದೇಶ ಬೆಚ್ಚಂಡಿತ್.

ಭಾರತತ್ ಅಂದಾಜ್ 65% ಸಾಕ್ಷರತೆ ಉಂಡ್. ಕೇರಳ ರಾಜ್ಯತ್ 90.9% ಸಾಕ್ಷರತೆ ಉಂಡ್. ಕೊಡವ ಜನಾಂಗತ್ 97% ಉಳ್ಳದ್ ನಂಗಕ್ಕೆಲ್ಲ ಕುಶಿರ ವಿಷಯ.

ಸೆಪ್ಟೆಂಬರ್ - 16

## ಅಂತರಾಷ್ಟ್ರೀಯ ಓಝೋನ್ ಪದರ ರಕ್ಷಣಾ ದಿನ Internatinal Day for the Preservation of the Ozone Layer

ಓಝೋನ್ ಪದರ ಭೂಮಿಂಜ 15 ಕಿ.ಮೀ. ಲಿಂಜ 35 ಕಿ.ಮೀ. ರಚ್ಚೆಕ್ ಎತ್ತರತಾಲಿಪ್ಪ ಒರ್ ಪದರ. ಈ ಪದರ ಸೂರ್ಯಂಡ ಕಿರಣತಲುಳ್ಳ ಅಲ್ಟ್ರಾವಯಲೇಟ್ ಕಿರಣತನ (ಅರೆ ನೇರಳೆ) ತಡ್ಪ. ಇದೋರ್ ತರ ವನಲಿರ ಮಾದರಿ ಪಾಳನ ತಡ್ತಿತ್ ನಲ್ಲಾನ ಮಾತ್ರ ಬುಡುವನ್ನೆ ಮಾಡುವ. ಈ ಅಲ್ಟ್ರಾವಯಲೇಟ್ ಕಿರಣ ಮನುಷ್ಯಂಗ್ ಕ್ಯಾನ್ಸರ್‌ರನ್ನತ ಕಾಯಿಲ ಬಪ್ಪನ್ನಕೆ ಮಾಡುವ. ಅನ್ನತಾನ ತಡ್ಪ ಓಝೋನ್ ಪದರ ಇಕ್ಕ ತೂತ್ ಆಯಿತ್. ಅದಂಗ್ ಕಾರಣ ಭೂಮಿಲುಳ್ಳ ನಂಗ ಕ್ಲೋರೋ ಫ್ಲೋರೋ ಕಾರ್ಬನ್‌ನ ಪೊರಮೆ ಬುಡ್‌ವನ್ನತ ಎಚ್ಚಕೋ ವಸ್ತುನ ನಂಗ ಉಪಯೋಗ ಮಾಡುವದ್. ಉದಾಹರಣೆಕ್ ಪ್ರಿಡ್ಲ್, ಸೆಂಟ್, ವಿರ್ ಕಂಡೀಷನರ್ ಇಂಞೂ ಸುಮಾರೆಲ್ಲ ಉಂಡ್. ಈ ಕ್ಲೋರೋ ಫ್ಲೋರೋ ಕಾರ್ಬನ್ ಎಣ್ಣುವ ರಾಸಾಯನಿಕ ವಸ್ತು ಈ ಓಝೋನ್ ಪದರತನ ನಾಶ ಮಾಡುವ.

ಈ ಓಝೋನ್ ಎಣ್ಣುವದ್ ಉಂಡ್‌ಂದ್ 1913ನೇ ಇಸವಿಲ್ ಫ್ರಾನ್ಸ್‌ರ ಭೌತ ವಿಜ್ಞಾನಿಯ ಚಾರ್ಲ್ಸ್ ಫ್ಯಾಬ್ರಿ ಪಿಂಞ ಹೆನ್ರಿ ಬ್ಯುಷನ್ ಎಣ್ಣುವಯಿಂಗ ಕಂಡ್‌ಪುಡ್‌ಚತ್. ಬಯ್ಯಂಜಿ ಬ್ರಿಟೀಷ್ ವಿಜ್ಞಾನಿ ಜಿ.ಎಂ.ಬಿ. ಡಾಬ್ಬನ್ ಎಣ್ಣುವಯಿಂಗ ಸೈಕ್ಲೋಫೋಟೋಮೀಟರ್ ಎಣ್ಣುವ ಯಂತ್ರ ಕಂಡ್‌ಪುಡ್‌ಚತ್. ಇದಂಡ ಸಹಾಯತ್ ಭೂಮಿಲಿಂಜಂಡೇ ಕೊಡಿಲುಳ್ಳ ಓಝೋನ್ ಪದರ ಎಚ್ಚಕ್ ಉಂಡ್, ಎಲ್ಲಿ ಪಾಳಾಯಿತ್‌ಂದ್ ನೋಟಲು.

ಇನ್ನತ ಓಝೋನ್ ಪದರತನ ರಕ್ಷಣೆ ಮಾಡುವದ್ ನಂಗ ನಿಂಗೆಡೆಲ್ಲಡ ಕರ್ತವ್ಯ.

ಸೆಪ್ಟೆಂಬರ್ - 21

## ಅಂತರ್ರಾಷ್ಟ್ರೀಯ ಶಾಂತಿ ದಿನ

### International Day of Peace

ಅಂತರ್ರಾಷ್ಟ್ರೀಯ ಶಾಂತಿ ದಿನತನ ಆಚರಣೆ ಮಾಡಂಡೂಂದ್ ವಿಶ್ವಸಂಸ್ಥೆ ನವೆಂಬರ್ 30ನೇ ತಾರೀಖ್ 1981ನೇ ಇಸವಿರ ಸಭೆಲ್ ನಿರ್ಧಾರ ಮಾಡ್‌ಚಿ. ಪ್ರತೀ ಕಾಲ ಸೆಪ್ಟೆಂಬರ್‌ರ ತಿಂಗತ್ ಮೂಂದನೆ ಚೊವ್ವಾಚೆ ಅಂತರ್ರಾಷ್ಟ್ರೀಯ ಶಾಂತಿ ದಿನಾಚರಣೆ ನಡ್‌ತಂಡೂಂದ್ ತೀರ್ಮಾನ ಆಚಿ. ಪುನಃ ಸೆಪ್ಟೆಂಬರ್ 7, 2001ನೇ ಇಸವಿಲ್, ಸೆಪ್ಟೆಂಬರ್ 21ಂಗ್ ಶಾಂತಿ ದಿನಾಚರಣೆ ನಡ್‌ತಂಡೂಂದ್ ತೀರ್ಮಾನ ಮಾಡ್‌ಚಿ.

ಪ್ರಪಂಚತ್ ಶಾಂತಿ ಸ್ಥಾಪನೆ ಮಾಡಂಡೂಂದ್ ಎಚ್ಚಕೋ ಮಹಾನ್ ವ್ಯಕ್ತಿಯ ಪ್ರಯತ್ನಪಟ್ಟಿತ್. ಇನ್ನನೆ ಶಾಂತಿ ಸ್ಥಾಪನೆ ಮಾಡುವಕ್ ಶ್ರಮ ಪಟ್ಟಿಯಿಂಗಕ್ ನೋಬೆಲ್ ಶಾಂತಿ ಪುರಸ್ಕಾರ ಕೊಡ್‌ತಿತ್ ಗೌರವಿಚಿಡುವ. ಮಹಾತ್ಮ ಗಾಂಧೀಜಿರ ಅಹಿಂಸಾ ತತ್ವ ಶಾಂತಿ ಸ್ಥಾಪನೆರ ಮೂಲ ಮಂತ್ರ.. ಇಡೀ ಪ್ರಪಂಚವೇ ದ್ವೇಷತ್ ಮುಳೀತ್, ಉರ್ತಮಾರಿಯಡ ಹಾವಳಿಕ್ ಚಿಕ್ಕಿತ್. ಇಂಇಲ್ಲಿ ಶಾಂತಿ? ಶಾಂತಿ ಅಹಿಂಸೆ ಎಣ್ಣುವ ಶಬ್ದಕ್ ಜಾಗವೇ ಇಲ್ಲತಾಯಿತ್. ಪ್ರಪಂಚತ್ ಶಾಂತಿ ಇಂಜಕ ಇಂಇೂ ಎನ್ನತೆಲ್ಲ ಸಾಧನೆ ಮಾಡಲಿಂಜತ್.

## ವಿಶ್ವ ಪ್ರವಾಸ ದಿನ World Tourism Day

ದೇಶ ಸುತ್ತೊಂಡು, ಕೋಶ ಓದಂಡು ಎಣ್ಣುವ ಪಳಂಜೊಲ್ಲ ಉಂಡ್. ಎಚ್ಚಕೇ ಪುಸ್ತಕ ಓದಡ್, ದೇಶತನ ಸುತ್ತಿತ್ ನೋಟುವ ಅನುಭವವೇ ಬೋರೆ. ವಿಶ್ವ ಪ್ರವಾಸ ಸಂಸ್ಥೆ, ಸಭೆ 1979ಲ್ ಸ್ವೀನ್‌ಲ್ ನಡ್‌ಂದತ್. ಅಕ್ಯ ಪ್ರವಾಸಕ್ ಒತ್ತ್ ಕೊಡ್‌ಪಕಾಯಿತ್ ಸೆಪ್ಟೆಂಬರ್ 27ನ ವಿಶ್ವ ಪ್ರವಾಸ ದಿನಾಂದ್ ಆಚರಣೆ ಮಾಡಂಡೊಂದ್ ನಿರ್ಧಾರ ಮಾಡ್‌ಚಿ. ಅಲ್ಲಿಂಜ 1980ನೇ ಇಸವಿಂಜ ಕಾಲ ಕಾಲವು ಸೆಪ್ಟೆಂಬರ್ 27ಂಗ್ ವಿಶ್ವ ಪ್ರವಾಸ ದಿನ ಆಚರಣೆ ಮಾಡಿಯಂಡ್ ಬಂದಿತ್.

ವಿದೇಶಕಾರ ಚಾಸ್ತಿ ಪ್ರವಾಸಕ್ ಒತ್ತ್ ಕೊಡ್‌ಪ. 1997ಲ್ ಟರ್ಕಿ ಇಸ್ತಾಂಬುಲ್‌ಲ್ ನಡ್‌ಂದ ಸಭೆಲ್ ಪ್ರತೀ ಕಾಲ ಒರೋರ್ ದೇಶಕಾರ ಆತಿಥೇಯಂಗಳಾಯಿತ್ ಪ್ರವಾಸ ದಿನತರ್ ಪ್ರಾಯೋಜಕತ್ತ್ ಎಡ್‌ತವಂಡೊಂದ್ ನಿರ್ಧಾರ ಆನ ಪಿಂಞ 2003ಲ್ ಚೈನಾತ್‌ರ ಬೀಜಿಂಗ್‌ಲ್, 2006ಲ್ ಯುರೋಪ್‌ಲ್, 2007ಲ್ ದಕ್ಷಿಣ ಏಷ್ಯಾತ್, 2008ಲ್ ಅಮೇರಿಕಾತ್, 2009ಲ್ ಆಫ್ರಿಕಾತ್ ವಿಶ್ವ ಪ್ರವಾಸ ದಿನ ನಡ್‌ಂದತ್.

ಪ್ರವಾಸ ಪ್ರತಿಯೊಬ್ಬಂಗೂ ಜ್ಞಾನ ಅನುಭವ ಕೊಡ್‌ಪ. ಆ ಜ್ಞಾನ ಎಚ್ಚಕೇ ದುಡ್ಡ್ ಕೊಡ್‌ತಕಲೂ ಕೊಟ್ಟುಲೆ. ಮಕ್ಕಕ್ ಅದಂಗೇ ಕಾಲ ಕಾಲ ಸ್ಕೂಲ್‌ಂಜ ಪ್ರವಾಸ ಕಾಕಿಯಂಡ್ ಪೋಪೊ.

ಅಕ್ಕೋಬರ್ - 1

## ಅಂತರ್ರಾಷ್ಟ್ರೀಯ ವಯಸ್ಸಂಗಡ ದಿನ

### International Day for Olderpersons

ಪ್ರತೀ ಕಾಲ ಅಕ್ಕೋಬರ್ ಒಂದಾಂಗ್ ಪ್ರಪಂಚತ್‌ಲೆಲ್ಲ ವಯಸ್ಸಂಗಡ ದಿನ ಆಚರಣೆ ಮಾಡುವ. ನಂಗ ವಯಸ್ಸಂಗಡ ದಿನತ್‌ನ ಎನ್ನನೆ ಆಚರಣೆ ಮಾಡುವ, ಎನ್ನಂಗಾಯಿತ್ ಆಚರಣೆ ಮಾಡುವಾಂದ್ ಎಣ್ಣುವದ್ ಮುಖ್ಯ.

ಜಪಾನ್‌ಲ್ ವಯಸ್ಸಂಗ ಬಸ್ಸಲೊ, ಟ್ರೈನ್‌ಲೊ ಪತ್ತ್‌ಚೆಂಗಿ ಆ ಕೂಡಲೆ ಬಾಲೆಕಾರ ಎದ್ದಿತ್ ಅಯಿಂಗಕ್ ಜಾಗ ಕೊಡ್‌ಪಲೊ. ಎನ್ನಂಗಣ್ಣೆಚೆಂಗಿ ಅಯಿಂಗ ನಂಗಡ ದೇಶಕಾಯಿತ್ ಎಚ್ಚಕ್ ನಯಿಚಿತ್ ಅಯಿಂಗ್‌ಳ ಚಾಯಿಲ್ ನೋಟಿಯೊಂಡೊಂದ್. ಅಲ್ಲಿ ವಯಸ್ಸಂಗಡ ಮೇಲೆ ಗೌರವವೂ ದೇಶತ್‌ರ ಮೇಲೆ ಪ್ರೇಮವೂ ಕಾಂಬ.

ವಯಸ್ಸಂಗಡ ದಿನ ಎಣ್ಣಿತ್ ಅಂದೇತ್‌ರ ದಿನ ಒರಚ್ಚಕ್ ದುಡ್ಡೋ, ಪಣ್ಣೋ ಎಡ್‌ತಂಡ್ ಪೋಯಿತ್ ವಯಸ್ಸಂಗಡ ಬಿಡಾರತ್ ಕೊಡ್‌ತಿತ್ ಬಂದ್‌ರ್‌ತೆಂಗಿ ಅದ್ ಆಚರಣೆ ಆಪುಲೆ. ಪ್ರತೀ ಮನಲೂ ಅಯಿಂಗ್‌ಳ ಚಾಯಿಲ್ ನೋಟಿಯೊಂಡು. ಅಯಿಂಗಡ ಕಷ್ಟ-ಸುಖ ಅರಿಯಂಡು. ಅಯಿಂಡ ನಲ್ಲ ತಕ್ಕ ನಂಗಕ್ ಮಾರ್ಗದರ್ಶನ. ವಯಸ್ಸಂಗಡ ಬಿಡಾರ ದಾರೂ ಇಲ್ಲತ ತಬ್ಬಲಿಯಕ್ ಮಾತ್ರ. ಆಚೆಂಗಿ ಇಂದ್ ವಯಸ್ಸಂಗಡ ಬಿಡಾರತ್ ಮಕ್ಕ ಉಳ್ಳಯಿಂಗ್‌ಳೇ ಜಾಸ್ತಿ ಇಪ್ಪೊ. ಪೊರ ದೇಶತ್ ವಯಸ್ಸಂಗ ಎಲ್ಲಿ ಬಿಡಾರತೇ ಇಪ್ಪೊಂದೆಲ್ಲ ಸಮರ್ಥನೆ ಮಾಡಿಯೋವ. ಆಚೆಂಗಿ ಅಯಿಂಡ ಸಂಸ್ಕೃತಿಯೇ ಬೋರೆ. ನಂಗಡದೇ ಬೋರೆ. ನಂಗ ಪೆರಿಯಯಿಂಡ ಕೂಡೇ ಬದ್‌ಕ್‌ವವು. ನಂಗಡ ತಪ್ಪು ಕಂಡಲ್ಲಿ ಅಯಿಂಗ ತಿದ್ದುವ, ನಂಗಕ್ ಬದ್‌ಕುವ ಬಟ್ಟೆ ಕಾಟಿತಪ್ಪ. ಎಂತಾಚೆಂಗೂ ನಂಗಡ ಸಂಸ್ಕೃತಿನ ಮರ್‌ಪಕಾಗ. ವಯಸ್ಸಂಗ ಕೇಳರಿಮೆಕ್ ಒಳಗಾಗತೆ ತಾಂಡ ಮಕ್ಕ ಕರ್‌ಮಕ್ಕ ಸಂಸಾರತ್‌ರ ಕೂಡ ನೆಮ್ಮದಿಲ್ ಬದ್‌ಕಂಡು. ಅದೇ ನೇರಾನ ವಯಸ್ಸಂಗಡ ದಿನಾಚರಣೆ.

ಅಕ್ಟೋಬರ್ - 2

## ಅಂತರ್ರಾಷ್ಟ್ರೀಯ ಅಹಿಂಸಾ ದಿನ ಕುಷ್ಟರೋಗ ನಿವಾರಣಾ ದಿನ International Non-Violence day

ಅಕ್ಟೋಬರ್ 2ನೇ ತಾರೀಖ್ 1869ಲ್ ಮೋಹನ್‌ದಾಸ್ ಕರಮಚಂದ ಗಾಂಧಿ, ಪುಟ್ನಾನ ದಿನ. ಈ ಮೋಹನ್‌ದಾಸ್ ಗಾಂಧಿ ಎಣ್ಣುವ ಸಾಮಾನ್ಯ ಮನುಷ್ಯ ಮಹಾತ್ಮನಾನಂಥ ಕಥೆ ದುಂಬ ಬಲ್ಯದ್ ಅದನ ನಾನಿಲ್ಲಿ ಎಣ್ಣುವಕ್ ಕಯ್ಯಲೆ. ಆಚೇಂಗಿ ಮಹಾತ್ಮ ಗಾಂಧೀಜಿನ ಪ್ರಪಂಚತ್ ಏದ್ ಮೂಲೆಲೂ ಗೊತ್ತಿಲ್ಲತಂವನಿಲ್ಲೆ. ಸತ್ಯ, ಅಹಿಂಸೆನ ಪ್ರತಿಪಾದನೆ ಮಾಡ್‌ನಾಂಗಾಯಿತ್ ಗಾಂಧೀಜಿರ ಪುಟ್ನಾನ ನಮ್ಮೆನ ಅಹಿಂಸಾದಿನಾಂದ್ ಆಚರಣೆ ಮಾಡಂಡೂಂದ್ ಪ್ರಸ್ತಾಪ ಇಂಜತ್. 2007ನೇ ಇಸವಿ ಜೂನ್ ಪದನಂಚಾಂಗ್ (15) ವಿಶ್ವಸಂಸ್ಥೆರ ಸಾಮಾನ್ಯ ಸಭೆಲ್ ಈ ತೀರ್ಮಾನ ಮಾನ್ಯ ಮಾಡ್‌ಚಿ. ಇಕ್ಕ ಪ್ರಶೀ ಕಾಲ ಗಾಂಧಿ ಜಯಂತಿನ ಅಂತರ್ರಾಷ್ಟ್ರೀಯ ಅಹಿಂಸಾ ದಿನಾಂದ್ ಆಚರಣೆ ಮಾಡುವ.

ಭಾರತತ್ ಗಾಂಧಿ ಜಯಂತಿರಂದ್ ಕುಷ್ಟರೋಗ ನಿವಾರಣಾ ದಿನಾಂದೂ ಆಚರಣೆ ಮಾಡುವ. ನಂಗಕ್ ಸ್ವಾತಂತ್ರ್ಯ ಕ್‌ಟ್ಟುವಾಂಗ್ ಮಿಂಞ ಕಲ್ಯಾತ್ತಾತರ ಗಲ್ಲಿ ಗಲ್ಲಿಲೂ ಕುಷ್ಟರೋಗತ್ ವಯಂಗಿಯಂಡುಳ್ಳ ಬೋಡಿಯೆಚ್ಚಕ್ ಜನ ಇಂಜತ್. ಅಯಿಂಗಳೆಲ್ಲ ಚನ್ನಂಗೂ ಹೇಸಿಗೆ ಮಾಡಿಯೋವತೆ ಸೇವೆ ಮಾಡ್‌ನ ಮದರಾ ಥೆರೆಸಾ ಪಿಂಞ ಮಹಾತ್ಮ ಗಾಂಧೀಜಿನ ದಾರೂ ಮರ್‌ಪಾಲೆ. ಇಯಂಗಡ ಕೂಡ ಇಂಞೂ ಎಚ್ಚಕೋ ಮಹಾತ್ಮಂಗ ಸೇವೆ ಮಾಡಿತಿಕ್ಕು, ಆಚೆಂಗಿ ಗಾಂಧೀಜಿ ಮಾಡ್‌ನ ಸೇವೆನ ನೆನತಿಯೋವಕಾಯಿತ್ ಗಾಂಧಿ ಜಯಂತಿರಂದ್ ಕುಷ್ಟರೋಗ ನಿವಾರಣಾ ದಿನಾಂದ್ ಆಚರಣೆ ಮಾಡುವ. ಇಂದಿಕ್ಕ ಕುಷ್ಟರೋಗಕ್ ಮದ್ವ್ ಉಂಡ್ ಎಲ್ಲಿಯೋ ಓರೋಬ್ಬ ಸಮಯಕ್ ಸೆರಿಯಾಯಿತ್ ಚಿಕಿತ್ಸೆ ಕ್‌ಟ್ಟತೆ ಈ ರೋಗಕ್ ಬಲಿಯಾಪ.

ಗಾಂಧಿ ಜಯಂತಿನ ಅಂತರ್ರಾಷ್ಟ್ರೀಯ ಅಹಿಂಸಾ ದಿನಾಂದ್ ಆಚರಣೆ ಮಾಡುವದ್ ಭಾರತಕೂ ಭಾರತೀಯಂಗಕೂ ಬಲ್ಯ ಕುಶಿರ ವಿಷಯ.

ಅಕ್ಟೋಬರ್ - 4

## ಪ್ರಪಂಚ ಪ್ರಾಣಿ ದಿನ World Animal Day

ಪ್ರತೀ ಕಾಲ ಅಕ್ಟೋಬರ್ ನಾಲಂಗ್ ಪ್ರಾಣಿ ದಿನ ಆಚರಣೆ ಮಾಡುವ 'ಅಸಿಸಿ' ರ ಫ್ರಾನ್ಸಿಸ್ ಎಣ್ಣು ವಂವೊ ಪ್ರಾಣಿಯಕ್ ಆಶ್ರಯದಾತನೂ ಪ್ರಾಣಿ ಪಿಂಞ ಪರಿಸರ ಪ್ರೇಮಿಯೂ ಆಯಿತಿಂಜತ್. ಅಂವೊಂಡ ಗೇನತ್ ಈ ಪ್ರಾಣಿ ದಿನ ಆಚರಣೆ ಮಾಡುವ.

ಇಕ್ಕ ಎಲ್ಲ ದೇಶತೂ ಪ್ರಾಣಿ ದಯಾ ಸಂಘ, ಪ್ರಾಣಿ ಪಕ್ಷಿಯಡ ಪ್ರೇಮಿಯಡ ಎಚ್ಚಕೊ ಸಂಘ ಉಂಡ್. ಈ ಪರಿಸರತಾರ ಒರ್ ಭಾಗ ಆನನ್ನತ ಪ್ರಾಣಿಯಕೂ ನಂಗ ಬದ್ಕುವಕ್ ಅವಕಾಶ ಕೊಡ್ಕಂಡು. ಅಯಿಂಗ ಬದ್ಕಂಡು ಎಣ್ಣುಚೇಂಗಿ ಮನುಷ್ಯ ನಿಸ್ವಾರ್ಥಿ ಆಂಡು. ತಾಂಡ ಸ್ವಾರ್ಥಕಾಯಿತ್ ಪ್ರಾಣಿಯಳ ಕೊಲ್ಲುವೊ, ಪರಿಸರತಾನ ಪಾಳು ಮಾಡುವೊ, ಇನ್ನತಾನ ಮಾಡುಕಾಗ ಅಕ್ಕ ಮಾತ್ರ ಪ್ರಾಣಿ ದಿನ ಆಚರಣೆ ಮಾಡುವತೂ ಅರ್ಥ ಇಪ್ಪ.

ಇಕ್ಕಲೂ ದೇವಕ್ ಪ್ರಾಣಿ ಬಲಿ ಕೊಡ್ಪನ್ನತ ಒರ್ ದುಷ್ಟ ಪದ್ಧತಿ ಉಂಡ್. ದೇವಳೂ ಪಾಪತ ಪ್ರಾಣಿಯಳೇ ಬಲಿ ಕೇಪೊ ನರಿ, ಸಿಂಹ ಆನರನ್ನತ ಪ್ರಾಣಿಯಳ ಬಲಿ ಕೇಪ್ಲೆ. ಅದಂಗೇ ಧೈರ್ಯತ್ ಇಪ್ಪಯಿಂಗಡ ಸಾವಾಸಕ್ ದಾರೂ ಪೋಪ್ಲೆ. ಇಂಞಾಚೆಂಗೂ ಪ್ರಾಣಿ ಬಲಿ ನಿಪ್ಪಾಚಿಟ್ಟತೇಂಗಿ ಪ್ರಾಣಿ ದಿನಾಚರಣೆಕ್ ಒರ್ ಅರ್ಥ ಇಪ್ಪ.

ಅಕ್ಟೋಬರ್ - 5

## ವಿಶ್ವ ಉಪಾಧ್ಯಾಯರ ದಿನ World Teacher's Day

ಅಪ್ಪ, ಅಮ್ಮ, ಆನ ಪಿಂಞ ಗೌರವ ಸ್ಥಾನಮಾನ ಕೊಟ್ಟವರೇ ಗುರುಕ್ ಎಣ್ಣಕ ಉಪಾಧ್ಯಕ್. ಅದಂಗೆ 'ಆಚಾರ್ಯ ದೇವೊಭವ' ಎಣ್ಣವೊ. ಉಪಾಧ್ಯಯ ಮಕ್ಕಡ ಬದ್ಕನ ನಂದಾಕುವಲ್ಲಿ ಬಲ್ತರತರ ಪಾತ್ರತನ ವಹಿಸುವ. ಶ್ರೀ ಎ.ಪಿ.ಜೆ. ಅಬ್ದುಲ್ ಕಲಾಂರನ್ನತ ಎಚ್ಚಕೋ ವ್ಯಕ್ತಿಯ ಅಯಿಂಗಡ ಬದ್ಕರ ಸಾಧನೆಕ್ ಅಯಿಂಡ ಉಪಾಧ್ಯಯಳೂ ಕಾರಣಾಂದ್ ಎಣ್ಣಿಯಂಡಿತ್. ಅಕ್ಟೋಬರ್ ಅಂಜಾಂಗ್ ನೂರಾಂಗೂ ಅದಿಯಾನ ದೇಶ ಉಪಾಧ್ಯಯರ ದಿನ ಆಚರಣೆ ಮಾಡುವ.

ಭಾರತ ದೇಶತ್ ಸೆಪ್ಟೆಂಬರ್ 5ನೇ ತಾರೀಖ್ ಉಪಾಧ್ಯಯರ ದಿನ ಆಚರಣೆ ಮಾಡುವ. ಉಪಾಧ್ಯಯಾಯಿತ್ ಇಂಜಿತ್ ದೇಶತರ ಬಲ್ಯ ಸ್ಥಾನ ಆನನ್ನತ ರಾಷ್ಟ್ರಪತಿ ಪದವಿಕ್ ಎತ್ತನ ಡಾ. ಸರ್ವಪಲ್ಲಿ ರಾಧಾಕೃಷ್ಣನ್ ಪುಟ್ನ ದಿನತನ ನಂಗ ಉಪಾಧ್ಯಯರ ದಿನಾಂದ್ ಆಚರಣೆ ಮಾಡುವ. ಡಾ. ಎ.ಪಿ.ಜೆ. ಅಬ್ದುಲ್ ಕಲಾಂ ರಾಷ್ಟ್ರಪತಿ ಪದವಿಂಜ ನಿವೃತ್ತಿಯಾನ ಪಿಂಞ ಪುನಃ ಉಪಾಧ್ಯಯಾಯಿತ್ ಸೇವೆ ಮಾಡಿಯಂಡುಳ್ಳದ್ ಉಪಾಧ್ಯಯರ ಪದವಿಕ್ ಒರ್ ಬಲ್ಯ ಬೆಲೆ ಕೊಟ್ಟನನ್ನೆಕೆ ಆಯಿತ್.

ಮಿಂಞ ಗುರು ಎಣ್ಣಚಿಂಗಿ ದೇವಕ್ ಸಮಾನಾಂದ್ ಗೇನ ಮಾಡುವಯಿಂಜತ್. ವಿದ್ಯೆ ಪಡಿಪಕಾಯಿತ್ ಗುರು ಎಂತ ಕೆಲಸ ಎಣ್ಣಚೇಂಗೂ ಶಿಷ್ಯ ಮಾಡುವಯಿಂಜತ್. ಆಚೇಂಗಿ ಇಕ್ಕ ಗುರು ಎಣ್ಣಕ ಮರ್ಯಾದಿ ಕೊಡ್ಪಾಲೆ. ಕಾಲೇಜ್ ಮಕ್ಕ ಅಂತು ಗುರೂನ ಪೊಯ್ಯುವಕೂ, ಕೊಲ್ಲುವಕೂ ಪೋಪ. ಉಪಾಧ್ಯ ಆನಯಿಂಗಳೂ ಅಯಿಂಡ ಕೆಲಸಕ್ ಬೆಲೆ ಬಪ್ಪನ್ನೆಕೆ ನಡಂದೊಂಡು. 'ಡಾಕ್ಟರರ ತಪ್ಪು ಮಣ್ಣಲ್ ಪೂಪಲೊ, ಲಾಯರರ ತಪ್ಪು ಕೇರಲ್ ತೂಂಗುವಲೊ ಅದೇ ಉಪಾಧ್ಯರ ತಪ್ಪು ನೂರ್ ಕಾಲಕೂ ಭೂಮಿರ ಮೇಲೆ ಕೂಳಿರ ಮಾದರಿ ತಿರಿಯಂಡಿಪ್ಪಲೊ' ಎಣ್ಣಕ ಉಪಾಧ್ಯ ತಾಂಡ ಶಿಷ್ಯಂಗ್ ತಪ್ಪು ಎಣ್ಣೆತ್ ಕೊಡ್ತತೇಂಗಿ ಅವೊ ಅದನೇ ಪಡ್ಚೆಂಡ್ ತಾಂಡ ಮಕ್ಕಕೂ, ಕೊರ್ಮಕ್ಕಕೂ ಅದನೇ ಪಡ್ಪೆಚಿಡುವಾಂದ್. ಅದಂಗೆ ಉಪಾಧ್ಯ ಆನಯಿಂಗ ಆ ಸ್ಥಾನಕ್ ಸೆರಿಯಾಯಿತ್ ವ್ಯಕ್ತಿತ್ತ್ ಜ್ಞಾನ ಬೊಳ್ತಿಯೊಂಡು.



ಅಕ್ಟೋಬರ್ - 9

## ವಿಶ್ವ ಪೋಸ್ಟ್ ದಿನ World Post Day

ಕಾಗದ ಅಲ್ಲೇಂಗಿ ಪೋಸ್ಟ್ ಎಣ್ಣುವಕ ನಂಗಕ್ ಕಾಳಿದಾಸಂಡ ಮೇಘ ಸಂದೇಶ, ನಳ ದಮಯಂತಿರ ಹಂಸ ಎಲ್ಲ ಗೇನ ಬಪ್ಪಲ್ಲ? ಅಂದ ಕಾಲತ್ ಪೋಸ್ಟ್, ಪೋಸ್ಟ್ ಮ್ಯಾನ್ ಒಂದೂ ಇಂಜಿಲೆ. ಪಕ್ಷಿರ ಕಾಲ್‌ಕ್ ಕಾಗದ ಕಟ್ಟಿತ್ ಅಯೆಪಯಿಂಜತ್. ರಾಜಂಗ ದೂತಂಗಡ ಕೈಲ್ ಕಾಗದ ಅಯೆಪಯಿಂಜತ್. ರಾಜ ದೂತಂಗ ಕುದುರೆಲ್ ಪೋಪಯಿಂಜತ್. ಸಾಮಾನ್ಯವಾಯಿತ್ ಪಾರಿವಾಳತ್‌ನೇ ಕಾಗದ ಅಯೆಪಕ್ ಬಳಸುವಯಿಂಜತ್.

1837ನೇ ಇಸವಿಲ್ ಭಾರತತ್ ಅಂಚಿ ಸೇವೆ ಸುರು ಆಚಿ. ಅಲ್ಲಿಂಜ ಓರ್ ಚಾಗತಿಂಜ ಇಂಞೋರ್ ಚಾಗಕ್ ಕಾಗದ ಅಯೆಪಕ್ ಸುಲಭ ಆಚಿ. 1854ಲ್ ಕರಾಚಿಲ್ ಆದ್ಯವಾಯಿತ್ ಪೋಸ್ಟಲ್ ಸ್ಟ್ಯಾಂಪ್ ಬುಡ್‌ಗಡೆ ಆಚಿ. ಇಂದ್ ಇಂಟರ್‌ನೇಟ್ ಈ-ಮೇಲ್‌ರ ಯುಗ. ಇಕ್ಯ ಪೋಸ್ಟ್ ಕಡೇ ಮೊಟ್‌ಲ್ ನಿಂದಿತ್ ಪೋನ್, ಮೊಬೈಲ್ ಇಪ್ಪಕ ಕಾಗದತ್‌ರ ಸುದ್ದಿ ಕೇ ಪೋಪದ್ ಕಮ್ಮಿ. ಅನ್ನನಾಯಿತ್ ಜನ ಕಾಗದ ಎಳ್ವಾವದೇ ಮರಾಂದ್‌ರತ್ ಎಣ್ಣೊಲು. ಎಂತ ಎಣ್ಣೆ ಚೇಂಗೂ ಆ ಕಾಗದತ್‌ರ ಚೋದೆ ಬೋರೆ. ಪಳೆಯ ಕಾಗದ ಬೆಚ್ಚಂಡ್ ಪಳೆಯ ಗೇನತ್‌ರ ಸೊಪನಕ್ ಮುಳುವ ಚಾಯಿ ಉಂಡಲ್ಲ, ಅದ್ ಈ ಪೋನ್‌ಕಾಡ್, ಈ-ಮೇಲ್ ಕಾಡ್ ಇಲ್ಲೆ.

ಎಂತೇ ಆಡ್ ಅಂಚಿ ಸೇವೆ ತಾಂಡದೇ ಆನ ವಿಶೇಷತೆಲ್ ಮೆರಾಂದಿತ್. ವಿಶ್ವ ಅಂಚಿ ದಿನ 9ನೇ ಅಕ್ಟೋಬರ್ ಆಚೇಂಗಿ 10ನೇ ಅಕ್ಟೋಬರ್‌ಲ್ ಭಾರತತ್ ಅಂಚಿ ದಿನ ಆಚರಣೆ ಮಾಡುವ.

ಅಕ್ಟೋಬರ್ - 10

## ವಿಶ್ವ ಮಾನಸಿಕ ಆರೋಗ್ಯ ದಿನ World Mental Health Day

ಮನುಷ್ಯನ ದೈಹಿಕ ಆರೋಗ್ಯ ಚಾಯಿಲಿರೊಂಡು ಎಣ್ಣೆ ಚೇಂಗಿ ಅಂವೊಂಡ ಮಾನಸಿಕ ಆರೋಗ್ಯ ಚಾಯಿಲಿರೊಂಡು. ಮನ್‌ಸಾರ ರೋಗತನ ಕಂಡ್ ಪುಡಿಪದೂ, ಕಷ್ಟ, ವಾಸಿ ಮಾಡುವದೂ ಕಷ್ಟ. ಅದಂಗ್ ಪಿಕೀರಿ (ಖಿನ್ನತೆ-Depression) ಬಪ್ಪಕಲೇ ಮಾನಸಿಕ ತಜ್ಞಂಗಡ ಪಕ್ಕ ಪೊಂಡು. ಸಲಹೆ, ಚಿಕಿತ್ಸೆ ಪಡ್‌ಂದೊಂಡು.

ಜನ ಮಾನಸಿಕ ತಜ್ಞಂಗಡ ಪಕ್ಕ ಪೋಪಕೇ ಬೊತ್ತುವ. ಮೆಂಟಲ್ ಹಾಸ್ಪಿಟಲ್‌ಕ್ ಪೋನದ್ ದಾರೇಂಗಿ ಕಂಡತೇಂಗಿ ಪುಚ್ಚಿ ಎಣ್ಣೆರುವಾಂದ್ ಪೋಡಿ. ಮನುಷ್ಯನ ಜೀವನತ್ ಮಾನಸಿಕ ಆರೋಗ್ಯ ದುಂಬ ಮುಖ್ಯ ಪಟ್ಟಿದ್. ಇಂದೇತ ಗಡಿಬಿಡಿರ ಯುಗತ್ ಎಲ್ಲರ್‌ಕೂ ಎಲ್ಲಾಂಗೂ ಗಡಿಬಿಡಿಯೇ. ಅನ್ನನೇ ಮಂಗಲವೂ ಗಡಿಬಿಡಿಲ್ ಕಯಿಚಿತ್ ನಾಲ್ ದಿವಸಕ್ ಡೈವೋರ್ಸೂ ಆಯಿರುವ. ಈ ಸ್ಥಿತಿಕ್ ಆಣೂ-ಪೊಣ್ಣೂ ದಂಡಾಳೂ ಕಾರಣವೆ. ಎನ್ನತ ಸಮಸ್ಯೆ ಬಾತೇಂಗೂ (Counselling) ಸಲಹೆ ಎಡ್‌ತಂಡ್ ಬದ್‌ಕ್‌ನ ಚಾಯಿಕೂಟಿಯೋವಲು. ಯುವಜನ ಬಾಲೆಕಾರ ದೈಹಿಕವಾಯಿತೂ, ಮಾನಸಿಕವಾಯಿತೂ ಗಟ್ಟಿಯಾಯಿತ್ ಇರೊಂಡು.

ಮಾನಸಿಕ ಆರೋಗ್ಯ ದಿನ ಆಚರಣೆ ಮಾಡ್‌ನಕ ಪೋರ, ಮಾನಸಿಕ ರೋಗಿಯಳ ಮಾನವೀಯತೆರ ದೃಷ್ಟಿಲ್ ಕಾಂಗೊಂಡು.

**ಅಂತರ್ರಾಷ್ಟ್ರೀಯ ಮದ್ದು ದುರುಪಯೋಗ  
ಪಿಂಞ ಅನ್ಯಾಯತ್ವ ವ್ಯಾಪಾರ ವಿರೋಧಿ ದಿನ  
International Day against Drug abuse and Illicit Trafficking  
International Day in Support of Victims of Torture**

ಚಿತ್ರಹಿಂಸೆಕೆ ಬಲಿಯಾನಯಿಂಗ್‌ಗೆ ಬೆಂಬಲ ಕೊಡ್‌ಪ ಅಂತರ್ರಾಷ್ಟ್ರೀಯ ದಿನ.

ಈ ದಂಡೂ ಆಚರಣೆ ವಿಶ್ವ ಸಂಸ್ಥೆರ ಮಾನ್ಯತೆ ಪಡ್‌ಂದಿತ್. ಗಾಂಜಾ, ಅಫೀಮು, ಹೆರಾಯಿನ್, ಬ್ರೌನ್ ಶುಗರ್‌ರನ್ನತ ಸುಮಾರಲ್ಲ ಮಾದಕ ವಸ್ತುನ ಮದ್ದು ಆಯಿತೂ ಬಳಕೆ ಮಾಡಲು, ಮತ್ತ್ ಆಯಿತೂ ಬಳಕೆ ಮಾಡಲು. ಇದ್‌ನ ಮತ್ತ್ ಆಯಿತ್ ಬಳಕೆ ಮಾಡುವದೇ ಜಾಸ್ತಿ. ಅನ್ನನೆ ಮಾಡುವಕ ಕಾನೂನ್ ರೀತಿಲ್ ಅದ್‌ಂಡ ವ್ಯಾಪಾರ ಮಾಡುವಕ್ ಕಯ್ಯಲೆ. ಅಕ್ಕ ಈ ಅನ್ಯಾಯತ್ವ ವ್ಯಾಪಾರ ಶುರುವಾಪ. ಇನ್ನತಾಂಡ ವಿರುದ್ಧ ಕೂತ್ ಕೊಡ್‌ಪದೇ ಈ ದಿನಾಚರಣೆರ ಮುಖ್ಯ ಉದ್ದೇಶ. ಈ ಮತ್ತ್‌ನ ಬಳಕೆ ಮಾಡುವ ಮಕ್ಕ ಬಾಲೆಕಾರ ಪರೋಕ್ಷ ವಾಯಿತ್ ಈ ಮದ್ದರ ಕಳ್ಳ ವ್ಯಾಪಾರಕ್ ಕಾರಣಕರ್ತಂಗ ಆಪ. ಇದಂಡ ದುಶ್ಚಟಕ್ ಬುದ್ಧ ಮಕ್ಕ ತಂಗಡ ಬಾಳ್‌ನೇ ಕಳ್‌ಂದೋವ. ಅದಂಗಾಯಿತ್ ಇದ್‌ನ ವಿರೋಧ ಮಾಡುವದ್ ಪ್ರಸ್ತುತ ಸಮಾಜತ್ ಅವಶ್ಯವಾಯಿತ್ ಕಂಡಂಡುಂಡ್.

ಜೂನ್ 26ನೇ ತಾರೀಖ್‌ಲ್ ಚಿತ್ರ ಹಿಂಸೆಕೆ ಬಲಿಯಾಯಿತ್ ಮಾನಸಿಕ ಸಂತುಲನ ಕಳ್‌ಂದಂಡಯಿಂಗ್‌ಕ್, ಶಾರೀರಿಕವಾಯಿತ್ ನೊಂದ ಜನಕೂ ಬೆಂಬಲ ಕಾಟುವನ್ನತ ಅಂತರ್ರಾಷ್ಟ್ರೀಯ ದಿನ ಆಯಿತೂ ಈ ದಿನತ್‌ನ ನಡ್‌ತುವ. ಏದೇ ಒರ್ ಸಂದರ್ಭತಾಯಿತಿಕ್ಕು, ಚಿತ್ರ ಹಿಂಸೆಕೆ ಗುರಿಯಾನಯಿಂಗ್‌ಗೆ ಬೆಂಬಲ ಕಾಟುವ ದಿನ ಇದ್. ಉರ್ತಮಾರಿಯಳುಂಡ್ ಕಷ್ಟಕ್ ಒಳಪಟ್ಟಯಿಂಗ, ಅತ್ಯಾಚಾರಕ್ ಒಳಪಡುವ ಪೊಮ್ಮಕ್ಕು, ಪೂಕುಂಞಿಯ ಅಪರಾಧಿಯಡ ಬದ್‌ಲ್‌ಕ್, ಕಣ್ಣಪ್ಪಾಲೊ, ಸಾಕ್ಷಿ ಆಧಾರತೊ ನಿರಪರಾಧಿಯ ಜೈಲ್‌ಕ್ ಪೋಯಿತ್ ಪೊಲೀಸಡ ಹಿಂಸೆಕೆ ಬಲಿಯಾನಯಿಂಗ ಅದೆಚ್ಚಕ್ ಮಾನಸಿಕ ಪಿಂಞ ಶಾರೀರಿಕ ನೊಂಬಲ ಅನುಭವಿಚಿಡುವ, ಅನ್ನತಯಿಂಗ್ ಇಂತ ದಿನಾಚರಣೆ ಮಾಡುವಾನಗುಂಡ್ ನ್ಯಾಯ ಕ್‌ಟ್ಟುವಾ? ಖಂಡಿತಾ ಇಲ್ಲೆ. ಒಮ್ಮ ಜೈಲ್‌ಕ್ ಪೋಯಿತ್ ಬಂದಯಿಂಗಳ ಸಮಾಜ ನೋಟುವ ದೃಷ್ಟಿಯೇ ಬೋರೆ. ಒಮ್ಮ ಅತ್ಯಾಚಾರಕ್ ಒಳಪಟ್ಟ ಪೊಮ್ಮಕ್ಕುಳ ಸಮಾಜತ್ ಅದ್‌ಲೂ ಪೊಮ್ಮಕ್ಕುಳೇ ಬಹಿಷ್ಕಾರ ಬೆಚ್ಚನ್ನನೆ ಕಳಪ. ಇನ್ನನಿಪ್ಪಕ ಎಂತ ಬೆಂಬಲ ಕ್‌ಟ್ಟುವೊ ಗೊತ್‌ಲೆ. ಮನುಷ್ಯಂಡ ಗೇನ ಮಾಡುವ ದೃಷ್ಟಿ ಬದ್‌ಲಾಂಡು. ಅಚ್ಚಿಕೆ ಅಕ್ಕಲೇ ಇನ್ನತ ಆಚರಣೆ ಎಲ್ಲ ಸಾರ್ಥಕ ಆಪೊ.

ಅಕ್ಟೋಬರ್ - 16

## ವಿಶ್ವ ಆಹಾರ ದಿನ World Food Day

ವಿಶ್ವ ಸಂಸ್ಥೆರ ಆಹಾರ ಪಿಂಞ ಕೃಷಿ ಸಂಸ್ಥೆ 1945 ಅಕ್ಟೋಬರ್ 16ನೇ ತಾರೀಖ್ ಸುರುವಾಚಿ. ಅದಗ್ಂಡ ನೆಪ್ಪಾಯಿತ್ ಅಕ್ಟೋಬರ್ ಪದ್ನಾರಾಂಗ್ ಆಹಾರ ದಿನ ಆಚರಣೆ ಮಾಡುವ. ಪ್ರತೀ ದೇಶಕೂ ತಾನ್ ಆಹಾರ ಉತ್ಪಾದನೆಲ್ ತಾಂಗ್ ಬೋಂಡಿಯಚ್ಚಕ್ ಉತ್ಪಾದನೆ ಮಾಡಿಯೋಂಡೂಂಡ್ ಆಸೆ ಇಪ್ಪ. ಅದ್ ಸಾಧ್ಯ ಆಕತಿಪ್ಪಕ ಜಾಸ್ತಿ ಉಳ್ಳ ದೇಶತ್‌ಲಿಂಜ ಎಡ್‌ತವಂಡಿಯಾಪ. ಅನ್ನನೇ ನಂಗಡ ದೇಶತ್ ಜಾಸ್ತಿ ಇಂಜತೇಂಗಿ ಬೋರೆ ದೇಶಕ್ ಅಯೆಚಿ ಕೊಡ್‌ಕಲು.

ತಾನ್ ಬೋಳ್‌ಂದ ಬೋಳೆಕ್ ಸರಿಯಾನ ಬೆಲೆ ಕ್ಕಟ್ಟತಿಪ್ಪಕ ರೈತ ಸಾಲ ಸೋಲ ಮಾಡಂಡಿಯಾಪ. ಬಡ್ಡಿ ಕೆಟ್ಟುವಕ, ಅಸಲ್ ಕೆಟ್ಟುವಕ್ ಕಯ್ಯತಾಪಕ ರೈತ ಆತ್ಮಹತ್ಯೆಕ್ ಶರಣಾಪ. ಭಾರತತ್‌ರ ಬೆನ್ನ ಮೂಳೆರ ಮಾದಾರಿ ಉಳ್ಳ ರೈತಂಗ್ ಇನ್ನತ ಪಾಡ್ ಬಂದದ್ ವಿಪರ್ಯಾಸ.

ಆಹಾರ ಭೂಮಿಲುಳ್ಳ ಪ್ರತಿ ಜೀವಿಕೂ ಮುಖ್ಯಪಟ್ಟದ್. ಭೂಮಿಲುಳ್ಳ ಎಲ್ಲ ಜೀವಿಯಕೂ ಕೆಲದುಂಬ ಆಹಾರ ಕ್ಕೆಚ್ಚೇಂಗಿ ಆಹಾರ ದಿನ ಸಾರ್ಥಕ ಆಪ.

ಅಕ್ಕೋಬರ್ - 17

## ವಿಶ್ವ ಬಡತನ ನಿರ್ಮೂಲನ ದಿನ International Day for Eradication of Poverty

ಪ್ರತೀ ಕಾಲ 17ನೇ ತಾರೀಖ್ ಅಕ್ಕೋಬರ್ ತಿಂಗಳ ಪ್ರಪಂಚತಾಲೆಲ್ಲ ಬಡತನ ಪೋಷಾಚಿಡುವ ದಿನಾಚರಣೆ ಮಾಡುವ. ವಿಶ್ವಸಂಸ್ಥೆ 1992ನೇ ಇಸವಿಲ್ ಬಡತನ ನಿರ್ಮೂಲನಾ ದಿನ ಆಚರಣೆ ಮಾಡಂಡೂಂದ್ ತೀರ್ಮಾನ ಮಾಡ್ಚಿ. ಆದ್ಯವಾಯಿತ್ ಈ ದಿನತನ 1987ನೇ ಇಸವಿಲ್ ಫ್ರಾನ್ಸ್ ದೇಶತರ ಪ್ಯಾರಿಸ್‌ಲಾ ನಡಂದತ್. ಸುಮಾರ್ ಒರ್ ಲಕ್ಷ ಜನ ಕೂಡಿತಿಂಜತ್.

ಬಡತನ ಮನುಷ್ಯಂಗ್ ಒರ್ ಶಾಪ ಉಳ್ಳನ್ನಕೆ ಉಂಬಕ್ ಕೂಳ್‌ಕ್, ಉಡ್‌ಪ್, ಕಾಯಿಲಕ್ ಮದ್ವ್, ವಿದ್ಯೆಕ್ ಎಲ್ಲಂಗೂ ಕಷ್ಟವೆ ಬಡತನತ್. ಕೆಲವು ಜನ ಸೋಮಾರಿಯಳಾಯಿತ್ ಬಡತನ ಬಪ್ಪಚಿಟ್ಟವ. ಕೆಲವು ಜನಕ್ ಮಾಡುವಕ್ ಕೆಲಸ ಇಪ್ಪಾಲೆ. ಎಲ್ಲ ಕೆಲಸ ಮಾಡುವಕ್ ತಯಾರಿಪ್ಪಾಲೆ. ಇನ್ನನೆ ಪಲತರತರ ಸಮಸ್ಯೆ ಬಡತನಕ್ ಕಾರಣ. ಉಂಬಕ್ ಕೂಳ್, ಇಪ್ಪಕ್ ಜಾಗ, ಆರೋಗ್ಯ, ವಿದ್ಯೆ, ಇಚ್ಚೆಕ್ ಕ್‌ಟ್ಚೆಚೇಂಗಿ ಬಡತನ ನಿರ್ಮೂಲನೆ ಆಪ.

ಒರೊಂದ್ ಕೊಳಗೇರಿಲ್ ಪೋಯಿತ್ ನೋಟಾನಕಲೇ ಗೊತ್ತಾಪೊ ಬಡತನ ಎಣ್ಣಕ ಎಂತೆಂದ್. ಭಾರತತ್ ಪ್ರತಿಯೊಬ್ಬಂಗೂ ಕೂಳ್, ಬಟ್ಟೆ, ಆರೋಗ್ಯ ವಿದ್ಯೆರನ್ನತ ಮೂಲಭೂತ ಅವಶ್ಯಕತೆ ಆಚೇಂಗೂ ಕ್‌ಟ್ಟುವಕಾಚೇಂಗಿ ನಂಗಡ ದೇಶ ಅಭಿವೃದ್ಧಿ ಆಚೇಂದ್ ಖುಷಿಪಡೊಲು.

ಅಕ್ಟೋಬರ್ - 24

## ಯುನೈಟೆಡ್ ನೇಷನ್ಸ್ ದೇ

### United Nations Day

1945ನೇ ಇಸವಿ ಅಕ್ಟೋಬರ್ 24ಂಗೆ ಅಸ್ತಿತ್ವಕ್ಕೆ ಬಾತ್. ಪ್ರಪಂಚತ್ಲೆಲ್ಲ ವಿಶ್ವಸಂಸ್ಥೆ ಎಚ್ಚಕ್ ಕಾರ್ಬಾರ್ ಮಾಡಿತ್. ಎಚ್ಚಕ್ ದೇಶತ್ ಕಷ್ಟ ಬಪ್ಪಕ ಸಹಾಯ ಮಾಡಿತ್, ಸಮಸ್ಯೆ ಬಪ್ಪಕ ಪರಿಹಾರ ಮಾಡಿತ್ ಎಣ್ಣುವಾಂಡ ನೆಪ್ಪ್ಪರ ದಿನತ್ನ ಆಚರಣೆ ಮಾಡುವದೇ ಈ ದಿನತ್ರ ಉದ್ದೇಶ. ವಿಶ್ವ ಸಂಸ್ಥೆರ ಭದ್ರತಾ ಸಮಿತಿರ ಸದಸ್ಯತ್ವ ಕ್ಕೆತ್ತಿಂಜಕಲೂ, ಭಾರತಕ್ ಇಂಞೂ ಖಾಯಂ ಸದಸ್ಯತನ ಕ್ಕೆತ್ತಿತ್ಲೆ. ಅದಂಗಾಯಿತ್ ಬಲ್ಯ ಪ್ರಯತ್ನ ನಡ್ಂದಂಡೇ ಉಂಡ್. ವಿಶ್ವ ಸಂಸ್ಥೆರ ಇಕ್ಯತ್ರ ಕಾರ್ಯದರ್ಶಿ ಬಾನ್-ಕಿ-ಮೂನ್. ವಿಶ್ವ ಸಂಸ್ಥೆ ಪ್ರಪಂಚತ್ ಎಲ್ಲ ದೇಶತ್ನೂ ಒರೇ ತರ ಕಾಂಗಂಡು. ನ್ಯಾಯ ಕೊಡ್ಕಂಡು.

ಅಕ್ಟೋಬರ್ - 30

## ವಿಶ್ವ ಉಳಿತಾಯ ದಿನ

### World Savings Day

ಭಾರತೀಯಂಗಡ ಉಳಿತಾಯ ಮನೋಭಾವವೇ ಇಂದ್ ಪ್ರಪಂಚತೇ ಬಲ್ಯದಾಯಿತುಳ್ಳ ಸಮಸ್ಯೆ. 'ಆರ್ಥಿಕ ಮುಗ್ಗಟ್ಟ್'ಂಜ ಭಾರತ ಪೊರಮೆ ಉಳ್ಳಂಜಿತ್. ನಂಗ ಉಳಿತಾಯ ಮಾಡುವದ್ ನಂಗಕ್ ಮಾತ್ರ ಅಲ್ಲ ಇಡೀ ದೇಶತ್ರ ಕಾರ್ಬಾರ್ಕ್ ಮೊಳಿ ಆಪ. ಜಪಾನ್ಲ್ ಉಳಿತಾಯತ್ರ ಪಣಕ್ ಜನ ಬಡ್ಡಿ ಎಡ್ತೋವತೆ ಸರಕಾರಕೇ ಬುಡುವಲೊ. ಅದ್ ದೇಶತ್ರ ಅಭಿವೃದ್ಧಿಕ್ ಸಹಾಯ ಆಪ. ಇದಂಗ್ ದೇಶಾಭಿಮಾನ ಎಣ್ಣುವೊ ಅಲ್ಲ? ಪ್ರತಿಯೊಬ್ಬನೂ ತಾಂಡ ಸಂಪಾದನೆಲ್ ಚೆನ್ನಂಗ್ ಪಾಲ್ ಉಳಿತಾಯ ಮಾಡ್ಚೇಂಗಿ ಅದ್ ನಂಗಡ ಕಷ್ಟ ಕಾಲತೂ ಉಪಯೋಗ ಆಪ. ದೇಶಕೂ ಲಾಭ. ಇದ್ನ ಜನಪ್ರಿಯ ಮಾಡುವಕಾಯಿತೇ ಉಳಿತಾಯ ದಿನ ಆಚರಣೆ ಮಾಡುವೊ.

## ರಾಷ್ಟ್ರೀಯ ಏಕತಾ ದಿನ

### National Unity Day

ಈ ದಿನ ನಂಗಡ ಭಾರತ ದೇಶತ್ ಇತಿಹಾಸತ್ ಪಾಳೆಲೋರ್ ಕರ್ತಚುಕ್ಕಿ. ದೇಶತ್ ಆದ್ಯ ಮಹಿಳಾ ಪ್ರಧಾನ ಮಂತ್ರಿ ಆಯಿತಿಂಜ ಶ್ರೀಮತಿ ಇಂದಿರಾ ಗಾಂಧಿ ಅಯಿಂಗಳ, ಅಯಿಂಡ ಅಂಗರಕ್ಷಕನಾಯಿತಿಂಜ ಸತ್ವಂತ್ ಸಿಂಗ್ ಪಿಂಇ ಬಿಯಾಂತ್ ಸಿಂಗ್ ಎಣ್ಣವ ದಂಡಾಳ್ ಬೊಡಿ ಬೆಚ್ಚಿತ್ ಕೊಂದ ದಿನ.

ಆ ಕೊಲೆನ ಸಿಖ್ ಜನಾಂಗಕಾರ ಮಾಡ್ಚಿ ಎಣ್ಣವ ಕಾರಣಕ್ ಬೋರೆ ಜನಾಂಗಕಾರ ಎಲ್ಲ ಒಂದಾಯಿತ್ ಕ್ಹಟ್, ಕ್ಹಟ್ವನ ಸಿಖ್ ಜನಳ ಕೆತ್ತುವದೂ, ಕೊಲ್ಲುವದೂ, ಪೊಮ್ಮಕ್ಕಳ ಅತ್ಯಾಚಾರ ಮಾಡುವದೂ ಸುಮಾರ್ ನಡ್ಂದತ್. ದಾರೋ ಮಾಡ್ನ ತಪ್ಪುಕ್ ದಾರ್ಕೋ ಶಿಕ್ಷೆ ಎನ್ನಂಗ್? ಇದ್ನ ಮೂಢ ಜನ ಅರ್ಥ ಮಾಡಿಯಂಡದೇ ಇಲ್ಲೆ. ಸಿಖ್ಚಿಡ ಚೋರೆ ಒಕ್ಕಚಿ. ಈ ಗಲಾಟೆ ನಿಪ್ಪಕ್ ಕಾಲವೇ ಬೋಂಡಿಯಾಚಿ. ಎಚ್ಚಕೋ ಅಭಿವೃದ್ಧಿ ಕೆಲಸ ಬಾಕಿಯಾಚಿ.

ಈ ತರ ಘಟನೆ ಪುನಃ ನಡ್ಕತಿರಡ್ಂದ್ ಏಕತಾ ದಿನ ಆಚರಣೆ ಮಾಡುವ. ಭಾರತ ಬೋರೆ ಬೋರೆ ಜನಾಂಗ, ಸಂಸ್ಕೃತಿಕಾರವುಳ್ಳ ದೇಶ. ಆನಾನಗುಂಡ್ ಎಲ್ಲರೂ ಸಹೋದರ ಭಾವನೆಲ್ ಬದ್ಕಿಯಂಡ್ ಪೋಚೇಂಗಿ ಭಾರತ ಅಭಿವೃದ್ಧಿ ಆಪಾತ್ ಸಂಶಯವೇ ಇಲ್ಲೆ.

ನವೆಂಬರ್ - 9

## ವಿಶ್ವ ಸಂಶೋಧಕಂಗಡ ದಿನ

### World Inventors Day

ಸಾಮಾನ್ಯವಾಯಿತ್ ವಿಶ್ವ ಸಂಶೋಧಕಂಗಡ ದಿನ ಒರೊಂದ್ ದೇಶತ್ ಒರೊಮ್ಮೆ ಆಚರಣೆ ಮಾಡುವ. ಅರ್ಜಂಟೈನ ದೇಶತ್ ಬಾಲ್‌ಪಾಯಿಂಟ್ ಪೆನ್ ಕಂಡ್ ಪುಡ್‌ಚ ಲಾಜ್‌ಲೊ ಜೋಸೆಫ್ ಬೀರೊರ ಪೆದತ್ ಅಂವೊಂಡ ಪುಟ್ನ ದಿನ ಆನನ್ತ ಸೆಪ್ಟೆಂಬರ್ 29ಂಗ್, 1986ನೇ ಇಸವಿಂಜ ಆಚರಣೆ ಮಾಡುವ ಯಿಂಜತ್.

ಅನ್ನನೇ ಜರ್ಮನಿ ಭಾಷೆ ತಕ್ ಪರಿವ ದೇಶತ್ (ಜರ್ಮನಿ, ಆಸ್ಟ್ರೀಲಿಯಾ, ಸ್ವಿಡ್ಜರ್‌ಲ್ಯಾಂಡ್) ನವೆಂಬರ್ 9ಂಗ್ ಹೆಡಿ ಲಾಮರ್ ಎಣ್ಣೆವ ವಿಚ್ಚಾನಿರ ಪುಟ್ನಮ್ನಿನ ಆಚರಣೆ ಮಾಡುವ. ಪಿಂಞ ಕೆಲವು ಜಾಗತ್ ಧಾಮಸ್ ಆಲ್ವ ಎಡಿಸನ್‌ರ ಪುಟ್ನ ದಿನ, ಫೆಬ್ರವರಿ 11ಂಗ್ ಆಚರಣೆ ಮಾಡುವ. ಇದೆಲ್ಲ ಆಚರಣೆರ ಮುಖ್ಯ ಉದ್ದೇಶ ದೇಶಕೂ, ವಿಶ್ವಕೂ ಅಯಿಂಗಡ ಸಂಶೋಧನೆನ ಗುಂಡ್ ಆನ ಲಾಭತ್‌ನ ಕೃತಜ್ಞತೆಯೋಡೆ ಗೇನ ಮಾಡಿಯೋವದ್. ಇದ್ ಅವಶ್ಯ ಕೂಡ.



ನವೆಂಬರ್ - 16

## ಅಂತರ್ರಾಷ್ಟ್ರೀಯ ತಾಳ್ಮೆ ದಿನ

### International Day For Tolerance

ಚೆಡಿನಗುಂಡ್ ಅಪನ್ನತ ಅನಾಹುತತ್‌ನ ಸಮಾಜತ್‌ರ ಜನಕ್ ಅರಿವಿಕೆ ಕೊಡ್‌ಪಕಾಯಿತ್ 1995ಲ್ ಯುನೆಸ್ಕೋ ಈ ತಾಳ್ಮೆ ದಿನತ್‌ನ ಆಚರಣೆ ಮಾಡುವಕ್ ತೀರ್ಮಾನ ಮಾಡ್‌ಚಿ.

ಇಂದ್ ಪ್ರಪಂಚತ್ ಎನ್ನತೆಲ್ಲ ಕೊಲ್ಲ್ ಕೊಲೆ ಅಪಘಾತ ಆಯಂಡುಂಡೋ ಅದಂಗೆಲ್ಲ ಮೂಲ ಕಾರಣ ಜನ ತಾಳ್ಮೆ ಕಳ್‌ಂದೋವದ್. ಅದ್‌ಂಗೇ ಪೆರಿಯಯಿಂಗ್ 'ತಾಳಿದವನು ಬಾಳಿಯಾನು' ಎಣ್ಣೆತ್ ಪಳಂಜೊಲ್ಲ್ ಎಳ್ಳಿ ಬೆಚ್ಚಿತ್.

ನವೆಂಬರ್ - 17

## ಅಂತರ್ರಾಷ್ಟ್ರೀಯ ವಿದ್ಯಾರ್ಥಿ ದಿನ

### International Students Day

ಸಾಮಾನ್ಯವಾಯಿತ್ ನವೆಂಬರ್ 17ಂಗ್ ಪ್ರಪಂಚತ್‌ರ ಸುಮಾರೆಲ್ಲ ಜಾಗತ್ ವಿದ್ಯಾರ್ಥಿ ದಿನ ಆಚರಣೆ ಮಾಡುವ. ಕೆಲವು ಜಾಗತ್ ವಿದ್ಯಾರ್ಥಿಯಡ ದಿನ ಬೋರೆ ಬೋರೆ ದಿನ ಸಹ ಆಚರಣೆ ಮಾಡುವ.

ಮನುಷ್ಯ ಚಾವಣೆಕೂ ವಿದ್ಯಾರ್ಥಿಯೆ. ಚಾವಲ್ಲಿಕತ್ತನೆಯೂ ಮನುಷ್ಯಂಗ್ ಪಡಿಪಕ್ ಇಪ್ಪ. ವಿದ್ಯಾರ್ಥಿ ಜೀವನಾಂದ್ ನಂಗ ಏದ್‌ನ ಎಣ್ಣುವ ಆ ಕಾಲ ಒರ್ ಪೊನ್ನರ ಕಾಲ ಎಣ್ಣೊಲು. ಎನ್ನಂಗ್‌ಂದೆಣ್ಣ್ ಚೆಂಗಿ ವಿದ್ಯಾರ್ಥಿಯ ತಂಗಡ ವಿದ್ಯಾರ್ಥಿ ಜೀವನತ್ ಸಮಯ ಪಾಳ್ ಮಾಡತೆ ಓದಿತ್ ಎಳ್ಳಿತ್ ಮಾಡ್‌ಚೆಂಗಿ ಮಿಂಞಾಕ್ ಅಯಿಂಡ ಬದ್‌ಕ್ ನಂದಾಪ. ಇದೇ ಈ ಆಚರಣೆರ ಉದ್ದೇಶ.

## ವಿಶ್ವ ಕಕ್ಕುಸ್ ದಿನ

### World Toilet Day

ವಿಶ್ವ ಕಕ್ಕುಸ್ ಸಂಸ್ಥೆಲ್ ಅಸ್ಟ್ರೇಲಿಯಾ, ಜಪಾನ್, ರಷ್ಯಾ ಕೂಡ್‌ನನ್ನೆಕೆ ನಾಪತ್ತನಾಲ್ ದೇಶ ಕೂಡಿತ್ ಪ್ರತಿ ಕಾಲ ನವೆಂಬರ್ ಪತ್ತೊಯಿಂಬದಾಂಗ್ ಈ ದಿನಾಚರಣೆ ನಡತ್‌ವ.

ಕಕ್ಕುಸ್ ದಿನವೂ ಆಚರಣೆ ಮಾಡಂಡುವಾಂದ್ ಗೇನ ಮಾಡತಿ. ಇಚ್ಚಕ್ ಆಧುನಿಕತೆ ಮುಂದ್‌ವರ್‌ಂಜಿತಿಂಜಕಲೂ ನಂಗಡ ದೇಶತ್ ಕಕ್ಕುಸ್ ಇಲ್ಲತ ಮನೆ ಎಚ್ಚೆಕೋ ಉಂಡ್. ಅಯಿಂಗ ಎಲ್ಲ ತೋಟಕೋ, ಕೆರೆರ ಪಕ್ಕಲೋ, ಬೇಲ್‌ಕೋ, ರೈಲ್ ಟ್ರಾಕ್‌ರ ಪಕ್ಕತೊ ಪೋಯಿತ್ ಅಳೆಪ. ಪರಿಸರ ಪಾಳಾಪ. ಕಾಯಿಲ ಪಬ್ಬುವ, ಅದ್‌ಂಗಾಯಿತೇ ಇಕ್ಕಾಯಿತ್ ಸ್ವಚ್ಛ ಗ್ರಾಮ ಯೋಜನೆಂದ್ ಮಾಡಿತ್, ಪ್ರತಿ ಗ್ರಾಮ ಪಂಚಾಯಿತಿರ ಮುಂದಾಳ್ತನತ್ ಮನೆಮನೆಕೂ ಕಕ್ಕುಸ್ ಮಾಡುವಕ್ ಪಣ ಸಹಾಯ ಮಾಡುವ.

ಪ್ರತಿ ಮನೆಕೂ ಕಕ್ಕುಸ್ ಇರಂಡು. ಪೊರಮೆ ಪೋಪಕಾಗ. ಕಾಯಿಲ ಪಬ್ಬುವಾಂದ್ ಹಳ್ಳಿ ಹಳ್ಳಿಕೂ ಸ್ವಯಂ ಸೇವಕಂಗ ಬಂದಿತ್ ಅರಿವಿಕೆ ಕೊಡ್‌ಪ.

ನವೆಂಬರ್ - 20

## ಪ್ರಪಂಚ ಮಕ್ಕಳ ದಿನ

### Children's Day

ನವೆಂಬರ್ - 14

## ಭಾರತತ್ ಮಕ್ಕಳ ದಿನ

ಪ್ರಪಂಚ ಮಕ್ಕಳ ದಿನದೊಂದಿಗೆ ಸಾಮಾನ್ಯವಾಯಿತು ಎಲ್ಲ ದೇಶಗಳೂ ಮಕ್ಕಳ ರಜ ಕೊಡುತ್ತಿರುವುದು. ನಗರದ ದೇಶತ್, ನಗರದ ದೇಶತ್‌ರ ಆದ್ಯ ಪ್ರಧಾನ ಮಂತ್ರಿ, ಆಯಿತಿಂಜ ಪಂಡಿತ್ ಜವಹರ್‌ಲಾಲ್ ನೆಹರು ಅಯಿಂಡ ಪುಟ್ಟನಮ್ಮನ ನವೆಂಬರ್ 14ಂಗೆ ಮಕ್ಕಳ ದಿನಾಂದ್ ಆಚರಣೆ ಮಾಡುವ. ಅಯಿಂಗಕ್ ಮಕ್ಕಳ ದುಂಬ ಖುಷಿ ಇಂಜಾಂಗ್ ಅಯಿಂಗ ತಾಂಡ ಪುಟ್ಟನಮ್ಮನ ಮಕ್ಕಳ ದಿನಾಂದ್ ಆಚರಣೆ ಮಾಡುವಕ್ ಬಯಂದತ್.

ಮಕ್ಕ ಚೆರಿಯಯಿಂಗ, ಅಯಿಂಗಕ್ ಒಂದೂ ಗೊತ್ತಾಪಲೆ ಎಣ್ಣಿತ್ ಮಕ್ಕಳ ತಾತ್ಕಾರ ಮಾಡುವದ್ ನಲ್ಲದಲ್ಲ. ಅಯಿಂಗಡ ಮನಸ್ ಅರಾಂಜಿತ್, ಅಯಿಂಗ ನಲ್ಲ ಬಟ್ಟೆಲ್ ಪೊಪನಕೆ ಮಾಡುವದ್ ಪೆರಿಯಯಿಂಡೆಲ್ಲಡ ಜವಾಬ್ದಾರಿ. ಅಯಿಂಗಡ ಆಸೆಕ್ ಬೆಲೆ ಕೊಡ್‌ಕತೆ, ನಗರದ ಆಸೆನ ಅಯಿಂಡ ಮೇಲೆ ಬಲಾತ್ಕಾರತ್ ಇಡುವದ್ ಸೆರಿಯಲ್ಲ.

ಇಂದ್ ಫಲತರ ಕೋವಲ್ ಸಾಧನೆ ಮಾಡುವಾತ್ ಎಚ್ಚಿಕೋ ಮಕ್ಕ ಮಿಂಗಳ್ ಪೋಯಿತ್. ಪೆರಿಯಯಿಂಡ ಆಶೀರ್ವಾದ ಅಯಿಂಗಕೋರ್ ಬಟ್ಟೆ ಬೊಳಿ ಆಪ. ಇಂದತ್‌ರ ಮಕ್ಕಳೇ ನಾಳೆ ಪ್ರಜೆಯ. ಇಕ್ಕಲೇ ಅಯಿಂಗಗಳ ಸಮಾಜಕೋರ್ ಮೊದ ಆಯಿತ್ ಬೊಳೆತಂಡು.

ನವೆಂಬರ್ -21

## ವಿಶ್ವ ದೂರದರ್ಶನ ದಿನ

### World Television Day

ವಿಶ್ವಸಂಸ್ಥೆ 1996ನೇ ಇಸವಿ ಡಿಸೆಂಬರ್ 17ಂಗೆ ಕೂಡ್‌ನ ಸಭೆಲ್ ಈ ವಿಶ್ವ ದೂರದರ್ಶನ ದಿನ ಆಚರಣೆ ಮಾಡುವ ತೀರ್ಮಾನ ಮಾಡ್‌ಚಿ. ಆದ್ಯೆ ವಿಶ್ವ ದೂರದರ್ಶನ ಫೋರಂ (World TV Forum) 1996 ನವೆಂಬರ್ 21ಂಗೆ ನಡ್‌ಂದಾಂಡ ನೆಪ್ಪಾಯಿತ್ ದೂರದರ್ಶನ ದಿನಾಚರಣೆ ಮಾಡುವಕ್ ತೀರ್ಮಾನ ಮಾಡ್‌ಚಿ.

ಒರ್ ದೇಶ, ಇಂಇಸೋರ್ ದೇಶತರ್ ಸಂಸ್ಕೃತಿ, ಭಾಷೆ, ಪ್ರಕೃತಿ, ಪರಿಸರ ಎಲ್ಲ ನೋಟಂಡು, ಅರ್ಥ ಮಾಡಿಯೋಂಡು, ಶಾಂತಿ ಭದ್ರತೆ ಕಾಪಾಡಂಡು. ಆರ್ಥಿಕವಾಯಿತೂ ಸಾಮಾಜಿಕವಾಯಿತೂ, ಅಭಿವೃದ್ಧಿ ಆಂಡೊಂದೆಣ್ಣವ ಉದ್ದೇಶತ್ ವಿಶ್ವಸಂಸ್ಥೆ ಈ ದಿನತ್‌ನ ಆಚರಣೆ ಮಾಡುವಕ್ ತೀರ್ಮಾನ ಮಾಡ್‌ಚಿ.

ದೂರದರ್ಶನತರ್ ಉಪಯೋಗ ನಂಗ ಎನ್ನನೆ ಪಡ್‌ಂದೋವ, ಎಚ್ಚಕ್ ಪಡ್‌ಂದೋವ ಎಣ್ಣವದ್ ನಂಗಕೇ, ಬುಟ್ಟದ್. ಇಡೀ ದಿನ ಟಿ.ವಿ.ರ ಮಿಂಞಲ್ ಅಳ್‌ಪಯಿಂಗಕ್ ಅದ್ 'ಮೂಢ ಪೊಟ್ಟಿ' (Ediot Box ನಲ್ಲ ಕಾರ್ಯಕ್ರಮ ನೋಟಿತ್ ಜ್ಞಾನ ಸಂಪಾದನೆ ಮಾಡಿಯೋವಯಿಂಗಕ್ ಅದ್ ಜ್ಞಾನ ಪೊಟ್ಟಿ (Knowledge Box)

ಆಗಸ್ಟ್ 15, 1959ಲ್ ಭಾರತತ್ ಆದ್ಯವಾಯಿತ್ ದೂರದರ್ಶನ ಕೇಂದ್ರ ಪ್ರಾರಂಭ ಆಚಿ. 1982ಲ್ ಭಾರತತ್ ವಿಷ್ಣು ಕ್ರೀಡಾಕೂಟ ನಡ್‌ಪಕ ಸುಮಾರೆಲ್ಲ ರಾಜ್ಯತರ್ ರಾಜಧಾನಿಲ್ ದೂರದರ್ಶನ ಕೇಂದ್ರ ಸ್ಥಾಪನೆ ಆಚಿ.

ನವೆಂಬರ್ - 25

**ಪೊಮ್ಮಕ್ಕಡ ಮೇಲೆ ನಡಪನ್ನತ ಹಿಂಸೆನ  
ವಿರೋಧ ಮಾಡುವ ಅಂತರ್ರಾಷ್ಟ್ರೀಯ ದಿನ  
International Day for Elimination of  
Violence against Women**

ಈ ದಿನಾಚರಣೆನ ಆದ್ಯವಾಯಿತ್ ನವೆಂಬರ್ 25, 1981ನೇ ಇಸವಿಲ್ ನಡತ್‌ಚಿ. ಅಲ್ಲಿಂಜ ಡಿಸೆಂಬರ್ 1999ಲ್ ವಿಶ್ವಸಂಸ್ಥೆ ಈ ದಿನತನ ಮಾನ್ಯ ಮಾಡ್‌ಚಿ. 1961ಲ್ ಡೋಮಿನಿಷಿಯನ್ ದೇಶತ್ ಸರ್ವಾಧಿಕಾರಿ ಇಂಜತ್. ಅಂವೊಂಡ ಪೆದ ರಫೇಲ್ ಟ್ರಜಿಲೊ. ಅಂವೊಂಡ ಆಡಳಿತ ಕಾಲತ್ 'ಮಿರಾಬಲ್ ಸಿಸ್ಟರ್ಸ್' ಎಣ್ಣೆತ್ ಮೂಂದ್ ಅಕ್ಕ-ತಂಗೆಯ ಇಂಜತ್. ಅಂಯಿಂಗಳ ಹಿಂಸೆ ಮಾಡಿತ್ ಕೊಲ್ಚಿಚಿಟ್ಟತ್. ಈ ಹಿಂಸೆನ ನೋಟಿತ್ ಇಂತ ಹಿಂಸೆ ಶೋಷಣೆ, ಅತ್ಯಾಚಾರ ಪೊಮ್ಮಕ್ಕಡ ಮೇಲೆ ಎಲ್ಲಿ ನಡಂದಕಲೂ ಅದನ ವಿರೋಧ ಮಾಡಂಡೂಂದೆಣ್ಣವ ಉದ್ದೇಶತ್ ಈ ದಿನಾಚರಣೆ ಮಾಡುವೊ.

ಅನ್ನನೆ ನೋಟಾಚೇಂಗಿ ಭಾರತ ಕೂಡ್‌ನನ್ನಕೆ ಎಚ್ಚಕೋ ದೇಶತ್ ಪ್ರತಿನಿತ್ಯ ಅಯಿಂಡಯಿಂಡ ಮನೆಲ್ ಪೊಮ್ಮಕ್ಕಡ ಮೇಲೆ ದೌರ್ಜನ್ಯ ಶೋಷಣೆ ನಡಂದಂಡೇ ಇಪ್ಪ. ಆಚೇಂಗೂ ಧೈರ್ಯತ್ ಮಿಂಞಾಕ್ ಬಂದಿತ್ ಅದ್‌ನ ಎಣ್ಣವವು ಬಾರಿ ಕಮ್ಮಿ. ಕಾಲಕೊಮ್ಮೆ ಆಚರಣೆ ನಡಂದಕ ಪೋರ. ಪ್ರತಿದಿನವೂ ನವೆಂಬರ್ 25 ಆಂಡು.

# ವಿಶ್ವ ಏಡ್ಸ್ ದಿನ

## WORLD AIDS DAY

ಏಡ್ಸ್ ಎಣ್ಣುವ ಮದ್ದಿಲ್ಲತ ಮಾರಿ ಎಲ್ಲಿಯೋ ಇಂಜದ್ ಇಕ್ಕ ಪಕ್ಕತ್ ಮನೆರ ಪಡಿ ತಟ್ಟುವಚ್ಚಕ್ ಪಕ್ಕ ಬಂದತ್ತಿರಾತ್. ಏಡ್ಸರ ಅರಿವಿಕೆಯೇ ಅದನ ವಾಸಿ ಮಾಡುವಕುಳ್ಳ ಮದ್ದ್. AIDS ಎಣ್ಣೆಚೆಂಗಿ Aquired Imuno Deficiency Syndrome ಎಣ್ಣಕ ಮನುಷ್ಯಂಡ ತಡಿಲ್ ರೋಗ ನಿರೋಧಕ ಶಕ್ತಿನೋ ಕಮ್ಮಿ ಮಾಡಿರುವದ್. ಏದ್ ಕಾಯಿಲ ಬಾತೆಂಗೂ, ತಡ್ಪ ಶಕ್ತಿ ಇಲ್ಲತೆ ಬೆರಿಯ ಆಯುಷ್ಯ ಕಮ್ಮಿ ಆಪ.

ಆಣೇ ಅಡ್, ಪೊಣ್ಣೇ ಅಡ್ ತಪ್ಪಿತ್ ನಡ್ಪಕಾಗ. ಪರಸ್ತ್ರೀ-ಪರಪುರುಷ ಸಂಬಂಧ ಬೊಳ್ತುವಕಾಗ, ಡ್ರಗ್ಸ್ ಚಟವುಳ್ಳಯಿಂಗ ಬೋರೆ ಒಬ್ಬ ಕುತ್ತಾನ ಅದೇ ಚೂದಲ್ ತಾನೂ ಕುತ್ತಿಯಂಡಕ ಅನ್ನನೆ ಆಪ. ತಾಂಡ ತಡಿಲ್ ಒಮ್ಮ HIV ಪಾಸಿಟಿವ್ ಬಂದಕ ಇಂಞ್ ಅದ್ ಪೋಪ್ಲೆ. ಎಚ್ಚರಿಕೆಲಿಂಜಕ ಜಾಸ್ತಿ ಕಾಲ ಬದ್ಕೊಲು. ನಂಗಡ ದೇಶತ್ 37 ಲಕ್ಷ ಜನಡತ್ ಪ್ರತಿ ಆಯಿರ ಜನಕ್ ಒಬ್ಬಂಗ್ ಹೆಚ್ಚಿವಿ ಆಯಿತ್. ಇಡೀ ಪ್ರಪಂಚತ್ 12 ದಶಲಕ್ಷ ಜನ ಏಡ್ಸ್ ರೋಗತಿಂಜ ವಯಂಗಿಯಂಡ್ ಉಂಡ್.

ಏಡ್ಸ್ ರೋಗಿನ ಮುಟ್ಟ್ಚೆಂಗಿ, ಒಕ್ಕಚೆ ಉಂಬ, ನೀರ್ ಕುಡಿಪ ಮಾಡ್ಚೆಂಗಿ ಎಲ್ಲ ಏಡ್ಸ್ ಇಂಞ್ಚೊಬ್ಬಂಗ್ ಬಪ್ಪಲೆ. ಏಡ್ಸ್ ರೋಗಿಯಳ ನಿಕ್ಕಷ್ಟವಾಯಿತ್ ಕಾಂಗತೆ ಅಯಿಂಗಕ್ ಬದ್ಕವಕ್ ಅವಕಾಶ ಮಾಡಿಕೊಡ್ಕಂಡು.

ಡಿಸೆಂಬರ್ - 2

## ಅಂತರ್ರಾಷ್ಟ್ರೀಯ ಗುಲಾಮಗಿರಿ ನಿರ್ಮೂಲನಾ ದಿನ

### International Day for abolition of Slavery

ಪಳೆಯ ಕಾಲತ್ ಒರ್ ಮನೆಲ್ ಒಬ್ಬ ಕೆಲಸ (ಜೀತ) ಮಾಡುವ ಎಣ್ಣಕ ಅಂವೊಂಡ ಮಕ್ಕ ಕೊರಮಕ್ಕ ಎಲ್ಲ ಅಯಿಂಗಡಲ್ಲಿಯೇ ಆಳಾಯಿತ್ ನಯಿಕಂಡಿಂ ಜತ್. ಆಚೇಂಗಿಕ್ಕ ಗುಲಾಮಗಿರಿ ಸಂಪೂರ್ಣ ನಿರ್ನಾಮ ಆಯಿತ್. ಇಕ್ಕ ಗುಲಾಮಗಿರಿ ಪೋಯಿತ್ ಕೆಲಸ ಕಾರ್ಬಾರ್ಕ್ ಆಳ್ ಕೊಟ್ಟುವದೇ ಕಷ್ಟ.

ಅಂದತ ಕಾಲತ್ ಗುಲಾಮಗಿರಿ ಒರ್ ತರತ್ಲ್ ಶಾಪ ಆಯಿತಿಂಜತ್. ಆಚೆಂಗಿ ಇಂದ್ ಎಲ್ಲರ್ಕೂ ಸ್ವಾತಂತ್ರ್ಯ ಉಂಡ್. ಕಾರ್ಮಿಕಂಗಡ ಕಾನೂನ್ ಉಂಡ್. ಎಲ್ಲ ತರತರ ಸೌಲಭ್ಯವೂ ಕೊಟ್ಟವ. ಇಂದ್ ಗುಲಾಮಗಿರಿ ಸುಮಾರ್ಕ್ ಎಲ್ಲ ನಿರ್ಮೂಲನೆ ಆಯಿತ್ ಈ ದಿನಾಚರಣೆ ಸಾರ್ಥಕ ಆಪ.

ಡಿಸೆಂಬರ್ - 3

## ವಿಶ್ವ ಅಂಗಊನಕಾರಡ ದಿನ

### International Day for Disabled Persons

ವಿಶ್ವಸಂಸ್ಥೆ 1992 ಲಿಂಜ ಈ ವಿಶ್ವ ಅಂಗ ಊನಕಾರಡ ದಿನ ಆಚರಣೆ ಮಾಡಿಯಂಡ್ ಉಂಡ್. ಇದ್ ಪ್ರಪಂಚತ್ ಬೋರೆ ಬೋರೆ ಜಾಗತ್ ಬೋರೆ ಬೋರೆ ತರತ್ ಆಚರಣೆ ಮಾಡುವ.

ಅಂಗ ಊನ ಆಯಿರ್ತೇಂಗಿ ಅಯಿಂಗಕೂ ಮನಸ್, ಆಸೆ ಎಲ್ಲ ಇಪ್ಪಾಲಿಯ? ಅಯಿಂಗಳ ಕೇಳಾಯಿತ್ ಕಾಂಬದ್ ನಿಕ್ಕಂಡು. ಎಚ್ಚಕೋ ಅಂಗ ಊನಕಾರ ಬಲ್ಯ ಬಲ್ಯ ಸಾಧನೆ ಮಾಡಿಯಂಡುಂಡ್. ಅಂತಯಿಂಗಕ್ ಎಲ್ಲರೂ ಒತ್ತಾಸೆ ಕೊಡ್ಕಂಡು. ಸರ್ಕಾರ ಅಂಗ ಊನಕಾರಕೊಂದೇ ಚಾಕ್ರಿಲ್ ಮೀಸಲಾತಿ ಮಾಡಿತ್. ಅಯಿಂಗ ಅದಂಡ ಉಪಯೋಗ, ಪಡೊಂದೊಂಡು. ಅಂಗ ಊನಕಾರ ಎಲ್ಲಿ ಕಂಡಕಲೂ ಅಯಿಂಗಕ್ ಸಹಾಯ ಸಹಕಾರ ಕೊಡ್ಕಂಡು.

ಡಿಸೆಂಬರ್ - 9

## ಅಂತರ್ರಾಷ್ಟ್ರೀಯ ಭ್ರಷ್ಟಾಚಾರ ವಿರೋಧಿ ದಿನ

### International Day Against Corruption

ಪ್ರಪಂಚತರ ಎಚ್ಚಿಕೋ ದೇಶತಲ್ ಭ್ರಷ್ಟಾಚಾರ ದುಂಬಿ ಪೋಯಿತ್. ಎಲ್ಲಿಯೋ ಒರೊಂದ್ ಜಾಗ ಮಾತ್ರ ಅದಂಗ್ ವಿರೋಧ ಇಪ್ಪ. ಎಂತೆಂಗೋರ ಸರಕಾರತರ ಕೆಲಸ ಆಕಂಡೂಂದಾಚೆಂಗಿ ಲಂಚ ಕೊಡ್ಕಂಡು. ಅದಿಲ್ಲತೆ ಕೆಲಸ ಆಪಾಲೆ. ಅನ್ನತ ಪರಿಸ್ಥಿತಿನ ಸುಮಾರೆಲ್ಲ ಅಧಿಕಾರಿಯ ಮಾಡಿತ್ ಬೆಚ್ಚಿತ್.

ಭ್ರಷ್ಟಾಚಾರ ವಿರೋಧಿ ದಿನ ಮಾಡ್ಚೆಂಗಿ ಪೋರ. ನಾನೆಂದೂ ಲಂಚ ಕೊಡ್ಪದೂ ಇಲ್ಲೆ, ಕೇಟವದೂ ಇಲ್ಲೆಂದ್ ಪ್ರತಿಜ್ಞೆ ಮಾಡಂಡು. ಅಂದಕ ಮಾತ್ರ ಈ ಆಚರಣೆಕೋರ್ ಅರ್ಥ ಬಪ್ಪ.

ಡಿಸೆಂಬರ್ - 10

## ಅಂತರ್ರಾಷ್ಟ್ರೀಯ ಮಾನವ ಹಕ್ಕು ದಿನ

### Human Rights Day

1948ನೇ ಇಸವಿ ಡಿಸೆಂಬರ್ 10 ಲಿಂಜ ಈ ಮಾನವ ಹಕ್ಕು ದಿನ ನಡ್ತಿಯಂಡುಂಡ್. ವಿಶ್ವಸಂಸ್ಥೆ 1950ಲ್ ಸಭೆ ಕೂಡ್ನಲ್ಲಿ ಎಲ್ಲರೂ ಈ ದಿನತನ ಆಚರಣೆ ಮಾಡಂಡೂಂದ್ ತೀರ್ಮಾನ ಮಾಡ್ಚಿ. ಸುಮಾರೆಲ್ಲ ಸರಕಾರಿ ಸಂಸ್ಥೆಯೂ ಈ ಕೆಲಸ ಮಾಡಿಯಂಡುಂಡ್.

ಮನುಷ್ಯಂಗ್ ಊಣ್, ನೀರ್, ಜಾಗ, ವಿದ್ಯೆ, ಆರೋಗ್ಯ ಇದೆಲ್ಲ ಹಕ್ಕು. ಇದನ ಕೇಟಿತ್ ಪಡ್ಂದೋಂಡು.



ಡಿಸೆಂಬರ್ - 14

## ರಾಷ್ಟ್ರೀಯ ಇಂಧನ ಶಕ್ತಿ ಉಳಿತಾಯ ದಿನ National Energy Saving Day

ಇದ್ದಾನ ನಂಗಡ ಭಾರತತ್ ಡಿಸೆಂಬರ್ 14ಂಗ್ ಆಚರಣೆ ಮಾಡುವ. ಇಂಧನ ಶಕ್ತಿ ತೇಂದ್ ಪೋಪನ್ನತ (Exhaustable) ಸಂಪನ್ಮೂಲ ಆನಗುಂಡ್ ಪೆಟ್ರೋಲ್, ಡೀಸೆಲ್ ಎಲ್ಲ ಮಿತಿಮೀರಿತ್ ಉಪಯೋಗ ಮಾಡುವಕಾಗ ಎಣ್ಣುವಾನ ಅರಿಚಿಡುವಕಾಯಿತ್ ಈ ದಿನಾಚರಣೆ.

ಭೂಮಿರ ಅಡಿಲ್ ಪೆಟ್ರೋಲ್ ತೇಂದಂಡ್ ಬಂದ್‌ರಾತ್. ಅದಂಗೇ ವಿಜ್ಞಾನಿಯ ಜೈವಿಕ ಇಂಧನ ಕಂಡ್‌ಪುಡ್‌ಚಿತ್ ಇಂಞೂ ಎಲ್ಲ ವಾಹನಕೂ ಇಡುವಕ್ ಆಯಿತ್‌ಲೆ. ಮನೆಲ್ ಒರೋರೆ ವಾಹನ ಬಳಕೆ ಮಾಡಂಡು. ಅಕ್ಕ ಇಂಧನ ಖರ್ಚ್ ಕಮ್ಮಿಯಾಪ. ನಂಗಡ ಮಕ್ಕಡ ಕಾಲಕೂ ಚೆನ್ನಂಗ್ ಪೆಟ್ರೋಲ್ ಉಳಿತಾಯ ಮಾಡಲು.


ಡಿಸೆಂಬರ್ - 23

## ವಿಶ್ವ ರೈತಂಗಡ ದಿನ World Farmer's Day

ನಂಗಡ ದೇಶತ್ ಹಳ್ಳಿ ಜಾಸ್ತಿ, ಅದಂಗೇ ಗಾಂಧೀಜಿ ಎಣ್ಣೆಯೆ ನಂಗಡ ಹಳ್ಳಿ ಉದ್ದಾರ ಆಚೀಂಗಿ ದೇಶ ಉದ್ದಾರ ಆಪಾಂದ್. 1873ಲ್ ಬ್ರಿಟಿಷಕಾರ ಜಮೀನ್ದಾರಿ ಪದ್ಧತಿ ಎಡ್‌ತಂಡ್ ಬಪ್ಪಕ ಸಂತಾಲ ಎಣ್ಣುವ ಆದಿವಾಸಿಯಕ್ ಬೇಲ್ ಇಲ್ಲತಾಚಿ. ಅಕ್ಕ ರೈತಂಗ ಆದ್ಯವಾಯಿತ್ ದಂಗ ಎದ್ದತ್. ಅಲ್ಲಿಂಜಪ್ಪರ ಬ್ರಿಟಿಷ್ ವಿರುದ್ಧ ಸುಮಾರ್ ಪ್ರತಿಭಟನೆ ನಡ್‌ಂದಿತ್. ಇಂದೂ ರೈತಂಗಕ್ ಕಷ್ಟವೆ. ಅಲ್ಲಲ್ಲಿ ರೈತಂಗ ಆತ್ಮಹತ್ಯೆ ಮಾಡಿಯೋವದ್ ಸಾಮಾನ್ಯ ಆಯಿಪೋಯಿತ್. ಇದ್ ನಿಕುಂಡು ರೈತಂಗಕ್ ಸರಕಾರ ಬೆಂಬಲ ಕೊಡ್‌ಕಂಡು. ಅಕ್ಕಲೇ ರೈತದಿನ\_ಸಾರ್ಥಕ ಆಪೊ.

ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ, ಮಡಿಕೇರಿ

ಅಧ್ಯಕ್ಷಿಣಿ	ಐಮುಡಿಯಂಡ ರಾಣಿ ಮಾಚಯ್ಯ	08272-224139 (ಮು) 9449334415 (ಮೊ)
ರಿಜಿಸ್ಟ್ರಾರ್	ವಿನೋದ್ ಚಂದ್ರ	08272-228449 (ಕೆ) 9448267068 (ಮೊ)
ಸದಸ್ಯಂಗ	ಚಿಲ್ಲ ಜಮ್ಮನ ನಾಣಮ್ಮಯ್ಯ ಸೋಮೇಶ್	08272-228076 (ಮು) 9449475632 (ಮೊ)
	ಬಾಚರಣಿಯಂಡ ರಾಣು ಅಪ್ಪಣ್ಣ	08276-274083 (ಮು) 9480730763 (ಮೊ)
	ಕೊರಕುಟ್ಟಿರ ಸರ ಚಂಗಪ್ಪ	08274-225985 (ಮು) 9448587973 (ಮೊ)
	ಕಾಳಚಂಡ ಎ. ಪಳಂಗಪ್ಪ	08272-233178 (ಮು) 9481469548 (ಮೊ)
	ಪೊನ್ನೀರ ಪ್ರಭು ಕಾವೇರಪ್ಪ	08274-234255 (ಮು) 9980461299 (ಮೊ)
	ಮಂಡೇಪಂಡ ಗೀತಾ ಮಂದಣ್ಣ	08274-252344 (ಮು) 08274 - 313513
	ಕುಡಿಯಡ ಕೆ. ಕರುಂಬಯ್ಯ	08272-238344 (ಮು) 9901309679 (ಮೊ)
	ವದಪಡ ಅಯ್ಯಪ್ಪ	08274-342052 (ಮು)
	ಮಡೆಯಂಡ ವಿಠಲ್ ಬೆಳ್ಳಪ್ಪ	08272-232397(ಮು) 9901254371 (ಮೊ)
	ಪಡ್ವಾರಂಡ ಎ. ಪ್ರಭುಕುಮಾರ್	08274-272257 (ಮು) 9448720716 (ಮೊ)
	ತೇಲಪಂಡ ಕವನ್ ಕಾರ್ಯಪ್ಪ	08276-282988 (ಮು) 08276-284067 (ಫ್ಯಾ) 9448325945 (ಮೊ)
	ಮಡೆಯಂಡ ಸಬಿತಾ ಕಾರ್ಯಪ್ಪ	08272-232591(ಮು) 9480290465 (ಮೊ)
ಬೀನಂಡ ಎಸ್. ಪೂಣಚ್ಚ	08274-254095 (ಮು) 9448504227 (ಮೊ)	



## ಅಪ್ಪಚಿಟ್ಟೋಳಂಡ ವನು ವಸಂತ

ಇವು ಬಲ್ಲಮಾವಟಿ ಗ್ರಾಮತಾರ ಅಪ್ಪಚಿಟ್ಟೋಳಂಡ ವಸಂತ ಅಯಿಂಗಡ ಪೊಣ್ಣ್. (ತಾಮನೆ : ಬಿ. ಶೆಟ್ಟಿಗೇರಿ ಗ್ರಾಮತಾರ ಚೀಂದಿರ ಕಾಳಯ್ಯ ಪಿಂಞ ಚೋಂದಮ್ಮ ದಂಪತಿಯಡ ಮೋವ) ಚಿಕ್ಕಮಗಳೂರ್ ಎಸ್.ಟಿ.ಜೆ. ಕಾಲೇಜ್ ಬಿ.ಕಾಂ. ಡಿಗ್ರಿ, ಮೈಸೂರ್ ವಿಶ್ವವಿದ್ಯಾ ನಿಲಯತ್ ಎಂ.ಕಾಂ. ಡಿಗ್ರಿ ಪಡ್ಂದಿತ್. ಇವು ಪೆರ್ತ್ ಪತ್ರಿಕೆ, ಸಂಚಿಕೆ ಕಥೆ, ಕವನ ಎಳ್ದಿತ್.

ಕೊಡವ ತಕ್ಕ ಎಳ್ದಿತ್ತಾರಡ ಕೂಟತಾರ "ಪತ್ತ್ ಕಥೆರ ಪುತ್ತ್", "ಪಡ್ಂದ ಬಂದದ್"; ಕೊಡವ ಸಾಹಿತ್ಯ ಅಕಾಡೆಮಿ ಪಿಂಞ ಮಡಿಕೇರಿ ಕನ್ನಡ ಸಾಹಿತ್ಯ ಪರಿಷತ್ತಾರ ಕೂಟಾದನೆಲ್ ಬುಡ್ಗಡೆ ಮಾಡ್ನ "ಕಾವ್ಯ ಸಂಗಮ" ಕವನ ಸಂಕಲನತಾರ "ಮಾರ್ಗದರ್ಶನ" ಕವನತಾರ ಎಳ್ದಿತ್ತಾರ್ತಿ.

"ಬದ್ಕಾರ ಬಟ್ಟೆಲ್" ಪಿಂಞ "ಎತ್ತರಕ್ ಪತ್ತ್ನವು" ಎಣ್ಣುವ ಕತೆಗೂಡ್ ಪುಸ್ತಕ ಅಕಾಡೆಮಿಂಜ ಪ್ರಕಟ ಆಯಿತ್.

ಇಯಂಡ ವಿಳಾಸ :

**ಅಪ್ಪಚಿಟ್ಟೋಳಂಡ ವನು ವಸಂತ**

ಬಲ್ಲಮಾವಟಿ ಗ್ರಾಮ & ಪೋಸ್ಟ್

(ವಯಾ) ನಾಪೋಕ್, ಪೋನ್ : 270006

ಕರ್ನಾಟಕ ಕೊಡವ ಸಾಹಿತ್ಯ ಅಕಾಡೆಮಿ  
ಮಡಿಕೇರಿ